


Mot láidestit mánáid sámi árbevieruide sámi mánáidgirjjálašvuoda bokte

Ellen Anne Sara Gaup & Ragnhild Gaup Eira

V1ÁLG-3110. Sámi vuodđuskuvlaoahpu 1.-7.ceahki master

Masterbargu sámi vuodđoskuvlaoahpaheaddji oahpus, 2020



Čoahkkáigeassu

Dán masterbarggu fáddá leat sámi árbevierut ja sámi mánáidčáppagirjjálašvuhta.

Dutkančuolbma lea mo sámi čáppagirjjálašvuhta sámi mánáide sáhttá ovddidit sámi árbevieruid, ja jearaldat lea ahte ohpet go oahppit sámi árbevieruid birra čáppagirjjálašvuoda bokte skuvllas. Dutkanmetoda lea kvalitatiivvalaš jearahallan, ja informánttat leat sámi oahpaheaddjít sámi skuvllain. Jearahallamiidda leat hábmejuvvon gažaldagat mat fas leat juhkkojuvvon golmma oassái. Vuosttaš oassi lea oahpaheaddjít ja sámi mánáidčáppagirjjálašvuoda girjjit, nubbi oassi lea oahpaheaddjít ja sámi árbevierut sámi mánáidčáppagirjjálašvuoda girjjiid bokte, ja goalmmát fas lea mo oahpaheaddjít barget skuvllas sámi mánáidčáppagirjjálašvuoda girjjiiguin. Dutkanbargui lea adnojuvvon kvalitatiivvalaš sisdoalloanalysa. Lassin leamaš maiddái sámi mánáidčáppagirjjálašvuoda girji *Áhkubiebmu*. Girji lea geavahuvvon vuodđun ja doarjan ságastallamiidda go lei fáddá árbevirolašvuoda birra. Dan girjjis leat informánttat árvvoštallan mii das lea sámi árbevirolašvuhta, ja mo sáhttá dan atnit oahpahusas. Dutkan gažaldagaid čoavdimii leat adnojuvvon sámi dutkiid teoriijat sámi árbevieruid ja kultuvrra birra. Lassi teoriijat leat vel ruošša dutki Vygotsky dutkosat ja muhtin eará dutkiid čállosat.

Čoavddasánit: Sámi mánáidčáppagirjjálašvuhta, Sámi árbevierut, Buolvvas bulvii, Sámi oahpaheaddjít, Sámi skuvla.

Abstract

The theme of this master thesis is Sami traditions and Sami fiction for kids. The Thesis statement is how can Sami fiction for Sami kids promote Sami traditions, and the question is: do pupils learn about Sami traditions at school through Sami fiction. The research method is qualitative interview, and the informants are Sami teachers at Sami schools. For the interview the questions are sorted into three main categories. The first category is teachers and Sami fiction books for kids, the second category is teachers and Sami traditions through Sami fiction books for kids, and the third category is how do teachers work with Sami fiction books for kids at school. The qualitative content analysis method has been used for this research. In addition, the Sami fiction book for kids: *Áhkobiebmu* is also used. The book is used as a basis and support for the conversations when the topic was about traditions. The informants have evaluated what the Sami traditions are in this book, and how it can be used in teaching. Sami researchers' theories about Sami traditions and culture have been used in order to answer the thesis statement. Other theories used for this research are the Russian researcher Vygotsky's work and other researchers' research work.

Key words: Sami fiction for kids, Sami traditions, from generation to generation, Sami teachers, Sami school.

Ovdasátni

Masterdutkamuš lea leamašan moalkái ja hástaleaddji bálggis. Letne vásihan ollu hástalusaid maid ean lean oba doaivut ge, muhto leat maid leamašan áiggit go bargu orro mannan njuovžilit ja lea buktán bargomovtta bargat viidáseappot. Masterbargu lea maiddái leamašan gelddolaš, ja dan bokte letne oahppan ollu sihke iežame birra, muhto maiddá sámi mánáidgirjjálašvuoden birra, maid man dehálaš lea girjjálašvuohta oahpahusas ja mo oahpaheaddjit barget sámi árbevieruid ovddidemiin skuvllas. Dán masterbarggu dutkama oktavuođas letne giitevaččat go letne ožzon máhtu ja oahpu mo sáhttá bargat sámi mánáidgirjjálašvuoden girjjiiguin ovddidan dihte ohppiid máhtu ja dieđu sámi árbevieruid birra. Dal go letne loahpahan barggu, de letne fuobmán man ollu máhtu ja dieđuid letne ožzon mo bargat skuvllas sámi mánáidčáppagirjjálašvuodain. Moai letne nu giitevaččat buohkaide geat leat veahkehan munno dánna bargguin, ja dan oktavuođas háliidetne giitit buohkaid. Vuosttažettiin giitosat munno viššalis bagadalliide, professorat Ylva Jannok Nutti ja Hanna Mattila geat leaba leamašan buorre doarjjan, gierdevaččat ja veahkát. Soai leaba addán buori fágalaš bagadallama barguide. Sudnos lea leamašan jáhkku munno bargui, ja leaba veahkehan munno gáddái dánna bargguin. Dasto háliidetne maid giitit buot eará oahpahedjiid geat leat čađahan semináraid ja rávvagiid addán munnuide. Giitosat maiddái eará studeanttaide geaiguin letne beassan ságastallat ja digaštallat áššiid birra. Loahpas vel giitosat olbmáide ja iežame bearrašiidda geat leat veahkahan munno juohke lágje barggu oktavuođas.

Ollu giitu buohkaide!

Máze, miessemánu 18. beaivvi 2020.

Mihkkel Issáha Ellen Ánne

Egán Joavnna Rávdná

Čoahkkáigeassu	i
Abstract	ii
Ovdasátni	iv
1 Álggahus	1
1.1 Dutkangažaldagat	2
1.2 Dutkanfáttá válljen	2
1.3 Ovddit dutkosat	3
1.4 Oahppoplánat skuvillas- máhтолоктен 2006 ja oahppoplána odasteapmi	4
1.5 Čállosa huksehus	6
2 Teorehtalaš lahkovanvuogit	7
2.1 Sámi árbevieruid oahppan	7
2.1.1 Muitalan- ja njálmmálaš árbevierru	8
2.1.2 Jávohis ja árbevirolaš máhttua	10
2.2 Sámi čáppagirjjálašvuohta	11
2.2.1 Sámi mánáidgirjjálašvuohta	13
2.3 Sosiokultuvrralaš oaidnu	16
2.4 Girjjálašvuoda didaktihkka	18
3 Dutkanmetoda	21
3.1 Kvalitatiiva metoda	21
3.2 Kvalitatiivva jearahallan ja čadaheapmi	22
3.2.1 Dutkanmateriála čohkken	24
3.2.2 Dutkanbarggu informánttat	25
3.2.4 Metoda digaštallan	27
3.3 Epistemologija ja ontologija	28
3.3.1 Jähkehahttivuohta ja dohkálašvuohta	29
3.3.2 Etihkka	31

3.4 Kvalitatiivva bohtosiid analyseren	31
4. Válljejuvpon girji Áhkubiebmu	33
4.1 Čoahkkáigeassu Áhkubiebmu girjjis	33
5 Bohtosat	35
5.1 Oahpaheaddjii oainnut sámi mánáidčáppagirjjálašvuoda girjjiin.....	35
5.1.1 Váilevašvuodat sámi mánáidčáppagirjjálašvuodagirjjiin	37
5.1.2 Čoahkkáigeassu	38
5.2 Oahpaheaddjit ja sámi árbevierut sámi mánáidčáppagirjjálašvuoda girjjiin ..	39
5.2.1 Čoahkkáigeassu	41
5.3 Mo oahpaheaddjit barget skuvllas sámi mánáidčáppagirjjálašvuoda girjjiiguin .	41
5.3.1 Čoahkkáigeassu	46
5.3.2 Govat sámi mánáidčáppagirjjálašvuodagirjjiin.....	46
5.3.3 Čoahkkáigeassu	48
5.3.4 Girji Áhkubiebmu oahpahusas	48
5.3.5 Čoahkkáigeassu	51
6 Digaštallan	53
6.1 Oahpaheaddji oainnut sámi mánáidčáppagirjjálašvuoda girjjiin	53
6.1.1 Váilevašvuodat sámi mánáidčáppagirjjálašvuoda girjjiin	56
6.2 Oahpaheaddjit ja sámi árbevierut sámi mánáidčáppagirjjálašvuoda girjjiin ..	57
6.3 Sámi mánáidčáppagirjjálašvuoda girjjit oahpahusas	61
6.3.1 Govat sámi mánáidčáppagirjjálašvuoda girjjiin	66
6.3.2 Girji Áhkubiebmu	67
6.4 Metoda digaštallan	70
7 Loahpahus	73
7.1 Oahpaheaddjii oainnut sámi mánáidčáppagirjjálašvuoda girjin	73
7.2 Oahpaheaddjit ja sámi árbevierut sámi mánáidgirjjálašvuoda girjjiin	74
7.3 Movt oahpaheaddjit barget sámi mánáidčáppagirjjálašvuoda girjjiiguin skuvllas....	74

7.4	Loahppajurdagat	75
8	Gáldut	76
	Mildosat	

1 Álggahus

*“Dollagáttin gullan mайднasiид
gelddolaš muitalusaid
balddehahti čudiid birra
stuora stálu, hálđi, guŋkká
gufihtara, gátneha, uldda
Ballan rievváris ja gummehusais
guovssahasa ruohčamin
ja seavdnjadim mii lei nu seavdnjat”*

(Huuva 1999:101)

Rose-Marie Huuva dikta *Galbmarádná* dikttagirjjis govahallá sámi árbevirolaš mайднасиид. Álgu sámi čáppagirjjálašvuhtii lea sámi njálmmálaš árbevierru. Divtas muitaluvvon muitalusat leat álggos muitaluvvon njálmmálačcat dollagáttis guoimmuheapmin, áigeájanassan, nevvodeapmin bajásgeassimis ja oahpahussan.

Dát masterbargu lea joavkobargu, ovttasbargu gaskal Ellen Anne Sara Gaup ja Ragnhild Gaup Eira. Moai letne masterstudeanttat vuodđoskuvlla dásis, Sámi allaskuvllas, ja dán barggu vuodđun lea sámi mánáidčáppagirjjálašvuhta. Munnos lea álohi leamašan beroštupmi sámi mánáidčáppagirjjálašvuhtii ja lea dadjat juo munno stuora váibmoášši. Moai letne maid čállán sámi mánáidčáppagirjjálašvuoda girjiid, main fádda lea sámi árbevirolašvuhta. Čáppagirjjálašvuoda girjiid letne ollu atnán oahpahusas. Letne lohkan ollu girjiid, muitalusaid, mайднасиид, cukcasiid ja ráhkadan dađistaga muitalusaid jus lea juoga mii lea dáhpáhuvvan skuvllas dahje mánáidgárddis. Beroštumi čáppagirjjálašvuhtii oaččuime juo mánnávuoda ruovttus gos gulaime ollu njálmmálaš árbevirolaš muitalusaid. Munno bearrašiin

lei njálmmálaš árbevierru guovddážis. Muitalusat ja máidnasat muiataluvvojedje vaikko gos, erenoamážit lávus dollagáttis, eahkediid ja jođidettiin go ovdamearkka dihte guođul- ja livvadahtiimet ealumet. Muitalusat ledje dávjá dihto oahpes báikkiid birra, nevvodeamit ja áigeájanasat. Moai letne nu lihkolaččat go mánán juo beasaime gullat ollu muitalusaid, máidnasiid ja cukcasiid ruovttus. Dat lea sihkkarit movttiidahttán munno čállit sámi mánáidčáppagirjjálašvuoda girjiid, ja letne maid fuobmán dárbbu čállit girjiid go leat nu unnán sámi mánáidčáppagirjjálašvuoda girjjit mat leat sámi árbevieruid birra. Girjiid maid letne čállán, ja beassan almmuhit girjin, letne inspirašuvnna viežjan iežame mánnavuoda vásáhusain ja njálmmálaš árbevirolaš muitalusain.

1.1 Dutkangažaldagat

Ulbmil dutkosiin lea guorahallat mo sámi árbevierut leat váldojuvvon vuhtii sámi mánáidčáppagirjjálašvuoda girjiin, ja atnet go skuvllas daid girjiid ovddidan dihte sámi árbevieruid ja kultuvrra. Dutkančulbmii leat válljejuvvon čuovvovaš gažaldagat:

1. Mo sámi mánáidčáppagirjjálašvuoda girjiiguin sáhttá ovddidit sámi árbevieruid?
2. Ohpet go oahppit skuvllas sámi árbevieruid birra, sámi mánáidčáppagirjjálašvuoda bokte, dalle go sámi árbevierut leat fáddán?

1.2 Dutkanfáttá válljen

Dutkanfáttá letne válljen danne go munno mielas leat sámi árbevierut nu divrasat ja mágssolaččat. Lea dehálaš seailluhit sámi árbevieruid ja kultuvrra oahpahusa bokte boahttevaš buolvvaide vai min giella, kultuvra ja árbevierut eai nogá, muhto nannejuvvojít. Duogáš dutkanfáttá válljemii leat máŋggat ákkat. Oahppoplána *Máhтолоктен* geatnegahtte ahte sámi skuvllat galget lágidit oahpahusa nannen dihte sámi giela, kultuvrra ja árbevieruid. Dalle go ieža leimme mánát ja álggiime vuodđoskuvllii, de letne vázzán goabbat sámeskuvllas. Rávdná lea vázzán Guovdageainnu vuodđoskuvllas, ja Ellen Anne lea fas vázzán Máze vuodđoskuvllas.

Ellen Anne väsihii ahte skuvllas ledje eanas dárogielat oahpaheaddjit, ja sámi árbevirolašvuhtii lei unnán sadji oahpahusas, sihke praktikhalaččat ja teorehtalaččat. Sáhttá lohkat ahte lei muhtunlágán kolonialisma mii lei guovddážis oahpahusa oktavuođas danne go eanas girjjit ledje dárogillii, ja ollu praktikhalaš barggut eai dávistan sámi árbevirolaš bargguide nu go duodjeoahpahusas goarrut čuvllaaid/vuolppuid, hábmet keramihkkalihiid, godđit, broderet ja nu ain. Matematihkka oahpahusas ledje dárogielat girjjit, ja matematihkas

ii lean matematiikka árbevirolaš vuolggasadji. Servodatfágas eat bálljo oahppan historjámet, lei eanas stuora servodaga birra. Seamma dealli lei maid daid eará fágaid ektui.

Guovdageainnu vuodđoskuvillas ledje eambbo sámegielat oahpaheaddjit, muhto dan áigge ii lean sámi árbevirolaš doaimmain árvu ja nu maid eai lean guovddážis oahpahusas. Go dál geahččá otná oahpahusa dilálašvuodaid, de lea rievdan oalle ollu dalá áiggis otnážii. Dál leat suohkana skuvllaid oahpahusas báikkálaš árbevierut ja kultuvra guovddážis. Leat maid eambbo sámegielat oahppogirjjit ohppiide, ja leat eanas sámegielat oahpaheaddjit sámeskuvllain min suohkanis.

1.3 Ovddit dutkosat

Dán kapiittalis ovdanbukte muhtun ovddeš dutkamušaid mat leat čađahuvvon sámis, sihke Ruotta ja Norgga bealde. Fáddá dutkamušain lea sámi girjjálašvuhta ja árbevirolašvuhta. Duktosat leat leamašan stuora ávkin iežame dutkamuša oktavuođas. Dan oasis namuhetne golbma dutkosa, ja geat leat čađahan daid. Orui lunddolaš namuhit daid dutkiid bargguid, go letne geavahan sin teorijaid ja dieđuid gáldun masterbarggu oktavuođas mas lea ge sámi girjjálašvuhta ja árbevirolašvuhta fáddan. Dat golbma doavttirgrádabarggut geasuhedje go leat sámi girjjálašvuoda dutkosat, árbevirolaš siida ja siiddastallama birra boazodoalus ja goalmmát dutkos fas lei dutkan árbevirolašvuoda sámi skuvllain matematiikka dieđu ja máhttu.

Harald Gaski lea deatnulaš, ja lea professor sámi kultuvrras ja girjjálašvuodaš. Son bargá Norgga árktaš universitehtas Romssas, ja Sámi allaskuvillas Guovdageainnus. Su dutkanfáttát leat sámi girjjálašvuhta, sámi árvvut ja symbolat, earret eará Sámi nationálalávlla ja álgoálbmotkultuvrrat. Gaski lea čállán ollu girjiid ja artihkkaliid sihke sáme-, dáro- ja eŋelasgillii. Son lea maid jorgalan sámi čáppagirjjálašvuoda girjiid dáro- ja eŋelasgillii. Gaski lea maid čáppagirjjálašvuodagirječálli ja dramatiikkar. (Sámi allaskuvlla ja UiT Norgga árktaš universitehta ruovttusiiddut).

Ylva Jannok Nutti lea váldán doavttirgráda 2010:s, mas fáddán lei sámi árbevirolaš matematiikka diehtu ja máhttu ja son čađahii -akšuvdnadutkamuša. Dutkamuša son čađahii njealji sámi skuvillas Ruota bealde. Go Jannok Nutti barggai ieš oahpaheaddjin, de son fuomášii skuvillas leat váilevašvuodat go guoská sámi árbevieruide, ja skuvlla vuodđodokumeanttain bođii ovdan ahte buot fágain galgá leat vuolggasadji sámi perspektiivvas. Dát dagahii son háliidii čađahit dutkosa sámi matematiikka birra mas

vuolggasadji lea sámi perspektiiva. Dutkamii anii akšuvdnadutkanmetoda, ja son ságastalai oahpaheddjiiguin, searvvai skuvllaid čoahkkimiidda ja semináraide. Dutkamuša bohtosiin čájehuvvui ahte ledje ollu hehttehusat mo čađahit matematihka oahpahusa skuvllas mas vuolggasadji lea sámi perspektiiva. Hehttehusat ledje oahpahusas: unnán sámi girjjit matematihkas, jorgaluvvon Ruota matematihkagirjjit, main ii leat sámi perspektiiva, ja oahpaheaddjit geain lei váilevaš oahppu. Daid váilevašvuodđaid oktavuođas biddjojuvvo doaibmabijut johtui nannet matematihkaoahpahusa mas lea sámi perspektiiva. Doaibmabijut bargojuvvojedje fáddábargguid oktavuođas. Dan dutkanbarggu oktavuođas fuomášuhtii dutki oahpaheddjiid mo sáhttá bargat buoridan dihte oahpahusa mas lea vuolggasadji sámi árbevierru matematihkas. (Jannok Nutti 2009:106-116.)

Mikkel Nils Mikkelsen Sara lea guovdageaidnulaš, ja lea professor ja bargá Sámi allaskuvllas, gos son koordinere ja logaldallá boazodoallofágaid, servvodatfágalaš fáttaid ja eará oahpuin. Su dutkanfáttát leat siida, boazosámi historjá, árbevirolaš sámi ealáhusláhki, máhtut ja eallin/jurddavuogit. Son lea váldán doavttirgráda 2013, mas fáddá lei siida ja siiddastallan. Son lea maid čállán artihkkaliid ja girijiid mat leat almmuhuvvon.

(Sámi allaskuvlla ruovttusiidiu).

1.4 Oahppoplánat skuvllas- máhttolokten 2006 ja oahppoplána odasteapmi

Oahppoplána mii almmuhuvvui 2006:s gohčoduvvui *Máhttolokten*, ja mas lea oppalaš oassi ja sierra plána juohke fágii. Oppalaš oassi sistisdoallá válđoulbmiliid oahpahussii, ja ulbmiliid mat leat laktojuvvon kultuvrii, árvvuide, ovttasbargui, vuodđomáhtuide, gelbbolašvuoda ulbmiliidda ja fágaid loahpalaš árvvoštallama njuolggadusaide. Dat oasit leat fievrividuvvon Reforbma 94:s ja Oahppoplána 97:s. Máhttolokten 2006 lea Norgga nationála oahppoplána mii maiddái gohčoduvvo *LK06*. Sámi mánáid váras lea maiddái ráhkaduvvon vuodđooahpahusa oahppoplána mii lea bálddalaga Norgga nationála oahppoplánain ja gohčoduvvo *Máhttolokten - sámi- LK06S*. *Máhttolokten* reviderejuvvui 2013:s mas ulbmil lei nannet sámegiela ja kultuvra. Dán dutkanbarggus lea sámi čáppagirjjálašvuhta fáddán, ja dan oktavuođas namuhetne ovta oasi váldooasi Máhttoloktemis, mii lea giella, kultuvra ja girjjálašvuhta. Váldooassái gullá maid giellageavaheapmi, sámi kultuvra, eallinvuogit, árbevirolaš máhttu, doahpagiid oahppan ja sátneriggodat. Oahppit galget beassat oahpásnuvvat sámi árbevirrui, sámi girjjálašvuhtii ja

girječállimii. Sii galget oažžut vejolašvuoden lohkat ja muosáhit sihke sámi girjjálašvuoden ja álgóálbmogiid girjjálašvuoden. (Oahpahusdirektoráhtta 2008.)

Girjjálašvuohta lea oassi oahpahusas sihke mánáid- ja nuoraidskuvllas. Girjjálašvuodenain oahppá oahppi ovdamearkka dihte giela, suopmaniid, sámi kultuvrra, árbevieruid, doahpagiid, eallinnjuolggadusaid, servodatoahpu, empatiija, identitehtaovdáneami, gálggaid, árvvuid ja nu ain. (Oahpahusdirektoráhtta 2008). Skuvlla oahpahusas sáhttá čáppagirjjálašvuoden girjjiiguiin bargat ollu, ja letne jearahallan oahpaheddiin atnet go ja barget go sii sámi mánáidčáppagirjjálašvuoden girjjiiguiin skuvllas go fáddá lea sámevuoden birra.

Ođđa oahppoplána mii boahtá fápmui čakčat 2020:s lea dat bajit oassi oahppoplánaas mii váldá vuhtii oahpahusa oppalaš ulbmila. Sámegielfága vuosttášgiellan lea sihke giellafága ja árvovuođut. Fágain galgá hukset oadjebas giellageavaheddiid vai ohppiin lea sámegielgelbbolašvuohta maid atnit sihke skuvllas, bargoeallimis ja servodaga demokráhtalaš proseassain. Sámegieloahpahus galgá addit ohppiide sihke čálalaš ja njálmmálaš gelbbolašvuoden maid sáhttet atnit daid iešguđetge surgiin ja báikkiin. Fága vuolggasadji lea hukset ja nannet sámegiela, kultuvrra ja árvvuid, beroškeahttá das makkár gillii ja suopmanii oahppit galget oažžut oahpu. Oahpahus ferte heivehuvvot nu ahte oahppi oažžu oahpahusas nanu giellaovdagovaid ja nu de beassá ovddidit gielas ja suopmanis. Oahppanulbmilat rahpet vejolašvuoden oahpaheddiide mearridit ja válljet makkár fáttaiguin háliidit bargat ohppiiguiin. Dat mii lea ođas lea fágaid čiekjudeapmi. Oahppit galget beassat iešheanalaččat bargat ja guorahallat. Oahppit galget lohkat eambbo čáppagirjjálašvuoden girjjiid dainna ulbmilin ahte sii besset vásihit, fuomášit, oahppat ja ipmirdit eará olbmuid jurdagiid ja sin eallinvásáhusaid. Oahppanulbmilat galget maid unniduvvot, vai sáhttá ja beassá eambbo deattuhit čiekjudanoahpu nu ahte dainna lágiin beassá oahppi atnit eambbo áiggis fága oaiveáššiid. Fága čiekjälisoahppan mearkkaša hárjehallat atnit máhtuid ja gálggaid iešguđet láhkái vai oahppit áiggi mielde sáhttet birget máŋggalágán fágalas hástalusaguin sihke individuálalaččat ja ovttas earáiguin. (Oahpahusdirektoráhtta 2019.)

Moai dulkojetne ođđa oahppoplána ođasteapmi addá ollu vejolašvuodenuid bargat ja čiekjudit sámi mánáidčáppagirjjálašvuhtii. Dat fas addá eanet vejolašvuoden ovddidit árbevieruimet ja gielamet girjjiid bokte. Dán ođasteami olis rahpasit ollu geainnut mo čiekjudit ja bargat čáppagirjjálašvuoden girjjiiguiin skuvllas, nu go bargat digitálareaidduid atnimiin go barget

čáppagirjjálašvuodá girjjiiguin ja sámi árbevieruiguin skuvllas. Okta informánta namuhii ahte son lea atnán digitálareaiddu oahppat čállit, lohkat ja ráhkadir elektrovnnaš girjjiid. Ođđa oahppoplána ođasteapmi addá maid čiekjudan vejolašvuodaid, bargat teavsttaiguin ovddidan dihte lohkama ja čállima. Šaddá maid eambbo dilli čiekjudit ohppiid lohkan- ja čállingálggaide, ja nu maiddái čiekjudit lohkan- ja čállinbargguid strategijjaide ovddidan dihte lohkama ja čállima.

1.5 Čállosa huksehus

Dát masterbargu lea juhkojuvvon guđa váldokapihtali; álggahus, teorehtalaš lahkovanvuogit, dutkanmetoda, dutkanbohtosat, digaštallan ja loahppasánit.

Vuosttaš kapihtalis ovdanbuktojuvvo mii lea duogáš masterfáddái, dutkančuolbma, ja geat leaba masterbarggu čállit, máhтолокten ja oahppoplána ođasteapmi. **Nuppi** kapihtalis ovdanbukte relevánta teorijaid mat leat adnojuvvon bohtosiid digaštallamis. **Goalmmát** kapihtalis ovdanbukte makkár dutkan- ja analysametoda lea geavahuvvon, ja mo letne čohkken dutkanmateriála. **Njealját** kapihtalis ovdanbukte informánttaid dieđuid fáttá birra. **Vidát** kapihtalis digaštalle bohtosiid relevánta teorijaid vuostá. **Gudát** kapihtalis loahpahetne dutkamuša, ja ovdanbukte gažaldatčuolmma čovdosa ja jurdagíiddáme dan ektui.

2 Teorehtalaš lahkonalvuogit

Dán kapihtalis čilgejetne makkár relevánta teorijaid čatne dutkanbohtosiidda.

Vuosttaš oassi lea sámi árbevierru, nubbi oassi lea sámi čáppagirjjálašvuhta, goalmmát oassi lea sosiokultuvrralaš oainnu birra ja njealját oassi fas lea didaktihka ja oahpahusa birra.

2.1 Sámi árbevieruid oahppan

Sámi árbevirolašvuhta lea váldofáddá dán masterbarggus, ja dan dihte lea lunddolaš čilget maid doaba *árbevierru* mearkkaša. Sámi *árbevieru* doahpaga ii sáhtte dušše ovttain sániin čilget danne go dat lea viiddis doaba, muhto sámi dutkit leat meroštallan mii sámi árbevirolašvuhta lea. Juohke álbmoris leat iežas árbevierut ja dieđut, mat sirdásit buolvvas bulvii ja leat álbmoga kultuvrra vuodđun, ja mat earuhit daid iešguđetge kultuvrraid. (Vars 2007: 124). Laila Susanne Vars maid lohká sámi árbevieruid eallán buolvvas bulvii go leat fievrriuvvon muitaleami ja bargguid bokte danne go dološ sápmelaččain ii lean čálkingiella mainna sáhtte čállit, muitalit ja duođaštit mo sin árbevirolaš máhttu ja eallin lei. Sámi muitalusat, máidnasat, cukcasat, diiddat ja luodđit gullet sámi kultuvrii ja muitalit sámiid dološ árbevieruid birra. Sámi árbevirolašvuhta lea eallán buolvvas bulvii sámeigela, kultuvrra, eallinvuogi, osku, fuolkevuoda, báikkálašvuoda, siiddastallan, bivttasteami, vieruid ja dábit bokte. Dat leat dábálaččat eamiálbmogiid ja báikkálaš servodagaid oktasaš opmodat, árbi, ja lea dávjá leamašan dárbašlaš oassi birgejumis. Dat oahppu lei dávjá praktikhalaš ja laktása maid dávjá vuodđoealáhusaid bargguide. (Vars 2007: 124-132.)

Jelena Porsanger ja Gunvor Guttorm ges lohkaba árbediehtu lea sámeálbmoga viisodat ja máhtut, maid olbmot leat jahkečuđiid čađa ovddidan iežaset birgejupmái. Árbediehtu lea fievrriuvvon buolvvas nubbái njálmmálaččat ja bargguid bokte. Dát jotkkolašvuhta čatná vássán-, dálá- ja boahtteáiggi oktii árbediehtu-konseapttas. (Porsanger & Guttorm 2001:18.) Vuokko Hirvonen čállá fas ahte eamiálbmogiid kultuvrii gullet eallinvuogit, olahusat ja hutkáivuohta, ja ollu eará árvvut mat bohtet dan eamiálbmoga doahpaga vuollái. Dan dáfus namuha ge Vuokko Hirvonen dasa gullevažžan nu go ovdamearkka dihte vierut, feasttát, vuoiŋjalašvuhta, girjjálašvuhta, árbevirolaš dieđut, bivttasteamit, bargoreaiddu, láhttendábit, árvvut, morála, meahcásteapmi ja iešguđetlágan barggut. (Hirvonen 2018: 10-11.) Rauna Kuokkanen ges árvvoštallá oanehaččat eamiálbmotdieđu sistisdoallat buot dieđu

mii gullá dihto álbmogii ja guoská dihto birrasa nugo iešguđegelágán dieđalaš, teknihkalaš, ekologalaš, vuoinjalaš ja kultuvrralaš diehtu. Eará tearpmat mat dávjá adnojuvvoyit eamiálbmotdieđus leat árbevirolaš ja báikkálaš diehtu, árbevirolaš ekologalaš diehtu, árbevirolaš láhka ja njálmmálaš árbevierru. (Kuokkanen 2009: 49.) Mikkel Nils Sara cállá ahte máhttovuođđu lea dieđalaš ságastallama oktavuođain čilgejuvvon mat dasa gullet, nugo dieđut, čehppodagat, bargovuogit ja obanassii duogáš jurddahanvuogit mat leat viidáset fievrreduvvon buolvvaid servvoštallamiin ja ovttasbargguin ja lea fievriduvvvon muitaleami, muitalusaid ja bargguid bokte. (Sara 2010: 42-49.) Solveig Joks deattuha dan, ahte sámi mánát ohpet sámi árbevieruid bargguid ja vásáhusaid bokte. Viidáseappot ahte ovdalaš áiggi ohppe mánát árbevieruid bargguid bokte go sii ledje mielde buot bargguin ja doaimmain. Go mánná beassá bargguid bokte oahppat de dat muitá buorebut doaimmaid ja doahpagiid. (Joks 2008: 24.)

Buot dát namuhuvvon dutkit leat ovta oaivilis go dadjet ahte árbevierru lea eallán buolvvas bulvii ja dáinna lágiin lea seilon otnážii bargguid ja vásáhusaid bokte. Jannok Nutti lea duktan mo oahpahusas sáhttá bargat matematihkain vai oahpahussii šaddá sámi perspektiiva. Son oaivvilda ahte matematihkaoahpahus galgashii vuodú viežżat sámi árbevirolaš dieđus ja máhtus danne go sámi matematihkka lea ovdánan sámi beaivválaš birgejumi bokte. (Jannok Nutti 2009: 107-108.) Jannok Nutti dutkan lea ávkkálaš ja mavssolaš, ja leage dehálaš dán áiggi ohppiide oahppat sámi árbevirolaš matematihka. Dat, danin go muhtin oahppit soitet buorebut ipmirdit vattis matematihka go ožzot dan čilgejuvvot iežaset sámi oaidnin ja ipmirdan perspektiivvas.

2.1.1 Muitalan- ja njálmmálaš árbevierru

Muitalanárbevierru lea dološáiggi rájes juo leamašan stuora oassi sápmelaččaid eallimis, muitalusaid ja máidnasiid gaskkusteami dáfus. Muitalanárbevieru bokte leat mii beassan oahpásnuvvat sápmelaččaid historjái, kultuvrii ja sin beaivválaš eallimii. Muitaleapmi ja máinnasteapmi lei stuora oassi sámi mánáid eallimis ájanassan ja guoimmuheamis. Ovdalaš áiggi ledje sámiin dušše njálmmálaš muitalanvierut ja čállojuvvon girjjit eai oba gávdnon ge. Muitalusat ja máidnasat muitaluvvojedje olbmos olbmui, ja nu dat seailluhuvvojedje buolvvas bulvii. Njálmmálaš árbevierru lea sámi girjjálašvuhta ja historjá. Dávjá muitaluvvo ja deattuhuvvo eamiálbmogiid historjjás dat, ahte báikkiid birra lea dehálaš muitalit ja dasto

maiddái dan makkár čanastagat olbmuin leat dihto báikkiide. (Kuokkanen 2009: 60-65). Máinnasteapmi lea leamašan, ja lea ain buot álgočearddain hui dehálaš árbevierru ja diehtogáldu. Muitalusaid sáhttá atnit buot áššiid vuolggaheaddjin. Máinnastanárbevierru lea ođđasit áiggi girjjálašvuoden álgua. (Gaski & Solbakk 2002: 18.) Sámi muitalanárbevierru guorahallá áššiid, mat gusket sámiid árgabeaieallimii ja birastahttá lundui. Buot dovdoseamos sámi máidnasat ja muitalusat, mat muitaluvvojut iešguđetge guovllus, leat stáluid, gufihttariid, ulddaid, čuđiid ja noiddiid birra. Dutkiid mielas dát seammás gullet sámi muitalanárbevieru boarráseamos geardái. (Hirvonen 2018: 8.)

Eamiálbmogiin lea álo leamaš njálmmálaš árbevierru guovddážis ja adnojuvvo álbumoga girjjálašvuohtan ja historján. Muitalusaid, máidnasiid, luđiid, lávlagiid ja daguid bokte sii muitalit geat sii leat, mo lea sin eallin ja árbevierut. Oarjemáilmimi dutkit biehttalit dan, go sii oaivvildit ahte fearánat mat leat muitaluvvon eai doala deaivása go eai leat čálalačcat duođaštuvvon, ja eai leat jáhkehahttit go eai leat dokumenterejuvpon čállosiiguin.

(Kuokkanen 2009: 50-62.)

Go máinnas muitaluvvo nuppis nubbái, de sáhttá máinnas veahá rievdat juohke háve go muitaluvvo. (Kuokkanen 2009: 66-67.) Dat sáhttá rievdat ja muddejuvvot geasa muitaluvvo, ovdamearkka dihte unna mánážiidda, stuorit mánáide ja rávis olbmuide.

Go girječállit čálligohte mánáidgirjjiid 1970 logus, de lei njálmmálaš árbevierru vuodđun mánáidgirjjálašvuhtii. Sámiid njálmmálaš árbevierru lea juhkkjuvpon golmma oassái; njuolggosánálaš, oanehis árbevierru ja árbevierru mii lea diktahámis. Njuolggosánálaš árbevieru vuollái gullet ge muitalusat, máidnasat ja myhtat. Oanehis árbevirrui gullet sátnevádjusat, hoahkamat, árvádusat ja buddestatnamat. Diktahámät árbevieru vuollái gullet fas juigosat ja lávlagat (Hirvonen 1999: 75, 2014: 3.)

Eamiálbmogiid oainnu mielde lea máinnasteapmi ja muitaleapmi dehálaš oassin sin eallimis danne go daid bokte sii muitalit geat sii leat ja gosa sii gullet. Máinnasteami bokte oahppá máttuidis ja sin eallima birra, málmmi oainnuid, bargguid, vieruid, árvvuid ja sin beaivválaš birgejumi birra. Njálmmálaš árbevieru sánit ja doahpagat eai dušše ovddas mearkkašumi, muhto dain lea erenoamáš fápmu maiddái ráhkadit ja nuppástuhhttít duođalašvuoden.

Njálmmálaš árbevierru ii leat dušše álbumogiid “girjjálašvuhta”, muhto maiddái sin “historjá” sin iežaset eavttuid mielde. Eamiálbmogiid “dieđa” lea ovdamearkka dihte gávdnamis

máidnasiin. Máidnasat leat leamaš ja leat ain min “teorijat” jos galgat atnit oarjemáilmimi doahpagiid. (Kuokkanen 2000: 24-27.)

Muitalanárbevierru ii leat vel jávkan olbmuid gaskkas, muhto dat sáhttá jávkat jus olbmot eai šat muijal muijalusaid, go dán áiggi leat nu ollu eará fálaldagat boahtán mánáide, mat gáržžidit ja geasuhit ovdalii gullat muijalusaid ja máidnasiid. (Vuolab 1995: 28-29).

Muitalanárbevierru lea leamaš guovddážis sámi bajásgeassinvugiin. Váhnemat ja fuolkkit oahpahedje ja nevvodedje mánáideaset muijalusaid bokte. Máidnasiid ja muijalusaid bokte ohpppe mánát njuolggadusaid, árvvuid ja dan morála maid rávis olbmot háliidedje oahpahit boahtte bulvii. Muitalanárbevierru lea erenoamáš buorre, danne go dan bokte oažžu vásáhusaid ja sáhttá váikkuhit oktavuođaid olbmuid gaskkas. Muijalusain sáhttá maid oahpahit ja neavvut máná rievttes guvlui, iige dárbbat gieldima ja huššama bokte máná neavvut ja gieldit. (Balto 1997: 50.) Nuppe dáfus oaivvildetne máidnasiid ja muijalusaid maid jávkkodit jus eai čállojuvvo girjjiin. Vuorasolbmuid, geat máhttet dološ máidnasiid ja muijalusaid, galggašii jearahallat ovdal go sii jávkkodit vai beassá čállit báikkálaš muijalusaid ja máidnasiid girjin.

2.1.2 Jávohis ja árbevirolaš máhttu

Jávohis máhttu lea máhttu maid lea vásáhusaid bokte ožžon, oahppan ja lea máhttu ja diehtu mo čađahit bargguid. Doahpaga almmuhii dutki Polanyi vuosttaš geardde 1966:s ja čilgii dan ná: “Olmmoš diehtá eambbo go sáhttá muijalit.” (Fredriksen 2012: 44-52). Dat máksá dan ahte jávohis máhttu lea sániid haga, mii dagaha dan váttisin čilget sániiguin. Dávjá lea dat persovnnalaš máhttu ja lea čadnon vásáhusaide, guottuide, dovdduide ja hutkosiidda. Jan Henry Keskitalo meroštallá doahpaga jávohis máhtu, ja son oaivvilda dan leat čielgasit čadnon máhttui ja vásáhusaide. Son lohká ahte oahppan dáhpáhuvvá giela bokte. (Keskitalo 2009: 65.)

Harald Gaski fas čállá ahte máhttu lea juoga maid don oaččut vásáhusaid bokte. Son lohká “*ahte mun máhtán sámegiela, ii ge mun dieđán sámegiela*” (Gaski 2012: 41). Dán sáhttá dulkot ahte, go máhttá juoidá, de sáhttá dan bargat ieš ja maid oahpahit earáide. Kuokkanen ges ii earut doahpagiid *máhttu* ja *diehtu* dásiid gaskka. Son lohká eamiálbmot diehtu sistisdoallá buot dieđu mii gullá dihto álbmogii ja guoská dihto birrasii nugo iešguđetlágán dieđalaš, teknihkalaš, ekologalaš, vuoiŋŋalaš ja kultuvrralaš diehtu (Kuokkanen 2009: 49).

Mikkel Nils Sara čállá ahte árbevirolaš máhttu lea čadnojuvvon birgejupmái. Árbevirolaš máhttu lea dávjá čadnojuvvon olbmuid ealáhussii, nugo boazodollui, eanandollui, meahcásteapmái ja nu ain eará. Sara maid lasiha soabalašvuhta lea dehálaš go galgá mearrádusaid soabadit birrasis ja dása čatnasa ge árbevirolašmáhttu ráddádallat, gulahallat ja muitalus gaskkusteami bokte. (Sara 2003: 124-127.) Jan Henry Keskitalo lohká:

Máhttu eallá olbmo bokte ja nu olbmo doaimma dahje dagu bokte. Máhttu lea dego teaksta mii dađistaga muddejuvvo ja dego ságastallan mas leat iešguđetlágán dásit ja oasit. Árbevirolaš máhtu oahppá bargguid bokte, ja sáhttá maid báikkálaš, sáhttá jávohis máhttu mii fievriduvvo buolvvas bulvii eahpeformála vugiiguin ja lea njálmmálaš. (Keskitalo 2009: 65.)

Go moai jearahalaime oahpaheddjiid, de väsiheimme ahte máŋgasis sis lei ollu jávohis máhttu árbevirolašvuoden ja árbemáhtu birra. Dat bođii bures ovdan go jearahalaime sin, go sis ledje nu ollu lassi dieđut maid sii muitaledje áššiid birra, maid ean oba jearahallange. Dáid birra letne čállán eambbo kapihtal njelježis.

2.2 Sámi čáppagirjjálašvuhta

Leat ollu vejolašvuoden dutkat girjjálašvuoden, muhto moai letne válljen, ja gáržzidan dutkat máinnasvuoden čáppagirjjálašvuoden mii sistisdoallá muitalusaid ja máidnasiid.

Máidnasat leat njálmmálaččat muitaluvvon fearánat, ja leat dávjá áigeájanassan muitaluvvon mánáide. Juohke álbmoga folklores leat viiddis ja iešguđetlágán máinnasčoakkáldagat. Jagis 1897 álggi Just K. Qvigstad čohkke sámiid máidnasiid ja muitalusaid, oktiibout 2373 siiddu. (Hirvonen, 2014: 25, 2018: 69.) Qvigstada čoakkáldat lea buot buoremus gáldu sámi muitalusaide ja máidnasiid dáfus. (Gaski & Solbakk 2004: 10).

Sámis eai leat nu čielga earut leamaš mii lea máinnas ja muitalus, muhto aŋkke leat dutkit ráhkadan earuid dan guovtti muitalanvuohkái. Dávjá lea muitalus juoga man birra, mii lea duođas dáhpáhuvvan, muhto sáhttá veahá rievddadit muitaleaddjis nuppi muitaleaddjái. Váldoássi ii gal rievdda. Máidnasis ii dávjá namuhuvvo dáhpáhusaid báiki, ja álggahuvvo dávjá ovdamearkka dihte “Áigá dološáiggi” dehe “*De lei muhtin ulddaáhkku*”. Dávjá

máidnasa oasheváldiin ii leat namma ja daddjo dávjá muhtin nieiddaš dehe áhkku ja nu áin. Máidnasis leat maid dávjá elliin olbmo hápmi, dat hupmet, leat sáŋgárat ja máhttet visot. Máidnasa muiṭalanstiila lea njuolga, ja ii leat nu guhkki. Muitaleapmi doalvu čađat válđodáhpáhusa guvlui ja lea gelddolaš. Agi dáfus leat dutkit gávnahan ahte máidnasat leat boarráseappot go muiṭalusat. Máidnasat eai leat goassege jáhkkojuvvon duohtan nu mo muiṭalusat leat. Máidnasat leat nu áigá ilbman, ahte ii leat sihkar man áigá, muhto aŋkke áigá dolin. (Hirvonen, 2014: 25-26.) Gaski ges lohká ii leat nu buorre earuhit ja dahkat dárkilis erohusa mii lea máinnas ja mii lea muiṭalus. Válđoerohus gal lea leamaš muiṭalusas lea duohtha vuodđu ja máinnas lea dahkkon muiṭalus man ii sáhte čatnat áigái ja báikái. (Gaski & Solbakk 2004: 11.)

Vuosttaš girji mii almmuhuvvui sámegillii lei *Muiṭalusat sámiid birra* maid Johan Turi čálíi 1910:s boazosápmelaččaid birra. Girji lea jorgaluvvon máŋgga gillii, ja šattai dovddusin ja beakkálmassan Eurohpás 1910-1930 logus, ja erenoamážit antropologat, etnográfat ja oskkoldatdutkit beroštišgohte das. (Hirvonen 2018: 82.)

Girjjálašvuhta lea girjái. Girječálli sáhttá ieš hutkat ja jorahit fearániid nu mo ieš háliida. Muhto jus galggat nanu sámi girječállin ovdánit, de ferte dus alddát nanu geađgejuolgi manala hukset buot jáhkehahtti muiṭalusaid ja fearániid. Girječállis ferte leat árbevirolaš máhttu ja diehtu man vuodul hukse fearániid, nugo ovdamearkka dihte ságastallamat, luodit, lávlagat, sátnevádjusat, diiddat, muiṭalusat ja máidnasat. Vuolab lohká buot dát namuhuvvon eavttut nannejit eatnigiela, mii fas dagaha dan ahte girječállis lea máhttu ja diehtu čállit vuđolaš árbevirolaš fearániid. (Vuolab 1995: 27.)

Kuokkanen čállá ahte eamiálbmogat leat eallán ja viežžan birgejumi luonddus, ja sin diehtu boahtá doppe. Dat diehtu lea seailluhuvvon máŋgga sohkabulvii áiggiid mielde, ja lea dađistaga ođasmahttojuvvon. Dasa čatnasage eamiálbmot pedagogihkka, dat ahte mánát leat oahppan go leat čuvodan ja áđdestallan rávisolbmuid bargguid ja doaimmaid. Oahpahus dáhpáhuvai njálmmálaš árbevieru bokte, nugo iešguđegelágán muiṭalusat ja máidnásat mat oahpahit historjjá, báikenamaid, fuolkevuodá, morála, árvvuid birra ja nu ain. (Kuokkanen 2009: 44-45.)

Vuolab maid lohká máidnasiin boahtit ovdan ollu diehtu árbevirolaš sámi bargguid birra, nugo boazodoalu, eanandoalu, oagguma, mehcii lubmema ja nu áin eará bargguid birra.

Dákko bokte besse mánát gullat bargguid birra ja oahppat bargguid muitalanárbevieru bokte. Muitalusat leat adnojuvvon oahpaheaddjin ja maid áigeájánassan. (Vuolab 1995: 35.) Dat lea dehálaš dovdat sámi kultuvrra ja árbevirolašvuoden, giellamáhtu ja girjjálašvuoden metodaid birra, go galgá teakstaáddejumi ipmirdit čállimis ja lohkamis. (Gaski 1997: 210)

Lea mávssolaš ahte girječálliin lea oahppu ja máhttu iežaset eallima, árbevieruid ja kultuvrra birra danne go sii galget fas daid dieđuid ja máhtu máhttut ovddastit girječállima bokte sihke mánáide ja rávisolbmuide ja nu muitalusaid bokte leat mielde oahpaheami máttuideaset árbevieruid. Moai navde sámi girječálliide leat mánnávuoden báikkit divrasat danne go dat lea sin ruoktu ja lea oahpis sidjiide, ja dávjá háliidit ge čállit daid birra. Nu vásihit mii maid min lagas báikkiin Sámis. Dávjá muitaluvvojut muitalusat oahpes báikkiid birra, ja leat sámi namahusat eatnamiin ja jávrriin mat leat dolátdovle juo ožzon dáid namahusaid ovddit buolvain geat leat eallán ja bargan dain báikkiin. Kuokkanen lohká vierrasat navdet ahte sápmelaččain ii leat leamašan girjjálašvuohta ovdal go mis almmustuvvogohte sámegielat girjjit. Muhto mis han lea leamašan girjjálašvuohta doloža rájes, ja mis lea ain dal ge hui rikkis njálmmálaš máinnastanárbevieru. (Kuokkanen 2000: 25.)

Sámi girječállit geat čállet sámi čáppagirjjálašvuoden girjjiid, erenoamážit sámi kultuvrra ja árbevirolašvuoden birra, fertejut dovdat ja diehtit daid fáttáid. Nu deattuha professor Harald Gaski, go son lohká lea dehálaš ahte sámi girječálliin lea kulturduogáš, sámi giellamáhttu ja máhttu girjjálašvuoden metodaid birra jus galgá máhttut čállit teavsttaid mat leat ipmirdahti. Seamma dehálaš lea dat ahte girječállis lea ipmárdus kontekstii mii mearkkaša dan, ahte sus lea máhttu ja diehtu kultuvrra siskkáldasvuuhit. Dat lea dehálaš dovdat sámi kultuvrra ja árbevirolašvuoden, giellamáhttu ja girjjálašvuoden metodaid, go galgá teakstaáddejumi ipmirdit čállimis ja lohkamis. (Gaski 1997: 210.) Leat dutkit geat maid deattuhit dan seammá, ahte dus ferte leat árbevirolaš diehtu ja máhttu go galgá ollislaččat dovdat ja ipmirdit árbevirolašvuoden nugo mat bargguid, vieruid ja oskku. Danne lea dehálaš ahte girječálliin lea diehtu ja máhttu, jus galgá máhttut čállit sámi árbevirolaš muitalusaid ja máidnasiid. (Fredriksen 2012: 41-47).

2.2.1 Sámi mánáidgirjjálašvuohta

Marry A. Somby lei vuosttás gii čálii sámi mánáidčáppagirjjálašvuoden girjji; *Ámmol ja alit oarpmealli* almmuhuvvui 1976:s. Muitalus lei uldanieidda ja olbmo bártni birra. Girji lei

vuosttaš girji masa ledje sárgojuvvon ivdnás govat ja dat buvttii ollu vejolašvuodaid sámi dáiddáriidda almmuhit iežaset dáidagiid. Sámi mánáidgirjjálašvuoda vuodđu lea dološ njálmmálaš árbevierru, ja leage vuodđu sámi mánáidgirjjálašvuhtii, go girječállit álge čállit girjjiid 1970-logus. (Hirvonen 1999: 75).

Govvadáidda mánáidčáppagirjjálašvuhtii lea maid ilbman seamma áigodagas go sámi mánáidčáppagirjjálašvuhta 1970 logus, ja sáhttáge lohkat sámi mánáidgirjjálašvuhta ja govvadáidda leat nuorat. (Hirvonen 2005: 45.) Sámemánáid govzagirjjiide gáibiduvvo sápmelaš dáiddár danne go son hálldaša ja diehtá sámi árbevieruid ja sus lea máhttu ja diehtu sárgut govaid sámi eallima ja kultuvrra birra. Ylimartimo oaivvilda sámemánáid govzagirjjiide gáibiduvvo sápmelaš dáiddár danne go son hálldaša ja diehtá sámi árbevieruid ja sus lea máhttu ja diehtu sárgut govaid sámi eallima ja kultuvrra birra. (Ylimartimo 2000: 90-91). Gunvor Guttorm lohká gákti muitala gullevašvuoda, makkár báikái, sohkii ja čearddaide gullá. Dáinna lágiin ohpet mánát earuhit sámi biktasiid gullevašvuoda, bivtas earuheapmi sohkabelliin, ja makkár lassi oasit gullet bivttasteapmái, nugo gáktái, beskii, dálve- ja geassebiktasiidda govaid bokte (Guttorm 2007: 85-87).

Mánáidčáppagirjjálašvuoda girjjit leat girjjit mat leat heivehuvvon mánáide, mii lea mánáid birra, dehe leat dakkár fáttáid birra mat geasuhit mánáid. Dávjá mánát liikojit lohkat dakkár girjjiid maid persovnnat lea seamma boarrásat go ieža lohkkit dahje veaháš boarráseappot go sii ieža. Dávjá lea fáddá mánáidčáppagirjjálašvuoda girjjiin dakkár mánnálaš orohagaid ja elliid birra, maiguin mánná sáhttá iežas identifiseret. Rávisolbmot sáhttet muhtomin leat fearána váldopersovnnat, muhto de leat sii dávjá mánnálaččat (Stokke & Tønnesen 2018: 19-20.) Das sáhttá namuhit váldopersovnna Áhkubiebmu girjjis, gii lei buorredáhton, juonalaš ja siivui, ja gii lei áhku biebmobárdni. Jus galgá gohcoduvvot mánáidčáppagirjjálašvuoda girjin, de ferte leat dakkár girji mii geasuha máná. Girji ferte leat dakkár mainna mánná sáhttá iežas identifiseret, fáddá mii oahpaha eallima birra nugo ovdamearkka dihte Áhkobiebmu, gii lei boares áhku biebmobárdni. Áhkobiebmu birgii bures vaikko lei oarbbesmánná ja geafi, ja suinna manai bures go barggai riekta buot bargguid ja lei vuoiggalaš. (Palismaa 1995: 1-33.)

Moai gal oaivvildetne sámi mánáidgirječálliin lea dehálaš bargu ovddidit sámi árbevieruid ja kultuvrra čállosiid bokte go čállet girjjiid. Lea maid dehálaš munno mielas ahte sii čállet čáppagirjjálašvuoda girjjiid main lea sámi árbevierru vuodđun ja dainna lágiin seailluhit ja dokumenterejit čállosiid bokte daid boahttevaš buolvvaide. Gaski čállá girjjistis sápmelaččat dávjá muitalus vuolggahuvvo dološ máidnasiin ja muitalusain, muhto heivehuvvo nu ahte dat

heive otná dillái ja lea oahpis mánáide. Lea maid dehálaš mánáide muitalit dálaáiggi birra, nu ahte ii leat beare dološáiggi birra danne go dat šaddá mánáide amas go eai leat goassege dan dilis leamašan. Gaski maid lohká buorre heivehit dološmáidnasiid otná sámeeallimii, vai šaddet gelddolaččat ja áigeguovdilis fearánat maid sámi mánát bessel lohkat. Čájehuvvo ahte gávdnojit unnán girjit ja áigeguovdilis sámegielat lohkosat mánáid várás ja mat muitalit dan beaivválaš eallima birra, mas min mánát ellet odne. Nuppe dáfus leat gal dan dihte ilbman ollu mánáidgirjjit daid manjimus jagiid mat leat heivehuvvon mánáid otná eallindilálašvuodáide. Dakko dáfus leat girječállit vuhtiiváldán ovddidit sámiid árbevieruid ja kultuvrra. (Gaski 1993:161.) Jansson maid lohká gávdnot unnán sámi girjiid buot geavahansurggiin, ja nu son ballá nuoraid massit giellamáhtu ja čállinvugiid jus sidjiide eai leat doarvái girjjit mat leat geasuheaddjít lohkat. (Jansson 2002:112-114.)

Sámedikki ruovttusiidduin boahtá ovdan ahte lágádusat almmuhit jahkásaččat unnán sámi girjiid, ja dat guoská buot šánjeriidda, olahujoavkkuide ja gillii. Leat sullii 20-25 sámegielat girji mat almmuhuvvojít juohke jagi. Sámediggi addá jahkásaččat doarjaga girjelágádusaide danne vai bessel almmuhit sámegielat girjiid. Norggabale Sámediggi lea measta áidna ásahus mii doarju 100 % girjealmmuhemiid. Sámediggi lea maid gulahallan Sámi girječálliid servviin, ámmát jorgaleaddji ásahusaiguin ja visot sámi lágádusaiguin Norggas. Juohke jagi juolluda Sámediggi doarjaga sullii 20-25 girjái čáppagirjjálašvuodás ja fágagirjiide dehe app`aide. Dássázii lea unnán beroštupmi leamašan fuomášuhttit sámi girjjálašvuoda nationála ja davviríkkalaš median mii mielddisbuktá dan, ahte sámi girjjit eai olahuvvo stuorit málbmái. Lea dehálaš beassat lohkat girjiid iežas eatnigillii. (Sámediggi 2017.)

Sámi mánáidgirjjit mat leat ilbman daid manjemuš áiggiid leat čállojuvvon iešguđetge suopmaniidda. Hupmagielain leat erohusat guđege guovlluin ja sosiála birrasiid ektui. Go ohppiide lohká girjiid mat eai leat čállojuvvon oahppi suopmanii, de lea dehálaš čilget oahppái sániid ja doahpagiid málvssolašvuoda, vai oahppit ožžot ipmárdusa girjji oppalaš sisdollui. Daid iešguđetge suopmaniid hupmangielas leat sosiolekta ja idiolekta. Sosiolekta lea hupmangiella ovttá birrasis, dat mearkkaša dan birrasis, sogas dehe bearrašis, ealáhusain, ja nuoraid gaskkas. Idiolekta lea ge fas ovttaskas olbmo hupmangiella, dávjá lea dat olmmoš ieš ráhkadan sániid. (Palismaa & Eira 2001: 12-13.)

2.3 Sosiokultuvrralaš oaidnu

Doaba sosiokultuvra máksá sosiála ja kultuvra, ja mearkkaša oahppan huksejuvvo sosialiserema bokte ovta kultuvrras, ja lea ovdamonni oahppamii. Sosiokultuvrralaš oahppanteoriija vuolggasadji lea konstruktivismmas, muhto sosiokultuvrralaš oahppanteoriija deattuha ahte oahppan dáhpáhuvvá go servvoštallá eará olbmuiguin. Dattetge ii nu mo konstruktivismmas, ahte olmmoš ferte ieš hukset alccesis oahpu. Dan oainnu mielde ii sáhte addit oahpu iežas oaivvis nuppi oaivái. Buot oahppu maid juohkehaš lea huksen alccesis, váldojuvvo hávdái mielde. Juohke olmmoš ja buolva ferte odđasit hukset oahpu alcceaseaset. Hinna čujuha dovddus ruošša dutki Lev Vygotsky (1896-1934), lei eanemus dovddus sosiokultuvrralaš oahppama oainnus, maid son ovdánahtii. Son namuha njeallje vuogi mot oahppan dáhpáhuvvá. Sosiokultuvrralaš oahppanteoriija geahčastagas leat njeallje čilgehusa mo oahppu dáhpáhuvvá. Dán njeallje oahppanoainnu letne heivehan mo sámi girjjálašvuoda bokte sahttá oahppat sámi árbevieruid ja sámegiela.

1. **Vuodđu oahppamii lea servvoštallat eará olbmuiguin:** Oahppan dáhpáhuvvá go servvoštallá eará ohppiiguin. Go oahppit bessel eará olbmuiguin bargat fárrolagaid nugo lohkat sámi girjiid, dramatiseret sámi muitalusaid, ráhkadir sámi árbevirolaš reaidduid, luđiid ja lávlagiid. Visot dát namuhuvvon oasit nannejit oahppaneavttuid sosiálakultuvrralaš oahppan teorijas dan vuosttaš oasis.
2. **Oahppan dáhpáhuvvá daguid ja vásáhusaid bokte:** Oahppan dáhpáhuvvá daguid ja vásáhusaid bokte go oahppit bessel bargat sámi árbevirolaš bargguid ja dramatiseret muitalusaid maid leat lohkan.
3. **Oahppan gaskkustuvvo psyhkalaš ja fysalaš doarjagiid bokte. Giella lea dat buot deháleamos psyhkalaš oahppanreaidu oahppanproseassas:** Oahppan giela ja reaidduid bokte. Go oahppit ságastallet ovttas ja atnet reaidduid dramatiseremii duođašta ahte sámegiella ovdána go bessel ságastallat sosiála ovttastallamiid oktavuođas. Barggut ja vásáhusat ja dábálaš ovttastallan earáigui leat mielde ovdánahttime oahppat árbevirolaš doahpagiid. Vygotsky deattuha ahte kultuvrralaš servvoštallamiid bokte oahppá oahppi odđa doahpagiid ja ovdánahttá daid.
4. **Oahppan lea juhkkojuvvon ovta kultuvrra oasseváldiid gaskkas:** Oahppan lea juhkkojuvvon oasseváldiid gaskkas sámi kultuvrras. Dat mearkkaša ahte, go árbevirolaš oahpu juogadit eará oasseváldiid gaskkas, de ráhkaduvvo/hábmejuvvo lassi oahppu.

Oahppit gávdnet searválagaid čovdosiid váttisvuodžaide.

(Hinna ja earát 2016: 784).

Vuosttaš čilgehus dasa mo, vuosttáš oahppama vuodžu lea, servvoštallat eará olbmuiguin, ja dan sáhttá čilget dainna lágiin ahte oahppan ii dušše dáhpáhuva earáiguin servvoštallat, muhto dat leat dat mii váikkuha oahppamii. Dan gohčodit maid sosiálakonstruktivisman ja máksá dan ahte oahppan dáhpáhuvvá go ovttastallá seamma kultuvrra olbmuiguin. (Hinna ja earát 2016: 783-785.) Nubbi čilgehus oahppamii lea nuppát. Oahppan dáhpáhuvvá daguid ja vásáhusaid bokte. Dan sáhttá ná čilget; Oahppan dáhpáhuvvá dihto báikkis dahje ovttá dagus, mii ferte leat realisttalaš dahje albma bargu. Ovdamearkan dasa sáhttá leat dat go galgá oahppat bohccó njuovvat árbevirolaš málle mielde. Dat lea dakkár bargu maid ii oahpa jus dušše čilgejuvvo luohkkálanjas. Čájehuvvon lea ahte olmmoš oahppá buot buoremusat jus beassá searvat bargguide mielde. Go oahppit leat mielde ja oassálastime árbevirolaš bargguide, de dat addá oahpu ja bargovásáhusaid go oaidná mo barggut bargojuvvoyit. Goalmmát čilgehus oahppamii lea, oahppan boahtá gaskkusteami bokte, sihke psyhkalaš ja fysalaš doarjagiid ja reaidduid bokte. Giella lea buot deháleamos psyhkalaš oahppanreaidu oahppanproseassas. Fysalaš oahppanreaidun sáhttet leat eará reaiddut nu go ovdamearkka dihte girjjit, suohpan, niibi ja lišsá. (Hinna ja earát 2016: 785.) Giella lea sosiála reaidu gulahallamis ja oahppama vuodžu meinii Vygotsky. (Bråten 1996: 101-102). Doahpagiid ferte oahppat ja go daid lea oahppan, de sáhttá mannat viidáseappot oahppamiin. Daid ođđa doahpagiid maid lea oahppan sáhttá fas čatnat daidda iešguđegelágán vásáhusaide mii veahkeha giela rádjet ja buorebut muitit doahpagiid. Spontána doahpagat ovdánit buot buoremusat dábálaš sosiála ovttastallamiid ja vásáhusaid bokte. Barggut, vásáhusat, reaiddut ja dábálaš ovttastallamat earáiguin leat mielde ovdánahttime árbevirolaš doahpagiid oahppama. Máná vásáhusaid kultuvrralaš servvoštallamiin leat dehálaš oassin dasa go galgá oahppat ođđa doahpagiid ja ovdánahttit daid. Majemus čilgehus oahppamii lea njealjádas, oahppan lea juhkojuvvon osseváldiid gaskkas ovttá kultuvrras. Dat mearkkaša dan ahte olbmot leat iešguđetlágánat, sihke máhtu ja oahpu dáfus. Jus máhtus ja oahpus juogada earáiguin, de dalle hábmejuvvo ođđa oahppu. Dainna ođđa oahpuin ja máhtuin šaddá álkibut čoavdit ja gávdnat čovdosiid váttisvuodžaide. Dat vuohki heive bures oahpahallanmállen skuvlii danne go dat lea riggodahkan buot ohppiide sihke dalle go beassá juogadit ja addit oahpu ja máhtu earáide, erenoamážit sámi árbevirolaš bargguid oahppamis. Eará maid Vygotsky oaivvilda de dárbbaha oahppi doarjaga oahpaheaddjis, álggahit bargguid, muhto oahppi galgá ieš iešheanalaččat bargat go lea ožžon neavvagiid oahpaheaddjis. oahpaheaddji

galgá dassalit oahppi go oaidná oahppi ii orro nákcemé bargat. (Lyngsnes ja Rismark 2007: 64.)

2.4 Girjjálašvuoda didaktihkka

Doaba didaktihkka boahtá greikagielas, ja muiatala oahppama, digaštallama ja duođašteami birra skuvladilis. Norggas lea doaba didaktihkka árbevirolaččat gohčoduvvon oahppu oahpahusa ja bajásgeassima birra. Didaktihka doaba muiatala *mii, manne ja mot*. Dat mearkkaša dan ahte oahpahus galgá lágiduvvot buot buoremusat ohppiide, mii lea fáddá oahpahusas, manne oahppat dan ja mo oahppat. Didaktihkka lea ge oahpaheaddji deháleamos oahpahanreaidu oahpahusas. (Røys ja earát 2007: 25.)

Oahpahusa galgá heivehuvvot ohppiide mii lea májggabealat, buriid ja mavssolaš vásáhusaid, mii ávkkalaš ja oahpis. Dát boahtá ovdan oahppoplána ođasteamis mii boahtá fápmui čakčat 2020. (Oahpahusdirektoráhtta 2019).

Lea mavssolaš ohppiide oahppat árbevieruideaset ja kultuvrraset birra skuvllas, dan mii sámi mánáide lea oahppis ja mainna sáhttet iežaset identifiseret. Buot dát bealit galget ohppiide addit oahpanvejolašvuodaid oadjebas oahpanbirrasis ja main vuodđu lea sin sámi vuolggasajis. Láhčit oadjebas dili ohppiide lea mavssolaš, ja nu lea maiddái ráhkkanahittit ohppiid oahpahussii vai olaha buori oahpahusa čađaheami. Dan dáfus leage dehálaš čađahit fáddáságastallama ohppiigui bargguid álgaheames, nugo oahpásnuhttut ohppiide mii lea váttisvuoda čuolbma ja fáddá, maid lohkat ja bargat. Viidáseappot lea maid dehálaš movttiidahttut ohppiid bargui ja oahpaheaddji sáhttá gulaskuddat makkár diehtu ja máhttu lea ohppiin fátta birra, ovdamemarkka dihte sámi árbevieruid birra. (Halvorsen 2001: 21-35.)

Smávvaskuvladási oahppit dávjá háliidit muiatalit vásáhusaideaset birra eará ohppiide, nu go dan jus leat gullan muiatalusa mii lei geasuheaddji ja suohtas. Ohppiide lea dehálaš čállit, lohkat ja ságastallat oktanaga. Dávjá oahpaheaddjit atnet ságastallama bargoreaidun maid sii gohčodit *gaskkustanmetodan*. Das lea ulbmil ságastallat fátta birra, oahpásnuvvat ja čilget doahpagiid ohppiide ja muiatalit dáhpáhusaid birra fearanis dahje girjjis. Ságastallan sáhttá čađahuvvot juogo olles ohppiidjoavkuin, dušše muhtin ohppiigui, guoktásiin dehe ovttain oahppiin. Ságastallamis galgá leat struktuvra, ja nu álgu ja loahppa. Hennig oaivvilda ahte lea dehálaš ahte oahpaheaddji jođiha ságastallanoasi vai oahppit eai spiehkas fáttás man birra galget ságastallat. Jus oahppit galget iehčanassii jođihit ságastallama, jearahallat guhtet

guoibmáseaset, de sáhttá analysastrukturuvra láhppot ja oahppit seahkanit eará ságastallamiidda. Oahpaheaddji bargu lea ohppiid ”bidjat johtui“, ja de veahkehit ohppiid fuomášuhttit ja jearahallat mot gávn nahit čovdosiid áššiide, movttiidahttit ja evttohit. Oahpaheaddji galgá leat okta oasálaš ságastallanjoavkkus, ja son ii galgga čájehit ahte son lea oaivámuš dahje oahpaheaddji, muhto geahččalit leahkit dego okta oasálaš ságastallanjoavkkus. Dakkár ságastallan lea dehálaš ohppiide gávn nahit dihte mii lea fearán, mii dagaha fearána gelddolažžan, ja makkár sisdoallu lea fearánis nu go mat olmmošoaidnu ja árvvut. Ságastallamis lea maid dehálaš gávn nahit ja digaštallat gažaldagaid ja vástádusaid (Hennig 2011: 177-179.)

Oahpaheaddjis lea stuora ovddasvástádus leahkit kulturguodin skuvllas buot dilálašvuodain ja oahpahusa oktavuoðas. Juohke oahpaheaddjis lea iežas persovnnalaš kultuvra mainna son manná skuvlii, ja sáhttá dávjá báidnit ohppiid iežas oainnuiguin, vieruiguin ja dábiiguin. Dat lea oassi maid oahpaheaddji ferte várrugasat hálldašit. Juohke oahppis lea iežas persovnnalaš identitehta ja kultuvra ja sáhttá mángga geardde hearkkes dilis go boahtá skuvlii. Danne lea dehálaš ahte oahpaheaddji lea várrogas, čájeha beroštumi ja atná arvvus juohke oahppi identitehta, kultuvrra duogáža ja eallima (Halvorsen 2001: 273.)

Girjjálašvuoda didaktihkas leat guokte namahusa ja sáhttá lohkat ahte dat lea oahppu ja máhttu girjjálašvuoda oahpahusas. Girjjálašvuoda didaktihkka muitala girjjálašfága sisdoalu, ulbmiliid ja čilgehusaid ja maid ja mo girjjálašfága sáhttá oahpahit ohppiide ja maid oahppit das sáhttet oahppat. Oahpaheaddjis gii galgá gaskkustit ohppiide girjjálašvuodafága ferte leat diehtu ja máhttu girjjálašvuodafágas. Son sáhttá gulaskuddat ohppiiguin ja gullat makkár ovdagáttut sis lea girjjálašvuhtii, maid sii leat lohkan ovdal, man ollu lohkan ja makkár girjjálašvuoda sii gohčodit čáppagirjjálašvuohtan. Oahpaheaddji ulbmil dákkár gulaskuddamiin lea iskat man ollu oahppit dihtet girjjálašvuoda birra ja nu dainna fágain boktit ohppiid beroštumi girjjálašvuhtii. Muhto ferte muittus atnit ahte oahppit galget beassat lohkat juohkelágán girjjálašvuoda girjjiid nugo servodaga birra, girjjiid maid sisdoallu lea juoga mainna sáhttet iežaset identifiseret, dološáiggi birra ja otnaáiggi birra. Oahppit galget beassat ieža gaskaneaset digaštallat teavsttaid ja jearrat manne ja mo juoga lea nie mo dat lea. Go vállje girjjálašvuoda girjjiid maid oahppit galget lohkat, de leat dávjá muhtun oasit maid oahpaheaddji geahččá; girjjis galgá leat kvalitehta, buorre giella, ahte sisdoalus lea struktuvra ja dan ahte oahppit sáhttet digaštallat girjji sisdoalu. (Skaftun & Michelsen 2017: 34-37.)

3 Dutkanmetoda

Doaba *metoda* boahtá greika sánis *methodos* ja mearkkaša “čuovvut mearriduvvon bálgá mollii” ja lea bargovuohki mainna čoavdá váttisvuodá čuolmmaid. Metodain čohkke, dulko, ja analysere dieđuid. (Johannessen ja earát 2016: 25.) Larsen govvida dan, go ovta fáttá galgá dutkat ja guorahallat, de ferte leat juogalágan metoda vuodđun maid atná dan bargui. Metoda lea dego dakkár veahkkereaidu maid dutki atná veahkkin gávnnahit čovdosiid gažaldagaide, ja maiddái hähkat ođđa oahpu ja dieđu fáttá birra. Metoda sáhttá lohkat dat lea dego dakkár vuohki movt mii viežżat dieđuid ja dulkot daid. (Larsen 2017: 17.)

Dán kapiittalis čilgejetne dutkanmetoda maid letne válljen, mii lea kvalitatiiva metoda, ja makkár materiála letne čohkken dutkamuššii. Dutkanmateriála lea maid jearahallan- ja jearahallama ofelašskovit maid letne hábmen. Moai letne válljen kvalitatiiva jearahallantuogi maid moai čilgejetne 3.2 kapiittalis. Jearahallamiin aniime jietnabáddenrusttega mainna báddiime jiena, ja maŋŋil transkriberiime jietnabáttiid. Das maŋŋil muitaletne makkár lassi materálaid letne atnán dutkamušas, ja de loahpas vel árvoštallamiid jákkehahttivuođa dieđuid ja etihkkanjuolggadusaid ektui ja makkár analyserenstrategiija letne geavahan dutkama oktavuođas.

3.1 Kvalitatiiva metoda

Kvalitatiiva metoda lea olbmuid dieđuid, máhtu ja vásáhusaid čohkken, ja daid dulkot ja buohtastahttit dutkiid teorijjaiguin. Dutkanbargguid álggadettiin lea dehálaš gávnannahit makkár dutkanvuogi heive atnit dutkanbarggus. Leat ollu dutkanmállet maid lea vejolaš válljet dutkanbargui, dávjimusat leat kvalitatiivvalaš ja kvantitatiivvalaš dutkanmállet mat adnojuvvojit dávjimusat dutkkusin. Dán dutkanbargui letne válljen kvalitatiivvalaš dutkanmálle. Kvalitatiivvalaš dutkamušas adnojuvvojit čállosat ja njálmmálaš gáldut mat addet dutkái vejolašvuodaid dulkot dieđuid. Kvantitatiiva dutkanmálle fas lea gávnannahit čovdosiid loguid/meriid bokte main fas ráhkadit statistikhaid, ja dakko bokte ožžot dieđuid. Kvalitatiivvalaš dutkanvuogis adnojuvvojit earret eará jearahallamat, ságastallamat, case iskosat ja notahtat. (Nyeng 2012: 71.)

Kvalitatiivva dutkanvuogi dovdomearkkat leat maid mo ipmirdit ja čilget máilmimi dutkánoasseváldiid perspektiivvas, ja gávnahit manne dáhpáhuvvá nuo dehe ná. Váldogáldut leat informánttaid dieđut maid dutki atná dutkanbarggustis gávnahit čovdosa dutkančulbmii. (Johannesen ja earát 2016: 95.) Kvalitatiivva dutkanvuogis lea lagas ovttasbargu dutki ja dutkánoasseváldiid gaskkas. Ulbmil dánna dutkanvugiin lea čilget ja gávnahit vástdusa dutkančuolmma gažaldagaide, ja duohtandahkat dutkánoasseváldiid oainnuid, vásáhusaid ja oaiviid sin geahčastaga bealis. Go skuvllas čađaha dutkama de lea oahpahedjiid perspektiivva mii lea guovddážis. Lea dutki ieš gii vállje ja mearrida makkár oainnuid ja dieđuid háliida dutkat ja almmuhit ovttasbarggu oktavuođas. (Postholm 2011: 22-23.) Kvalitatiiva dutkamis lea dutki ieš dehálaš reaidu danne go son ovddida iežas perspektiivva ja oainnuid nu ahte lohkki sáhttá oaidnit mo dutki lea váikkuhan dutkanbargui. Dakkár govvideapmi maid sihkkarastá dutkama kvalitehta. (Postholm 2011: 35.)

Munno dutkanbargui heive kvalitatiiva dutkanmetoda danne go munno ulbmil lea lahkonit, iskat ja fuomášuhttit mo sámevuhta boahtá oidnosii sámi čáppagirjjálašvuoda girjjiid bokte. Dán dutkamušas lea dehálaš oažžut ovdan dan, ahte atnet go oahpaheaddjit sámi čáppagirjjálašvuoda girjjiid oahpahusas dalle go fádda lea sámi árbevirolašvuoda birra, ja dasto jus dahket dan, de makkár girjjiid atnet ja movt heivehit sii sámi čáppagirjjálašvuoda girjjiid oahpahussii.

3.2 Kvalitatiivva jearahallan ja čađaheapmi

Ovdal go obanassiige álgaheimme jearahallamiid, de fertiime guorahallat ja gávnahit mo jearahallama buoremusat sáhtii čađahit. Fertiime mearridit man birra jearahallat, geaid jearahallat ja mainna lágiin gávdnat ja čoavdit iežame dutkančuolmma. Árvvoštallamiid vuodul gávnnaheimme ahte lea vuotas jearahallat oahpahedjiid iešguđetge agis vai ožžo iešguđegelágan dieđuid. Dan vuodul ráhkadeimme jearahallanofelačča (gč Mielddus 1) jearahallamiidda, mii lea láidesteaddji jearahallamiid čađaheamis.

Jearahallanofelaččas leat dieđut, njuolggadusat ja gažaldagat, ovdamearkka dihte mo jearahallan galgá čađahuvvot. Dasa leat ráhkaduvvon gažaldagat dutkančuolmma vuodul danne go lea dat čuolbmá mii mearrida man guvlui hállana dutkanmálle, ja movt áigu viežżat dieđuid dutkangažaldagaide. (Larsen 2017: 100.) Dán ofelačča sáhttá atnit dalle go jearahallá

ovtta informántta, muhto maiddai joavkojearahallamis, ja lea dego listu maid dutki čuovvu mo ja mainna lágiin lágidit dutkanjearahallamiid. Das leat mielde dat fáttát man birra dutki ohcalo eambbo dieđuid dasa mo oahppat eambbo fáttáid birra ja oahpásnuvvat informántta duogážii. Jearahallanofelaš galgá addit dutkái čuvgehusa ja čovdosa dutkančulbmii. (Johannesen ja earát 2016: 149.) Jearahallanskovis (gč Mielddus 2) ledje birrasiid 10 gažaldaga mat ledje juhkkojuvvon golmma váldokategorijai fáttáid mielde. Dan letne dahkan dan dihte vai šaddá čorgadeabba čohkhet dieđuid seammá fáttá vuollái. Moai livččiime sáhttán váldit gažaldagas gažaldahkii, muhto go informánttaid dieđut ledje iešguđetláganat, de orui buoremus čohkhet dieđuid fáttáid mielde. Jearahallanskovi golbma oasi leat:

1. Oahpahedđiid oainnut sámi mánáidčáppagirjjálašvuodja girjjiin.

Moai hálíideimme gullat oahpahedđiiin mo sin mielas oahppit liikojit lohkat ja gullat girjjiid main fáddá lea sámi árbevieruid birra, ja lea go mihkkege maid sii váillahit sámi girjjiin.

2. Oahpaheaddjit ja sámi árbevierut sámi mánáidčáppagirjjálašvuodja girjjiin.

Dán oasis hálíideimme diehtit oahpahedđiiin mat sin mielas leat sámi árbevierut sámi čáppagirjjálašvuodja girjjiin, makkár girjjiid ja teavsttaid oahpaheaddjit válljejit oahpahussii ja maid sii doivot ohppiid oahppat dain girjjiin.

3. Mo oahpaheaddjit barget skuvllas sámi mánáidčáppagirjjálašvuodja girjjiiguin.

Makkár girjjit leat geasuheaddjit ohppiide ja válljejit go girjjiid fáttáid vuodul?

Informánttat árvvoštallet makkár govat sin mielas galggašedje leat sámi girjjiin. Guokte informántta árvvoštallaba válljejuvvon girjji *Áhkubiebmu*, ja mo dan girjji sáhtášii atnit oahpahusas?

Kvalitatiivvalaš jearahallan lea dutkanmetoda mas adnojuvvo dakkár ságastallan mas lea struktuvra ja juoga áigumuš. Jearahallamat mat gullet dutkanbargui leat eambbo dárkileappot plánejuvvon go dábalaš ságastallamat ja jearahallamat. Dutkanjearahallamiin lea áigumuš háhkat dieđuid, oažžut oahpu, ipmárdusa ja čilgehusaid dutkančulbmii. Dutki jođiha ieš jearahallama ja geahčala oažžut ipmárdusa informánttas mo son oaidná dutkanfáttá ja makkár duogášmáhttu sus lea dutkanfáddái. (Kvale & Brinkmann 2018: 21-23.)

Gávdnojit iešguđetlágán jearahallamat movt dieđuid háhkat kvalitatiivvalaš dutkanbargui. Leat guokte jearahallanvejolašvuodja maid sáhttá válljet, semi- dehe strukturerejuvvon jearahallama. Moai válljiime semi- struktureren dutkanvuogi go dat orui heiveme buoremusat munno dutkanbargui go ii leat nu čadnojuvvon movt lágidit jearahallama. Moai hálíideimme diehtit mo oahpaheaddjit dulkojít sámi árbevirolašvuodja čáppagirjjálašvuodja girjjiin, ja mo sii skuvllas barget dainna go fáddá lea sámi árbevirolašvuodja birra. Lassin hálíideimme maid diehtit atnet go oahpaheaddjit oahpahusas sámi čáppagirjjálašvuodja girjjiid go barget fáttáin.

Semi- strukturerejuvvon jearahallamis sáhttá atnit jearahallanofelačča mii lea okta vuohki man vuođul dutki sáhttá jearahallat olbmuid. Dat lea maid veahkkeávnas dutkanjearahallamis, ja das leat neavvagat, dieđut informánttaide, gažaldagat ja fáttát man vuođul lágidit jearahallama. Jearahalli sáhttá molssodit gažaldagaid vuoru, ja sáhttá gažaldagaid gaskkas máhccat ovddos dehe maŋás. Semi- strukturerejuvvon jearahallamis galget leat rabas gažaldagat, ja son gii vástida daid, galgá sáhttít iežas sániiguin vástidit nu mo hálíida. Das eai leat gárves vástádusevttohusat ja ii sáhte vástidit jua dehe ii. (Johannesen ja earát 2016: 148). Strukturerenjearahallamis lea visot ovdagihitii plánejuvvon hui čielgasit, sihke fáddá ja gažaldagat. Gažaldagaide lea dávjá ráhkaduvvon vástádusevttohusat, ja vástideaddji sáhttá mearridit guđemuš vástádusa vállje ja dan russestit. Gažaldagaid ráiddú ii sáhte molssodit, muhlo ferte čuovvut nu mo gažaldagaid vuorru lea biddjojuvvon. Dákkár vuohkái maid sáhttá atnit jearahallanofelačča. (Johannesen ja earát 2016: 148-149.)

3.2.1 Dutkanmateriála čohkken

Dutkanmateriála letne čohkken jearahallamiid bokte, nugo namuhuvvon dás ovdal. Álggos ráhkadeimme jearahallanofelačča mo čađahit jearahallamiid. Dasto sáddiime oahpahedđiide dieđuid dutkanprošeavta birra (gč Mielddus 3) ja jearahallanskovi mielddusin. Oppalohkái gárttai munnuide váldomateriálan vihta váldoinformántta geaid jearahalaime, báddemát ja transkribemát ja válljejuvvon sámi mánáidčáppagirjjálašvuodja girji. Váldoinformánttat, geaid letne jearahallan, leat smávvaskuvlla ja gaskadási oahpaheaddjit. Jearahallamiid letne čađahan njealji oasis: guokte oahpaheaddji letne jearahallan joavkkus ja dan golbma eará fas ovttaskasat. Buot njeallje jearahallama leat báddejuvvon ja transkriberejuvvon. Informánttaid letne gohčodan A, B, C, D ja E

3.2.2 Dutkanbarggu informánttat

Moai háliideimme iskat mo barget girjjálašvuodain guovtti dihto skuvllas, ja munno informánttat leatge dáid skuvllaaid oahpaheaddjít. Informánttat leat vihtta nisson oahpaheaddjí geat leat 40 jagis gitta 65 lagi rádjái ja serve buohkat jearahallamiidda sámi mánáidčáppagirjjálašvuoda birra. Buot jearahallamat leat anonymiserejuvpon. Čáledettiin atne bustávvakodaid sin namman. Go maŋgil čujuhetne transkripšuvnnaide, de čálle oahpaheaddjí A, B, C, D dehe E.

Gávdnojit máŋggalágan vuogit movt válljet informánttaid jearahallamiidda. Dán bargui válljiime jearahallangáldu mii gohčoduvvo *diedžut*. Dat mearkkaša ahte dutki jearahallá olbmuid geain lea ollu máhttua ja diehtu dan fáttás mii dutkojuvvo. Sii leat maid čeahpit čilget oainnuset, máhtuset ja muitalit buriin mielain visot maid sii dihtet ja máhttet fáttá birra. Informánttaid válljiime dan vuodul go diđiime bures geat sii leat, ja go sis lea máhttua ja diehtu sámi árbevirolašvuoda birra. (Jacobsen 2013: 174.)

Nu go dás bajábealde čilgiime, de letne jearahallan oahpaheddiid guovtti vuogi mielde. Rasmussen čállá ahte ovdamunni joavkoságastallamis lea ahte oassálastit sáhttet ákkastallat gaskaneaset, lasihit eambbo dieđuid fáddái ja muittašit muhtun dáhpáhusaid birra. (Rasmussen 2016: 76). Halvorsen fas čállá ahte go jearahallanjoavkku oassálastit doibmet ovttas, de buktet sii lassi dieđuid. Dat leat dakkár dieđut maid muhtun oassálastit soitet vajálduhttán, ja dainna lágiin sáhttet čiekjudit áššiide ovttas mat muđui eai livče boahttán ovdan. Joavkojearahallamis oažju dutki eambbo čiekjalit dieđuid dutkanbargui. (Halvorsen 2008: 139.)

Go oahpaheddiid galggaimé válljet jearahallamii, de válljiime gaskadási oahpaheddiid geat oahpahit sámegielfága. Vuosttás oahpaheaddjí válljiime go son lea sámi girječálli, ja go sus lea máhttua ja diehtu sámi mánáidčáppagirjjálašvuodás. Daid eará oahpaheddiid válljiime dgo sii leat gaskadási sámegieloahpaheaddjít. Oahpaheddiin, geaid válljiime jearahallat ovttaskasat, ja dan guovtti oahpaheaddjis joavkkus, háliideimme gullat mo dain iešguđetge skuvllain barget ja sáhttet bargat čáppagirjjálašvuoda girjjiiguin go skuvllain lea sámi árbevirolašvuhta fáddán. Rasmussen lohká ahte individuála jearahallamis sáhttet informánttat hupmat rahpaseappot go dalle ii dárbaš váldit vuhtii maid nubbi dadjá fáttá

birra. (Rasmussen 2014: 76). Postholm fas deattuha dan go ii leat nu stuora dutkanbargu, de lea vuogas go ii vállje nu ollu oasseváldiid jearahallat. Dalle lea álkit gávdnat oasseváldiid oktasaš ipmárdusa dutkanfáddái ja makkár vásáhusat sis leat leamašan dán oktavuoðas. (Postholm 2018: 43.)

3.2.3 Masterbarggu dutkit

Munnos lea goappašagain sámi duogáš, ja letne bajásšaddan sámi bearasis ja birrasis. Moai oaivvildetne munnos lea máhttu ja diehtu sámi árbevieruide. Dan dihte háliidetne čađahit dán dutkosa iskan dihtii mo sámi mánáid girjjálašvuoda sáhtášii atnit árbevieruid doahttalit skuvllas. Moai háliidetne dadjat čuovvovaččat sáni iežame duogážiid birra:

Ellen Ánne duogáš:

Lean Mihkkel Issáha Ellen Ánne ja lean Mázes Guovdageainnus eret. Mun lean bajásšaddan boazodoalus ja lean ain otnádilis boazodoalus iežan bearrašiin. Lean náitalan boazodollui ja lean guovtti bártni eadni. Mun barggan Máze mánáidgárddis, ja lean doppe bargan 1995 rájes dalle go gergen ovdaskuvlaoahpaheaddjeahpuin giđđat 1995:s Sámi Allaskuvllas. Lean čállán guokte čáppagirjjálašvuoda girjji mánáide main fáddán lea sámi árbevirolašvuhta, oahppan ja nevvodeapmi. Girjjit leat *Rágo ja skire áhkku ja Niillas ja bákttestálu noaidelávži*.

Rávnná duogáš:

Lean Egán Joavnna Rávdná ja lean Čohkadievás Guovdageainnus eret. Mun lean bajásšaddan boazodoalus ja lean otnádilis ain boazodoalus iežan bearrašiin. Lean náitalan ja lean ovta nieidda ja golmma bártni eadni. Mun lean bargan oahpaheaddjin Guovdageainnu mánáidskuvllas jagi, ja Máze skuvllas 20 jagi. Ovdal go álgen oahpaheaddjin bargat, de bargen mánáidgárdejođiheaddjin čieža jagi. Lean maid earret eará čállán golbma girjji, guokte sámi mánáidčáppagirjjálašvuoda girjji ja ovta oahppogirjji mánáidgárdái. Almmuhuvvon girjjit leat: *Sáhpán-Bánni báhtara* (1997), *Gollegiissáš* (2006) ja *fáddá girji mánáidgárddiide* (2014).

3.2.4 Metoda digaštallan

Joavkoságastallamis sáhttet leat heajut ja buorit bealit. Heajut bealit sáhttet leat dat go informánttat eai duostta nu rhapsasit hupmat go leat máŋga oassálasti jearahallamis ja danne ferte váldit vuhtii nuppi informántta oaiviliid. Dákkár ságastallamis eai soaitte buot oassálastit oažžut sáni saji ja de eai boade buohkaid oaivilat ovdan. Nuppe dáfus lea joavkoságastallan buorre vuohki jearahallat dakko bokte go informánttat sáhttet addit ruossalasdieduid fáttá birra ja lasihit lassidieđuid ságastallamis. Individuála jearahallamis lea buorre go oassálasti lea okto danne go de son duostá bukit oaiviliiddis ovdan ja hupmat rahpaseappot. Dalle ii dárbbat son váldit vuhtii earáid ákkastallamiid ja oaiviliid. Heajut bealli sáhttá leat dat, go ii fuobmá ja ii muite buot osiid muitalit fáttá birra. (Rasmussen: 2014: 76.)

Doaba dehe sátni *transkriberen* mearkkaša lonuhit ovta málles nuppi mällii. Sáhttá maid lohkat ahte dalle jorgalat hupmangiela čállingillii. Transkriberen lea dakkár bargomálle gos čálát njálmmálaš jearahallama sánis sátnái, dan maid informánta muitala jearahallamis. Manjil go lea bádden ságastallamiid/jearahallamiid, de ferte daid transkriberet vai nákce struktureret jearahallama ja nu šaddá maid álkit analyseret jearahallamiid. Go jearahallamiid lea bádden ovddalgihtii, de nákce visot jearahallamiid čállit sánis sátnái. Lea dehálaš čállit visot maid informánta muitala, ja mo transkriberen lea dahkon vai jearahallan ja transkriberen šaddá jáhkehahtti ja duoh tavuohta boahtá ovdan vaikko lea issoras áddjás bargu čállit jus leat ollu jearahallamat. Kvale & Brinkmann oaivvildeaba jearahallamiid sáhttit transkriberet erenoamáš vuogi mielde nu go čállit visot ja merket mo informánta čadaha jearahallamiid nu go ovdamearkka dihte dan, jus informánta válda veahá bottu ságastallamis, mo lea jietnageavaheapmi, jurddaša go ovdal vástida ja nu viidáseappot. Dáid osiid ii dárbbat transkriberet ja váldit mielde jus eai guoskka oaivesisdollui man birra dutki háliida diehit ja guorahallat ovta fáttás. Muhto jus lea njálmmálaš dehe sosiála ovttasdoaibmama birra dutkame ja guorahallame, de ferte visot čállit mo informánta ovdanbuktá dieduid. (Kvale & Brinkmann 2018: 206-209.)

Moai válljiime transkriberet jearahallamiid nu mo jearahalli muitalii ja dajai. Moai ean leat transkriberen jearahallamiid erenoamáš vuogi mielde danne go njálmmálaš ja sosiála oktavuođat eai leat oassin munno guorahallamis sámi čáppagirj jálašvuodja birra. (Kvale og Brinkmann 2018: 209). Moai letne transkriberen jearahallamiid čállingiela njuolggadusaid mielde, ja ean leat rievadan sisdoalu ja dadjanvugiid, muhto čállán nu mo sánit čállojuvvovit čállingillii danne go informánttain lei sihke dialeakta ja sosiolekta. Jearahallan lei formálalaš

ja lea čálalaš hámis čállon mas bohtet ovdan informánttaid dieđut ja ipmárdus dutkanfáttá birra.

Dakkár dutkanbargovuogis maid ferte jearahalli váldit vuhtii *etihka*. Ferte ovddalgihtii jurddahit ahte ságastallamiin ja jearahallamiin sáhttet hearkes ja váivves fáttát bohciidit. Danne ferte suddjet dieđuid maid birra hubmojuvvo jearahallamis, sihke su gean jearahallá, báikkiid ja eará áššiid mat namuhuvvojít ságastallamis. Maŋŋil go jearahallamat leat loahpahuvvon de lea dehálaš vurkkodit báddenmateriála buori vuorkábáikkis. Ja go ii šat dárbbaš dieđuid báttiin, de galget báttiin sihkojuvvot visot jearahallamat vai eai gullo šat gostege. (Kvale & Brinkemann 2018 : 205.)

Buot jearahallamat čađahuvvojedje bures, ja nu oaččuime dutkamuššii ollu relevánta dieđuid informánttain. Báddema teknihkalaš beliid leimme ovddalgihtii sihkkarastán ahte doibmet, ja maŋŋel jearahallamiid iskkaime maid ahte bádden lei doaibmán ja váldán jiena ja makkár jietnakvalitehta lei olles jearahallama vuolde.

3.3 Epistemologija ja ontologija

Gávdnojit iešguđetlágán oainnut duohtavuhtii ja dieđalaš máhttui maid dutkit leat čállán áiggiid mielde ja maid dutkit gohcodit *epistemologijan* ja *ontologijan*. Epistemologija lea *oahppu dieđuide ja dieđateorijajaide*. Mo ja man viidát lea vejolaš oažžot oahpu ja máhtu duohtavuođas. Epistemologija suokkarda dan ahte, gii sáhttá diehtit, maid sáhttá diehtit, mii lea diehtu, mii lea duohtavuohta ja mo duođaštit dan ja dasto mo duođaštusas šaddá duohtavuohta ja eará sullasaš gažaldagaid. (Jacobsen 2013: 24-26.) Epistemologija lea relevánta dan dutkanbargui dakko bokte ahte makkár bohtosiid moai ožžo jearahallamiin, makkár dieđuid dat addet, leat go duohta dieđut ja lea go vejolaš oažžut duohta dieđuid jearahallamiid bokte. Sáhtte jearrat alddáme; lea go dutkanboađus duođai duohta vai leat go munno iežame oaivilat ja máhttu eambbo duohta? Sihkkarastin dihte jáhkehahttivuoda ja duohtavuođa dutkanbohtosiidda, de válljiime vihtta informántta vai nannejetne dutkamuša vuodu nu bures go vejolaš.

Juohke álbmogis lea iežaset epistemologija, nu maiddái sámi álbmogis. Eamiálbmogiid

epistemologijat lasihit áddejumi earálágan vugiin diehtit, oaidnit ja dulkot máilmci ja teoriijaid. (Kuokkanen 2009: 98-99). Munnuide lea veadjemeahttun čuoččuhit ahte munno dutkan mitala juste duohavuođa, muhto moai beasaime oaidnit ja gullat oahpaheddiid oainnuid ja mo sii govvidit sámevuodja girjjálašvuodjas. Jus eará dutkit galggaše čađahit seamma dutkanbarggu, de eai olit seamma dutkanbohtosiid danne go olbmuin lea iešguđetlágan oahppu ja máhttu dieđuide. Doahpaga *ontologija* bokte sáhttá čilget erohusaid. Ontologija, mii boahtá greikkas, mitala ahte leat iešlágan dovdomearkkat duohavuođa čilgemii, ja makkár lea duohavuohta duođai olggosoaidnit. Dutkit leat ollu čuđiid jagiid digaštallan mo duođai lea málbmi ja váttisvuohta lea ge gávdnat rievttes duođaštusaid dasa mo juoga lea ja ahte dat lea nie. (Jacobsen 2013: 24.) Ontologija relevánsa munno bargui vuolgá das mo moai letne hábmen jearaldagaid informánttaide čoavdin dihte dutkančuolmma jearaldagaid. Čohkkejuvvon dutkanmateriála duođašta ja duohandahká munno dutkosa bohtosiid jearahallamiid ja dutkiid teoriijaid bokte.

Lassin čatnasa *hermeneutikhka* dán dutkanbargui. Hermeneutikhka doaba máksá dulkonoahppu ja mitala mo guhgege ipmirda ja dulko máilmci, dieđuid ja vásáhusaid bokte. Ii leat daddjon ahte ná lea duohavuohta, muhto ášshit sáhttet dulkojuvvot iešguđetge vugiid mielde. Dát dutkanvuohki čuohcá dutki perspektiivii, dan ahte maid dutki gávnna, movt dulko ja makkár bohtosiid gávnna dutkanbarggus. (Halvorsen 2008: 23.) Jearahallamiid bohtosat adde dehálaš dieđuid ja duohandahke dutkanbarggu informánttaid oainnuid ja dieđuid bokte.

3.3.1 Jáchkehahtivuohta ja dohkálašvuohtha

Sáhttá jearrat mii lea buorre kvalitehta kvalitatiivva dutkamis. Postholm ja Jakobsen oaivvildeaba ahte kvalitatiivvalaš dutkamis galgá guorahallat áibbas earálágan eavttuid vuodul go kvantitatiivvalaš dutkamis. Soai deattuheaba ahte dutkama kvalitehta ii sáhte dušše čatnat dasa mii boahtá dutkama bohtosis, danne go kvalitehta maid mearrida mo dieđut leat huksejuvvon. Go moai čohkkiime materiálaid iežame dutkanbargui, de lea aŋkke loahpa loahpas munno dutkama metodaválljejumit, informánttaid jearahallamat ja válljejuvvon girjji mat váikkuhit dutkama kvalitehta. De sáhttá dadjat ahte visot dát namuhuvvon oasit mearridit mo moai nagodetne iežame barggu ja dutkama dagahit jáhkehahttin earáide, ja lea ge maid dehálaš dutkiide árvvoštallat ja jearrat

alddiineaset dan, ahte mo sii sáhttet báidnit dutkanmateriálaid sierranas ládje. (Postholm & Jacobsen 2018: 220-222.) Dán dutkanbarggu fáttá válljema duohken lea maid munno iežame beroštumit dasa mii guoská sámi árbevirolašvuhtii ja čáppagirjjálašvuodja girjjiid ektui. Ráhkadettiin jearahallama gažaldagaid lea vealtameahttun ahte dutkiin lea sihke diehtu ja máhttu ášsis, ja dás sámi árbevieruid birra. Vaikko diđiime maid ja mo galggaimē jearahallat dutkančuolmma ektui, de lei seammás ballu ahte ean fuobmá jearahallat informánttain visot maid dárbašeimme diehit. Danne go dutkanbarggu fáddá lea munnuide oahpis, de sáhttá čalmehisvuodain guođđit osiid jearahaga danne go dat orrot nu diehttalasat munnuide. Seammás fertiime maid váruhit ahte ean leat nu subjektiivvalaččat go jearahalaime ja nu ean báinne informánttaid bohtosiid ja dieđuid. Eambbo dáid beliid dutkanbarggus čálle dás čuovvovaš kapihtaliin.

Lea dehálaš ahte dutkanbargu lea jáhkehahtti jus buori dutkanbarggu galgá čađahit buriid bohtosiigui. Jákkehahttivuohta čatnasa dasa mo ja makkár materiálat leat adnojuvvon dutkanbarggus, mo dat leat čohkkejuvvon, ja mo daid atnit dutkanbarggus. Dávjá lea ságastallan, jearahallan ja áican mii riegádahttá kvalitatiivvalaš materiála. (Johannesen ja earát 2016: 29, 36.) Jákkehahttivuohta vuolgá das man vuđolaččat lea fáddá dutkojuvvon, ja sáhttit go dadjat dat leat jáhkehahtti dieđut mat leat čađahuvvon dutkamis. Iežame árvvoštallama vuođul navde ahte munno dutkkus lea bures luohtehahtti dan ektui go informánttat leat buohkat sápmelaččat ja sii leat sámi birrasis šaddan bajás. Sii dovdet bures sámi árbevieruid, kultuvrra ja dasa lassin leat dán dutkama váldoiinformánttat sámegieloahpaheaddjit ja girječállit. Jearahallamiid bohtosat eai dárbaš šaddat seammaláganat danne go jearahallit seamma ášsis sáhttet jearahallat informánttaid iešguđet ládje, nu goit jus leat eará dutkit geat jearahallet seamma ášsis. Jus háliida iskat jáhkehahttivuođa, de sáhttá čađahit máŋga jearahallama dáid seamma informánttaiguin seamma áššiid birra ieš guđetge áiggis. (Larsen 2017: 93-100).

Dohkálašvuhta fas gullá dasa ahte sáhttit go mii mihtidit dan maid mii doaivut mii mihtidit, ja gokčá go munno dutkanbargu dutkančuolmmaid ja makkár bohtosiid dat addá. Jus dán dutkama livčiime čađahan eará skuvllas, eará oahpaheddiigui ja eará girjjiigui, de livčii šaddat eará boadus dutkamis ja danne ii leat vejolaš mihtidit makkár boadus šaddá dutkamis go olbmuin lea earálágan duogáš ja bajásšaddan dilli. Dohkálašvuhta galgá leat lágalaš, mii mearkkaša dan, ahte dat bohtosat maid ovdanbuktá galget leat dutkojuvvon dutkanvuogi eavttuid vuođul. Oažžun dihte kvalitehta dutkamuššii lea dan duohken makkár dieđateorehtalaš dieđuid leat atnán dutkamušas. Eaktun dohkálašvuhtii lea ahte bohtosat

galget leat vuđolaččat duođaštuvvon, ja maiddái dat ahte bohtosiid vuostálasvuodat maiddái sáhttet duođaštit buori dutkamuša (Postholm 2011: 126-138.)

3.3.2 Etihkka

Juohke dutkamii gullet etihkalaš árvvoštallamat. Etihka árvvoštallamat dutkanbargguin lea dehálaš oassi dasa jus galgá oažžut oktavuođa ja dieđuid, ja ábaide informánttain. Informánttat galget ovddalgihtii oažžut dieđuid sihke njálmmálaččat ja čálalaččat mo sin dieđut hálddašuvvojtit, ja ahte sin namat ja dieđut anonymiserejuvvojtit buot osiin. Go áigu dutkanbargguid čađahit Norggas, de ferte ohcat lobi čohkket dieđuid Norgga nationála dulkaneahtalaš lávdegottis servodatfága ja humaniora várás. Moai letne čuvvon sin njuolggadusaid ja gáibádusaid. Moai letne atnán jietnabáddenmašiinna ja bádden buot jearahallamiid, maid de letne transkriberen dihtoriin ja anonymiseren nu ahte informánttaid identitehta ii boađe albmosii. Buot báddejuvvon jearahallamiid letne maŋŋel sihkkon eret jietnabáttiin. Informánttat leat ožžon dieđu sihke njálmmálaččat ja čálalaččat ahte sin namat ja dieđut maid leat mualan dán dutkanbarggu oktavuođas, leat buot osiin čihkojuvvo. Ii leat vejolašvuhta gávn nahit geat sii leat, ja maid sii leat mualan.

3.4 Kvalitatiivva bohtosiid analyseren

Analysamálle maid dán bargui letne válljen lea sisdoallo-analyserenvuohki, mii orui heiveme buoremusat dán bargui. Sisdoallo-analyserenvuogis leat vihtta válđočuoggá man vuodul analysere bohtosiid. Vuosttaš čuoggás galgá teavsttaid kodet, nuppi čuoggás juhkojuvvojtit kodat fáttáid mielde, goalmmát čuoggás galgá juohkit bohtosiid namuhuvvon kategorijaide, njealját čuoggás galgá guorahallat bohtosiid gávdnan dihte dehálaš proseassaid ja viđát čuoggás galgá guorahallat identifiserejuvvo málle dálá dutkama ja teoriija buohtastahttima dan ektui mo oahppu fievririduvvo ja máhtolašvuhta sajáiduvvá.

Koden ja kategoriseren leat dehálaš oasit go galgá analyseret bohtosiid, ja dán vuogi mielde fuomáša álkit málliid ja dábiid, ja geahpida dulkot ja gávdnat čovdosiid dutkančulbmii. Dán vuogi mielde sáhttá maid ráddjet jearahallama bohtosiid ja rátkit eret dárbašmeahttun

dieđuid mat eai gula dutkanfáddái ja mat eai guoskka dutkančulbmii. (Larsen 2017: 113-114.) Dat vuohki maid gohčoduvvo *deskriptiivaanalysavuohkin*. (Postholm 2011: 91).

Dákkár guorahallamis lea dehálaš atnit analysavuogi gos dutkanbohtosat čielgasit bohtet oidnosii ja leat ipmirdahti go leat kategoriserejuvpon fáttáid mielde. Moai letne seamma dutkanfáttá gažaldagaid jearahallan buot váldoiinformánttain. Vuosttaš namuhuvvon čuoggás, gos teavsttaid galgá kodet, letne sirren dieđuid jearahallamis ivnniid mielde. Nuppi čuoggás moai jugiime kodaid ivdnejuvvon fáttáid mielde. Goalimmát čuoggás sirriime buot váldobohosiid kategoriijaid vuodul. Njealját čuoggás fas guorahalle mii lea munno dutkanbargui dehálaš ja mávssolaš diehtu. Viđát čuoggás buohtastahtte iežame bohtosiid dálá dutkamiidda ja válljejuvpon teoriijaide. Dáinna vugiin ja bokte sajáduvvá/boahtá ođđa máhttu ja diehtu ovdan guorahallamis.

Dán dutkanbarggu váldogáldut leat informánttat ja dutkančuolmma guorahallama ja čoavdima dihte lea seamma jearahallanofelaš adnojuvpon buot informánttaide jearahallamiin. Jearahallanofelačča váldofáddá, maid dás ovdal juo letne čilgen, lea sámiid árbevierut. Oahpaheddiid jearahalaime sihke sin bargobáikkis ja ruovttus ja lei nu mo sidjiide heivii. Báddejuvpon ja transkriberejuvpon jearahallamiid lei álki iskat maŋjil, go dalle beasaime máhccat fas ruovttoluodda iskat ahte letne go ožzon fárrui buot dieđuid maid dárbbašeimme. Dutkanmateriála čohkkemis moai jugiime bargguid, sihke jearahallamis ja transkribemis ja searválaga dárkkistemme ja suokkardalaime maŋjil dan ahte buot oasit ledje mielde sihke báttiin ja transkriberejuvpon materiálas. Go materiála lei gárvvis, de sirriime ja ráddjiime dan nu ahte válddiime mielde dušše váldoosiid maid aniiime dutkančuolmma ja -gažaldagaid árvvoštallamii ja čoavdimii. Dákkár sirren ja ráddjen geahpidii analyserenbarggu ja maid gávdnat valdominstariid materiálas.

4. Válljejuvvon girji Áhkubiebmu

Dán bargui letne válljen sámi mánáid čáppagirjjálašvuoden girjji ovdamearkan mat leat sámi árbevierut muitalusas, ja girji lea maid doarjan informántaságastallamiin. Girjji Áhkubiebmu lea Marjatta Palismaa cállán, Isku Palojarvi muitalusa mielde, ja almmuhuvvui 1995:s. Dan girjji leat guokte informántta guorahallan ja árvvoštallan mii dán girjjis lea sudno mielas sámi árbevierut ja mo dan girjji sáhttá atnit oahpahusas. Maajjal go letne gergen dán dutkanbarggu sihkkojuvvojit visot báddejumit ja jearahallamat maiddái anonymiserejuvvojit.

Dán girjji válljiime guorahallat danne go lea dološ máinnas mii álgoálleggus lea eallán njálmmálaš muitalanárbevierus, ja maajjal almmuhuvvon čálalaš hámis girjin. Dán girjjis lea njálmmálaš árbevierru vuodđun ja lea sápmelaš gii lea muitalan dan álggos njálmmálaččat girječállai. Girjjis leat čappa, ivdnás sárgojuvvon govat, mas olbmuin leat sámi árbevirolaš biktasat badjelis. Govat oktan girjji teavsttain govvidit sámi eallima dološ áiggis dalle goas olbmot orro godjiin, bivde gottiid ja mo sin birgenláhki lei. Visot dát namuhuvvon bealit devde daid eavttuid mat munnos ledje girját ja leatge vuodđun dasa manne moai válljiime dán girjji ovdamearkan. Munno mielas ovddasta dát girji bures sámi árbevirolaš muitalusaid ja muitalanvuogi, maiddái danne go dat álgoálleggus lea muitaluvvon njálmmálaččat ja dihto muitalanárbevieru vuodđul. Moai háliideimme informánttaid galget guorahallat ja árvvoštallat girjji, gullan dihte maid sii oaivvildit muitalusa birra dasa mii guoská sámi árbevirolaš muitalusaide, sámi árbevieruide, go lea sápmelaš cállán, sámi norpmaid ja eavttuid vuodđul.

4.1 Čoahkkáigeassu Áhkubiebmu girjjis

Iisko Palojarvi, *Ergon Issát* (1928 -1985) lei Bálojávrris Suoma bealde eret ja orui maid doppe olles eallenagis. Ergon Issát barggai bohccuiguin gitto dassážii go jámii 1985:s. Su áhcči lei Antti Erkinpoika Palojarvi, geain gohčodedje *Ergonin*. Marjatta Palismaa (os. Kohonen: 1939 - 2018) lei Rääkkakylas, Lulli-Suomas eret. Marjatta Palismaa náitalii Ergon Ánttiin (Antti Palismaa (ovdal Palojarvi)). Ánte ja Issat leigga vieljažagat. Maaren Palismaa lea Ergon Ántte ja Marjatta nieida gii lea cállán daid dieđuid 19.03.20:

Áhkubiebmu lea dološ sámi máinnas, man Issát-čeahcerohkki lávii muitalit. Ergon Issát lei čeahpes muitaleaddji. Son lávii muitalit muitalusaid ealás vugiin. Áhkubiebmu lea oarbbes

bárdnemáná birra man okta boares áhkku gesii bajás ja biepmái. Bárdni šattai stuoris ja gievra. Áhkubiebmu bivddii gottiid su gievrras reaŋgaidisguin, muhto duoddaris orui vel okta unna, gievrras olbmáš, *Állana guhkkosašádjá*, guhte duos das áin boahtá ja borrá buot sin mállása. Dat máinnas lea buori ja bahá birra, go dat gievrras sámebárdni dat gal birge *Állana guhkkosašádjain*, ja oažžuge loahpas nu ollu golliid ja silbbaid go son ja su reaŋgat nagodit guoddit. Go Marjatta gulai dán máidnasa, de son jurddašii, ahte dán gelddolaš máidnasa galgashii čállit muitui ja almmuhit girjin. Son anii dehálažžan ahte sámit ieža galget beassat muiatalit iežaset muiatalusaid, ja háliidii ahte dát máinnas almmuhuvvo girjin. Son čálíi máidnasa muitui justte nu, go Issát dán sutnje muiatalii. Son válldi oktavuođa OTAVA -nammasaš goasttideddjiin, mii de háliidii girjji almmuhit. Máinnas lea álggos muiataluvvon suomagillii ja de maŋjil jorgaluvvon dáidda sámegielaidé: davvisámegillii, nuortalašgillii ja anárašgillii. Girji lea maid jorgaluvvon engelasgillii. Marjatta lei oahpaheaddji Heahtás, ja son bivddii skuvlamánáid sárgut govaid muiatalusa vuoden ja su jurddan lei atnit daid skuvlamánáid sárgun govaid girjjis, muhto goasttideaddji (OTAVA) ii daid dohkkehan ja nu bivddii Erkki Tanttu sárgut govaid girjái. Erkki Tanttu (1907-1985) lei dovddus suopmelaš dáiddárgrafihkkár ja sárgu. (Palismaa 2020: 1-33.)

5 Bohtosat

Bohtosiid bokte bohtet informánttaid vásáhusat ja dieđut ovdan sámi árbevieruid birra. Dat boahtá ovdan anedettiin sámi mánáidčáppagirjjálašvuodja girjjiid oahpahusas. Jearahallamiid bokte čalmmustahattojuvvojit oahpaheddjiid bargovuogit, mo sii ovddidit sámi árbevieruid skuvllas čáppagirjjálašvuodja girjjiid bokte, ja makkár váilevašvuodjaid sii vásihit sámi mánáidčáppagirjjálašvuodjas. Vuodđun bohtosiidda leat informánttaid dieđut maid ovdanbukte sitáhtaid bokte, ja gos sin oaivilat ja vásáhusat bohtet ovdan maid letne atnán vuodđustit dán dutkosa. Nu go letne 3. kapihtalis namuhan metoda oasis, de leat jearahallama bohtosat ja dieđut juhkkojuvpon golmma válđooassái fáttáid mielde. Vuosttaš kapihtal lea oahpaheddjiid oainnut sámi mánáidčáppagirjjálašvuodja girjjiin. Nubbi kapihtal lea oahpaheaddjit ja sámi árbevierut sámi mánáidčáppagirjjálašvuodja girjjiin. Goalmmát kapihtal lea mo oahpaheaddjit barget skuvllas sámi mánáidčáppagirjjálašvuoda girjjiiguin, ja Áhkubiebmu oahpahusas. Juohke kapihtalis lea čoahkkáigeassu.

5.1 Oahpaheaddjii oainnut sámi mánáidčáppagirjjálašvuoda girjjiin

Dán oasis ovdanbukte informánttaid vástádusaid iežaset vásáhusaid birra, sitáhtaid ja dieđuid bokte. Ja viidáseappot movt oahppit liikojit sámi mánáidčáppagirjjálašvuodja girjjiide main sámi árbevierut leat fáddán. Go moai jerre liikojit go oahppit lohkat čáppagirjjálašvuodja girjjiid main sámi árbevierut leat fáddán, de vástida oahpaheaddji A ná:

Dán skuvllas gos mun barggan, doppe gal liikojit hui bures lohkat dakkár girjjiid. Leat oahpes ášshit mánáide, ja leat hui fascinert daidda girjjiide, ja háliidit daid gullat ja lohkat. (Informánta A 2020.)

Informánta A lohká go leat oahpes ášshit ja govat girjjiin maid oahppit lohket diehtit ja máhttit, leat ruovttus gullan dehe oahppan ja oaidnán, de lea sin mielas gelddolaš girji. Seamma oahpaheaddji logai iežas leat smávvaskuvlla ja gaskadási oahpaheaddjin. Son mearkkaša sámi girjjit leat seamma čađačalmmagat juohke dásis, smávva skuvladásis maid. Oahpaheaddji E lohká jus girjjit leat oahpes áššiid birra, de oahppi beassá iežas identifiseret muitalusain juogo sisdoalu, biktasiid, biergasiid dehe eará dáfus. Dan duodašta maid informánta E:

Jua, dat gal liikojit, oainnat go dat lea eambbo dakkár oahpes áššiid birra. Mánát sáhttet iežaset čatnat dasa, ja identifiseret muitalusaiguin go leat oahpes áššiid birra, ja mun jáhkán mánáide šaddá eambbo dat dovdu, ahte mii sápmelaččat maid leat dehálaččat go girjjit leat čállon sámi eallima ja kultuvrra birra, ja dat lea mielde nannemin min ohppiid identitehta. (Informánta E 2019.)

Informántta C lohká son lea vuohttán jus oahppit leat gullan njálmmálaččat ovta muitalusa ovdal, ja dat fas de muitaluvvo girjjis, de oahppit čuvvot bures mielde go lea oahpes fearán maid gullet. Son lohká viidáseappot go lea smávvaskuvlla ohppiide lohkan girjji *Máret Ingá Duoddaris*, ja girjji sisdoallu lei ollu ohppiide oahpis go sii ledje ieža boazosámémánát ja vásihan measta dan seammá go Máret Ingá. Dan girjjis ledje maid ollu čappa, oahpes govat ohppiide nugo garddástallamat, giđđa- ja čakčajohttin ealuin ja nu áin. Identifiseren, dehe dovdat iežas dili girjji sisdoaluin lea dehálaš bealli girjjiid atnimis, dan dáfus lohká ge informánta B ná:

Lea maid buorre jus leat oahpes dáhpáhusat mánáide, maiguin sáhttet iežaset identifiseret (Informánta B 2019.)

Ráhkkanahttin lea oassi girjjiid máilbmái čákŋjamis. Informánta D lohkáge ahte lea dehálaš čilget ovddalgihtii ohppiide man birra áigot lohkat, dehe maid ieža galget lohkat. Dat mearkkaša čilget sisdoalu ja goväid vai ožžot ipmárdusa man birra muitalus dehe máinnas lea. Dan dáfus lohká informánta A ges ahte su mielas lea dehálaš álggahit odđa fáttáid muitalusgirjjiiguin, hupmat ovddalgihtii fáttáid birra, boktit bajás ohppiid dieđuid mii gullá dan metakommunikašuvdnii. Informánta C fuomášahttá ahte oahpaheaddji iežas beroštupmi girjjálašvuhtii lea vealtatmeahttun dasa ahte oažžut ohppiid guldalit ja lohkat muitalusaid ja beroštit muitalusain. Son lohká ná:

Oaččut vaikko makkár girjji lohkat jitnosit ohppiide, jus oahpaheaddjis lea beroštupmi girjjiide, de dat báidna mánáid ja sis maid šaddá beroštupmi girjjálašvuhtii.
(Informánta C 2020.)

Informánttat C, D ja A lohket ahte muitalusat leat mihá geasuheaddjit eanas ohppiide, ja informánta A lohkáge ahte eai leat galle olbmo geat eai liiko muitalusaide. Son lohká viidáseappot ahte muitalus lea guoimmuheapmi, ja guoimmuheami bokte sáhttá neavvun ja

rávven dáhpáhuvvat ja viidáseappot lohka son lea ieš šaddan bájas muičanárbevieruin ja lea sus alddis dat árbevierru. Informánta A čilge ge dan ná:

Ná, go mii buohkat diehtit, de lea muičalus árbevirolaččat juoga mii geasuha eanas olbmuid. Go lean ieš šaddan bajáš muičalusaiguin, de lea mus alddán dat árbevierru ja lea lunddolaš atnit muičalusa čohkhet mánáid. In mun dárbbat álgit mánáid hušsat čohkkát jaska, in dárbbat eambbo álgit muičalit muičalusa ja mánát jaskkodit lunddolaččat. (Informánta A 2020.)

Informánta A maid lohká barggadettiin lea muičalus buorre vuoiŋŋastanbottoš, go son muičala muičalusa, de leat oahppit fas vuokŋásat álgit bargat fáttain.

5.1.1 Váilevašvuodat sámi mánáidčáppagirjjálašvuodagirjjiin

Okta oassi girjjálašvuodas leat vejolaš váilevašvuodat. Jus leat, makkár váilevašvuodaid oidnet informánttat sámi mánáidčáppagirjjálašvuodas? Go jearaime váillahit go oahpaheaddjít maidege sámi čáppagirjjálašvuodas, de bodii ovdan ahte buohkat váillahit eambbo čáppagirjjálašvuoda girjjiid. Informánta E lohká ná dán ášsái:

Mánáidskuvllas ja gaskadásis eai gávdno nu ollu girjjit, dakkár čáppagirjjálašvuoda girjjit, dakkárat mat dal addo leat boahtán olggos, ja oahppit lohket hui jođánit daid girjjiid mat mis leat, livččii galgan ollu eambbo. Galggašedje girječállit geat gillejít dán dahkat. (Informánta E 2019.)

Informánta B fas logai ahte orrot unnán girjjit mat leat fáttáid birra čállojuvvon, nu go sáivaguolásteami ja dakkáraš fáttáid birra. Informánta A vástidii ášsái ná:

Mun váillahan muičalusaid mat leat čállojuvvon ealli hupmangielain. Dávjá vásihan ahte muičalus lea čállojuvvon girjegielain, ii ge hupmangielain. Go hupmangielain čállá, de šaddá mihá elloseabbo ja gelddoleabbo muičalus. (Informánta A 2020.)

Informánta A joatká viidáseappot ja lohká su mielas ledje Ragnhild Gaup Eira girjjit *Sáhpánbánni ja Gollegiissáš* buorit danne go dát leat čállojuvvon hupmangielain. Dan seamma lohká maid Ellen Anne S. Gaup *Niillas ja bákttestálu noaiddelávži* ja Jens Martin Mienna *Internáhta suoivvanat* girjjiid birra. Dat leat buriin hupmangielain čállojuvvon. Informánta A čilge dan ná:

Mun lean vásihan go girječállit čállet, de čállet hui pedagogalaččat, galget čielga norpmaid ja rámmaid siskkobealde čállojuvvon, eai oro riekta duostame čállit sámevuogi lágje, nugo veahá ilgadis muitalusa main lea gelddolašvuhta. (Informánta A 2020.)

Go lea sáhka muhtun fáttáid váillaheamis, de lohká informánta E ahte galggaše eambbo girjjit ilbmat mat leat ráhkisuodja ja meahcásteami birra. Son oaivvilda gal ahte dat soitet buorebut heive boarrásit ohppiide fáddán skuvllas go eai leat mánnálaš girjjit.

Dat leat beare unnán girjjit mat heivejtit smávvaskuvlii ja gaskadássái, leat unnán girjjit mat bohtet olggos lágádusain. (Informánta E 2019.)

Seammás go lea sáhka meahcáteamis, de guoská dat maid sámi vuodđoealáhusaide, ja dat oahppan mii doppe dáhpáhuvvá. Dan beali birra lohká informánta A ná:

Min kultuvra lea juoga maid mii galgat atnit árvvus. Mun lean vásihan ahte ii leat álohii nu álki dan ge skuvllas bargat, earenoamážit boazodoalu birra. Skuvla ii nagot gokčat dan dárbbu go ii leat vejolaš vuolgit ealu lusa ja váilot girjjit dan ealáhusa birra. Dat lea hui oahpaheaddji duohken ja ruđalašvuhta mii dagaha ollu. Mun gal oainnán ahte dat bealli govssahallá eanemusat. Guliid bivdit, meahcástit ja ávnnastit gal lea vejolaš dávjibut dahkat, eat lodde ge gal. (Informánta A 2020.).

5.1.2 Čoahkkáigeassu

Dat mii bodii ovdan informánttaid bohtosiin lei ahte oahppit juohke dásis likojit bures sámi čáppagirjjálašvuoda girjjiide, ja dat vuolgá das go girjjit leat oahpes áššiid ja dáhpáhusaid birra. Oahpisvuhta geasuhii ja buvtii movtta ohppiide lohkat ja gullat girjjiid njálmmálaččat. Oahpisvuhta maid movttiidahtii ohppiid ságastallagoahtit gaskaneaset danne go sii dihte man birra lei sáhka ja oahppit sáhtte nu dovdat iežaset girjji sisdoalu doaimmain, bargguin ja vásáhusain. Dakko bokte nannojuvvo maid ohppiid identitehta ja gullevašvuhta. Sámi mánáidčáppagirjjálašvuoda girjjit leat buorit atnit oahpahusas go álggaha ođđa fáttá iešguđetge fágas. Informánttat lohket oahpahedjiid beroštupmi girjjálašvuhtii lea dehálaš go galgá ohppiid beroštumi boktit girjjálašvuhtii, ja movttiidahttit sin lohkat girjjiid. Máŋga informántta maid čuoččohedje ahte muitalus lea stuora oassi guoimuheamis, ja maid dalle go bottoža váldet bargguin. Informánttaid bealis bodii maid ovdan dat ahte sámi

mánáidčáppagirjjálašvuoden girjjit leat buorit atnit ohppiid rávvemis ja neavvumis. Nuppi dáfus lohket informánttat máŋggaid váilevašvuodenaid sámi čáppagirjjálašvuodas. Sii váillahedje eanet sámegirjiid mat heivejtit buot dásíide skuvllas. Sii ohcaledje eambbo sámi čáppagirjjálašvuoden girječálliid geat čállet muitalusaid ealli hupmangielain ja mat leat eambbo čállojuvvon sámevuogi lágje. Dan dáfus namuhedje nu go gelddolaš ja balddihahtti ilgadismuitalusaid mat leat sámi vuogi mielde čállojuvvon. Sii lohke girječálliid čállit dávjá menddo pedagogalačcat ja mearriduvvon rámmaid siskkobealde.

5.2 Oahpaheaddjit ja sámi árbevierut sámi mánáidčáppagirjjálašvuoden girjjiin

Go lei jearaldat mii oahpaheddiid mielas lea sámi árbevirolašvuohtha girjjálašvuodas, de ledje eanas osiin ovttá lágje vástidan.

Informánta C lohká ahte sámi árbevirolašvuohtha lea maid dat go girji lea čállojuvvon sámegilli, ja lea čállán sámi fearániid birra. Informánttat B, D ja E lohket fas ahte lea dehálaš ahte girjjit leat čállojuvvon sámegilli danne go sámi doahpagat eai gávdno dárogillii ja lea váttis daid čilget dárogillii. Informánta E dadjá dan birra ná:

Mu mielas leat sámegirjjit dat maid sámi girječállit leat čállán, vaikko dáččat sáhttet čállit seamma fáttáid birra, go dat mii dážamáilmis lea, muhto jorgaluvvvon sámegilli ii šatta dat seamma, go sii eai dovdda min kultuvrra ja servodaga ja dalle maid eai máhte čállit sámeáššiid birra. Mii jurddašit earáláhkái go rivgut ja dáččat.
(Informánta E 2019.)

Informánta E lohká viidáseappot ahte sámevuohtha ii boade čielgasit ovdan jus livčcií dárogillii čállojuvvon muhtun rivgus dehe dáččas. Son maid lasiha lea dehálaš ahte sápmelaš lea čállán muitalusa, go sii dovdet sámi eallima, servodaga, vieruid ja kultuvrra. Dalle šaddá fearán jáhkehahhti su mielas:

Sámi girječálliin lea sin duogáš mii dahká ahte sii máhttet čállit sámeáššiid birra, mii jurddašit earáláhkái go rivgut ja dáččat. Mii leat oainnát earáláganat, danne go mis lea eará kultuvra, giella, servodat ja nu ain. (Informánta E 2019).

Informánta C árvvoštallá maid dan sullii seamma lágje:

Sámegillii gal ferte čállojuvvon, jus obbalašvuhta galgá boahtit ovdan, dárogielas eai gávdno dakkár doahpagat maid sáhttá sámegillii čilget ja muitalit, ii boade ovdan sámevuhta nu movt lea, muhtun bargguid ii oba sáhte ge dárogillii čilget, mii dat lea, go dárogielas eai gávdno sánit mat čilgejít sámi árbevirolaš doahpagiid. (Informánta C.)

Dás nanneba maid informánttat E ja D sámevuoda duogáža dehálašvuoda;

Informánta E:

Mii diehtit man birra lea sáhka, go lohkat daid girjjiid maid sámi girječállit leat čállán. Sámi girječállit dovdet sámi servodaga, kultuvrra, eallima, sámi vieruid, doahpagiid ja nu ain. Mii máhttít sámi vieruid ja kultuvrra birra čállit, nu ahte šaddá jáhkehahtti ja gelddolaš sápmelaččaide. (Informánta E 2019.)

Informánta D:

Sámevuhta lea maid jus lea sámegillii čállojuvvon ja máhttá ja hálldaša čállit sámi fearániid birra (Informánta D 2019).

Informánttat C ja D oaivvildeaba maid ahte elliid muitalusat, nugo riebana ja guovžža birra, leat árbevirolaš muitalusat. Ja dan seamma leat ovddešáiggi máidnasat informánta A mielas:

Dávjá lea válđojuvvon vuodđu árbevirolaš muitalusaide dološáiggis, movt dalle leat eallán ja vásihan, beroškeahttá lea go boazodoallu, eanandoallu dehe eará, ja daid čállán girjin. (Informánta A 2020.)

Dan seamma oaivvildeaba maid informánttat C ja D. Informánta A maid logai ahte sámi árbevirolaš muitalusain leat ollu neavvagat ja rávvagat maiguin guldaleaddjit ja oahppit sáhttet iežaset identifiseret. Informánttat C ja D oaivvildeigga ahte buot geahppaseamos lea lohkat girjjiid mat leat iežas suopmanii čállojuvvon.

5.2.1 Čoahkkáigeassu

Máhttu ja diehtu lea dehálaš go galgá máhttít čállit sámi árbevirolašvuodža birra bođii bureš ovdan dás. Buot informánttat oaivvildit girjiid, maid sápmelaččat leat čállán sámi fáttáid birra, leat eanemus jáhkehahhti ja nu sáhttet oahppit daid bokte dovdat iežaset dili ja eallima. Nuppe dáfus lohke sii ahte ii soaitte leat seamma nanu jáhkku jus girjji livččii dáčča dehe rivgu čállán sámiid dilálašvuodžaid birra danne go sis ii leat doarvái máhttu iige dovdu sámi doahpagiid ja dadjanvugiid birra. Ollu sámegielat doahpagiidda eai gávdno dárogielat namahusat mii dagaha ahte ollislaš duoh tavuohta ja obbalašvuuohta ii boađe ovdan. Girječállis berre leat máhttu ja diehtu sámi servodaga siskkáldas kodaid birra go galgá máhttít čállit jáhkehahhti fearaniid ja fáttáid sámiid eallima birra. Árbevirolaš dološ njálmmálaš muitalusat leat vuodđun otná árbevirolaš muitalusaide, ja okta oassi dain lea čállojuvvon girjiide, ja nu doibmet dávjá neavan ja rávan ohppiide, ja mat leat gelddolaččat lohkat go lea iežas gillii čállojuvvon.

5.3 Mo oahpaheaddjit barget skuvllas sámi mánáidčáppagirjjálašvuodža girjjiiguin

Dán goalmmát ja maŋemus oasis guorahalle ja digaštalle mo oahpaheaddjit barget skuvllas sámi čáppagirjjálašvuodža girjjiiguin, ja lea go sin mielas dehálaš ahte sámi árbevierru boahtá ovdan čáppagirjjálašvuodža girjjiin. Lassin ovdanbukte makkár govaid informánttat háliidit sámi čáppagirjjálašvuodža girjjiide ja maid oahppit sáhttet oahppat *Áhkubiebmu* girjjis.

Buot informánttat lohket atnit oahpahusas sámi mánáidčáppagirjjálašvuodža girjjiid, ja leat ovttaoivilis dainna ahte lea dehálaš ahte sámi árbevierru boahtá ovdan sámi čáppagirjjálašvuodža girjjiin.

Informántta E muitalii ahte son atná dakkár girjjiid vai oahppit ohppet sámevuodža birra, ja bessel oahpásnuvvat sámi doahpagiidda. Danne lea hui mívssolaš atnit daid oahpahusas. Informántta A fas lohká ahte son gal atná ollu čáppagirjjálašvuodža girjjiid maid lohká ohppiide go lea borranboddu, ja oppalaččat dan dihte maid go oahppit dán áiggi čohkkájít menddo ollu telefovnnaiquin, dihtoriin ja gehččet TV. Dán informántta mielas lei dehálaš fállat ohppiide

guoimmuheami gos sii bessel ieža govahallat ja fantaseret govoid jurdagiiddiset mielde. Informánta D oaivvilda ahte čáppagirjjálašvuoda girjjiid bokte ohppet ollu sámi eallima birra, nugo sámi bargguid, doahpagiid, eallinvuogi ja dajaldagaid. Viidáseappot lohká son ahte girjjiin bessel oahppit oaidnit govoid nu go ovdamearkka dihte gerresis ja eará dološ dávviriin ja ávdnasiin mat eai šat adnojuvvo otná dilis. Ná lohká informánta A sámi árbevirolaš doaimmaid ja bargguid birra:

Dat sáhttet oahppat bargguid birra. Go lea muitalus suoidnemeahci birra, de dat ohppet mo doppe lea, mo meannudedje ja barge. Oahppit ohppet luondu gáhttet ja ávkkástallat, eat billis luondu ja ohppet olmmošvieru birra. (Informánta A 2020.)

Informánta B lohká ahte Sámis lea bearas̄ guovddážis, makkár barggut doppe leat, masa olles bearas̄ searvá ja su mielas leat dain sámi girjjiin ollu sámevuoda birra. (Informánta B 2020). Informánta C mielas leat dán áiggi unnán dološ ávdnasat ja biergasat dan dihte go dalle majemus soađiáiggi bolde duiskkalačcat daid. Viidáseappot lohká girjjiid bokte beassat ohppiid oahppat sámi historjjá birra, lohkat ja oažžut movtta ieža čálligoahtit ja sárgut ja ivdnet govoid. Son dadjá ná:

Addá movtta mánáide lohkat ja ipmirdit sámi historjjá. Gii bat lea vel gii muitala midjiide mo dološáiggi lei jus dat muitalusat eai daga dan? “Eanas fágain sáhttá bargat sámi čáppagirjjálašvuoda girjjiiguin. (Informánta C 2020.)

Informánta C maid lohká ahte oahppi sáhttá oažžut duodjemovtta go beassá lohkat ja geahčeat čielga ivdnás govoid, ja vel dan ahte sámi girjjit addet movtta mánáide lohkat ja ipmirdit sámi historjjá.

Girjeválljema birra árvvoštallá informánta E dan nu ahte, go vállje girjjiid main sisdoallu lea oahpis ohppiide, de oahppi máhttá ja diehtá bures muitalusa dilalašvuoda birra. Oahppi sáhttá vaikkoba oažžut dakkár dovdu ahte diet muitalus lea su birra go lea oahpes sisdoallu.

Sámegillii čállojuvvon girjjit maid sáhttet movttáskahttit oahppi čálligoahtit dan dihte go

oaidná ahte sámegiella lea mágssolaš go dainna maid sáhttá čállit girjji sámiid birra mat leat árvvusadnojuvvon min servodagas. Dan birra lohká informánta E ná:

Ohppiin nannejuvvo iešluohttámuš ja iešgovva ja ahte sii soitet movttáskit čállit go oidnet dat sáhttá čállit sámegilli maid, ja sámiid birra (Informántta E 2020).

Informánttat lohket oahppit ohppet ollu dakkár girjjiin main lea sámi eallima birra, ja informánta E joatká ná:

Jua, mun geavahan ollu čáppagirjjalašvuoden girjjiid oahpahusas, mas sisdoallu lea sámi árbevirolašvuoden birra. Mun geavahan daid vai oahppit ohppet sámevuoden birra, nugo doahpagiid ja sámi eallima birra, norpmaid ja árvvuid mat gusket eallimii ja lundai. (Informántta E.)

Informánta A fas lohká ná dán ášši birra;

Jua, mun gal geavahan sámi muitalus girjjiid. Mun liikon álggahit fáttáid muitalusain, lean fuomášan ahte go muitalusa čanan fáddái, de dat muiet fáttá muitalusa bokte. Mun liikon bures dutki Vygotsky pedagogihkkii. Muitalus doaibma dego šaldin oahpes dilis amas dillái. (Informántta A 2020.)

Ja muittuha viidáseappot ahte dat lea máilmme dehálaš, go oahppoplána deattuha ahte galget bargat sámi árbevieruiguin skuvllas:

Jua, oahppoplánas han leat sámi árbevierut, diet lea mielde ahte mii galgat oahpahit sin kulturábbi birra, dat lea guovddáš elemeanta skuvllas. Mu mielas lea hui dehálaš váldit vuhtii dán báikkálaš árbevirolaš máhtu lagas birrasis. (Informántta A 2020.)

Informánttat B, C, D ja E leat ovttaoaivilis das ahte jus sámi árbevieruid birra ii čállojuvvo, de ballet sii dan jávkat ja gos galggašedje oahppit muđui oahppat sámi árbevieruid birra jus eai skuvllas. Informánta B lasiha ahte dán áiggi leat nu ollu eará doaimmat mat váldet ohppiid saji ja beroštumiid beaivválaš eallimis ja lea buorre go dakkár girjjit gávdnojit. Son oaivvilda viidáseappot dan, ahte go ruovttus eai oahpa árbevieruid birra de sáhttet dasa leat máŋga ákka. Váhnemiin ii soaitte máhttu sámi árbevieruid birra, sii soitet gávpogiin orrut ja nu ii soaitte

leat dilli iige astu daid birra oahpahit mánáide. Danne galggale skuvllas oahppat eambbo daid birra. Informánttat C ja D lohkaba ahte jus leat dakkár girjjit mat leat ovdamearkka dihte čállojuvvon sámi kultuvrra, eallinvuogi ja birgenlági birra, de dain ohppet oahppit oba ollu sámevuodå birra:

Girjiid bokte maid besset oahppit oahppat sámi historjjá, lohkat ja oažžut movtta ieža álgit čállit muitalusaid ja ivdnet govaid. Son lohká ahte gii muitalivčii midjiide dološáiggi birra jus dat girjjit eai daga dan. (Informánta C 2020.)

Informánta E ges lohká ahte oahppit besset skuvllas oahppat sámi kultuvrra, historjjá ja sámi eallima birra. Iešdovddu ja identifiserema dáfus lohká informánta D ahte sámi mánáidčáppagirjjálašvuodå girjjiiguin sii besset nannet iešdovddu, iešluohttámuša, oahpásnuvvat ja dovdat gullevašvuodå iežas kultuvrii. Oahppit besset iežaset identifiseret fearániiguin ja oaidnit ahte earát dohkkehít sin eallinvuogi ja kultuvrra go dakkár fearánat bohtet ovdan girjiin. Oahppit maid oidnet earát dohkkehít sin nu movt sii leat, sihke giela, biktasiid ja vieruid dáfus. Informánta E čilge dan ná:

De dovdet de lea juste maid mun máhtán ja dovddan. Nu ahte diet sáhttá leat mu birra maid sáhka. Ohppiin nanjejuvvo iešluohttámuš, iešgovva ja soitet movttáskit čállit, go oidnet ahte sáhttá čállit sámegillii ja sámiid birra. (Informánta E 2019.)

Buot oahpaheaddjeinformánttat lohke dat leat ollu vejolašvuodat movt bargat sámi čáppagirjjálašvuodå girjjiiguin oahpahusas. Informánta A muitala ahte sii barget sámegiela diimmuin juohke vahkus gos sii ohppet árbevirolaš doahpagiid, juohke vahku ođđa sáni. Dávjá sii válljejit doahpagiid čáppagirjjálašvuodå girjiin go leat daid lohkan ja čađahit daid joavkobargun. Oahppit galget čilget njálmmálaččat maid doaba máksá, makkár sátneluohkkái gullá, galle vokála ja konsonántta leat ja lea go antonyma vai synonyma. Informánta A muitalii go barge doahpagiin *fávru*, de ledje eanas oahppit geat eai diehtán maid dat doaba máksá vaikko muhtumiid mielas dat lea dábálaš doaba. Informánta A lohká viidáseappot ahte lea ollu maid sáhttá bargat čáppagirjjálašvuodå girjjiiguin. Sáhttá ovdamearkka dihte

muitalusaid dramatiseret, luđiid ja lávlagiid ráhkadir ja muitalusa oasseváldiide ja dasto sáhttá árbevirolaš muitalusain čilget váttis matematihka ohppiide jus sii eai oro ipmirdeami fáttá:

Árbevirolaš muitalusa maid sáhtát atnit čilget váttis matematihka. Oahppit de álget jurddahit fáttá birra ja de lea álkit joatkit barggu teoriija máilbmái. De lea šaddan juo oahpes ášsin go leat lohkan čáppagirjjálašvuoda girjiid ovdagihtii. (Informánta A 2020.)

Muitalus lea dávjjibut suohtasit lohkat go fáktagirjiid. Sáhttá válljet muhtun muitalusgiriji ja doppe gávdnat sámegiel doahpagiid maiguin bargá, vai oahppit ohppet sámi doahpagiid, ja ohppiid giella riggu ja ovdána dainna bargovugiin čáppagirjjálašvuoda girjiid bokte. Čáppagirjjálašvuoda girjiid lea buorre geavahit go galgá oahppat lohkat ja maiddái bargat lohkanstrategijiaiguin ovdánahttit lohkama. (Informánta A 2020.)

Dás namuha informánta A lohkanstrategijaid, ja oaivvilda ahte dat leat maid buorit hárjehallat go galgá oahppat lohkat. Ovdamunni čáppagirjjálašvuoda girjiin lea ahte muitalus geasuha ohppiid go dat lea dat maid sii muitet nu bures ja nu ii dárbaš lohkat eambbo go oktii go sii dan manjgil muitet girji sisdoalu. Dan bargui sáhttá válljet muhtun muitalusgiriji ja doppe gávdnát sámegiel doahpagiid maiguin bargá. Informánta A lea fuobmán dan ahte lea buorre vuohki ná bargat vai oahppit ohppet sámi doahpagiid. Ohppiid giella maid riggu ja ovdána dainna bargovugiin. Sii leat bargan girjiin *Muitalus girji áddjái*, maid leat atnán lohkanhárjeheapmái, lea buorre girji dan bargui:

Book Creator lea maid oba buorre bargovuohki, ja dasa gal liikojit mánát oba bures ja sii barget ángirit ja iešheanalacčat go galget čállit muitalusaid (Informánta A 2020).

Informánta A muitala ahte lea sámi árbevirolašvuhta mii su eanemusat geasuha go galgá lohkat ja válljet muitalusaid oahpahussii.

5.3.1 Čoahkkáigeassu

Dán oasis bođii ovdán mo oahpaheaddjit barget sámi mánáidčáppagirjjálašvuodja girjjiiguin skuvllas, ja makkár girjjit leat geasuheaddjit ohppiide. Buot informánttat lohket atnit sámi mánáidčáppagirjjálašvuodja girjjiid oahpahusas. Informánttat maid lohke daid girjjiid sáhttá čatnat buot fágaide, ja dakko bokte ohppet oahppit ollu nu go sámi eallima dološáiggis dálááigái, sámi doahpagiid, reaidduid, atnubiergasiid, biktasiid, eallinvugiid, vieruid, norpmaid, árvvuid ja sámi bearraša bargguid birra. Oahppi maid sáhttá oažžut duodje- ja dáiddamovta go beassá oaidnit govain makkárat dat leat. Čállin- ja lohkanmokta maid ovdána oahppis go beassá lohkat ja čállit eatnigiellasis. Informánttat maid lohke čáppagirjjálašvuodja girjjit ja lohkanstrategijiat leat buorit oahppanreaiddut atnit lohkama oahpahallamii.

Viidáseappot lohke informánttat ahte oahpisvuhta nanne ohppiid iešdovddu ja iešgova. Fuomášahtte maid ahte oahpoplána deattuha dan ahte skuvllas galget bargat báikkálaš árbevieruiguin, ja maiddái čáppagirjjálašvuodja girjjiiguin. Informánttat ledje ovttaoivilis ahte sámi girjjálašvuodja girjjit leat dehálaččat, ja ábaide gos čállojuvvojt sámi árbevieruid birra. Jus sámi árbevierut eai boađe ovdan girjjiin, de lea unnit vejolašvuhta ohppiide, geain ii leat sámi biras nu go gávpotássiin, oahppat sámi árbevieruid birra. Informánttat deattuhedje ahte buot dat oasit nannejit oahppi identitehta ja gullevašvuodja iežas kultuvrii go oahppit oidnet stuoraservodat dohkkeha sámekultuvrra ja eallima.

5.3.2 Govat sámi mánáidčáppagirjjálašvuodtagirjjiin

Dán oassekapihtalis ovdanbukte informánttaid oaiviliid sámi čáppagirjjálašvuodja girjjiid govaid birra

Govat ja ivnnit lea miellagiddevaččat ja dehálaččat háhkat fuomášumi juoga masa. Dat guoská ábaide mánáidgirjjiide, gos visualiseren lea guovddáš oassi. Munno jearaldahkii govaid birra, lohket informánttat B, C, D ja E ahte oahppit liikojit girjjiid lohkat main leat čielga, fiinna govat go govat muitalit ollu. Sii leat ovttaoivilis dasa ahte muitalus šaddá eallaseabbo ja erenoamážit smávva dásí ohppiide. Govat muitalit ollu ja de ii dárbbat leat nu ollu teaksta jus leat buorit govat mat veahkehít čilget fearána. Sámi čáppagirjjálašvuodja girjjiin lea erenoamáš dehálaš go dain leat govat. Dat lea go govain oahppi beassá oaidnit ollu sámi eallima birra, nugo ovdamearkka dihte sámekultuvra ja árbevieruid birra. Dán áiggi

ohppiin ii soaitte buohkain nu ollu máhttu sámi eallima birra. Dalle leatge govat veahkkin ohppiide muitaleame fearána birra. Govain bessel oaidnit makkár duođaid lea sámi eallin, makkárat leat ávdnasat olggos oaidnit, movt barget sámi árbevirolaš bargguid ja makkár reaiddut sis leat. Informánttat lohket muitalus ii soaitte nu somá leat go eai leat govat. Dan birra lohká informánta A ná:

Iešalddis eai dárbaš nu ollu govat go mii leat hárjánan muitalusa gullat govaid haga. Dán áigásáš mánát jearralit dakkaviđe leat go govat muitalusas. Govva lea várra dego doarja govvidit muitalusa. (Informánta A 2020.)

Informánta A joatká viidáseappot ja muitala ahte dán áigásáš oahppit jerret dakkaviđe leat go govat muitalusas. Ja jus leat govat, de gal gáibiduvvo ahte leat govat mat muitalit muitalusa sisdoalu eaige iešalddis girjji fearána birra. Muhto jus leat govat, de galggašedje govat čájehit makkár mielas olbmot leat fearánis, lea go váivi, suohtas dehe moraš dehe dakkár erenoamáš dahku girjjis. Informánta A lohkáge govat berrejít leat čielgasat ja ivdnát, muhto eai dárbbat leat duođalaččat, ja vel ahte oahppit eai liiko čáhppes-vilges govaide. Muhto son lea vásihan ahte buot nuoramus oahppit gáibidit govaid, sii čuvvot mielde leat go govat. Govva lea dego doarja govvidit muitalusa. Informánta E lohká son jáhkká govat leat dehálaččat sihke nuoraide ja smávvaskuvlla ohppiide. Govain sáhttá oaidnit mii geavvá fearánis, go govva sáhttá dan muitalit:

Govat galget leat hui geasuheaddjit, erenoamážit válđoolmmoš, dat dagaha eambbosat háliidit lohkat dan, ja oahppit sáhttet iežaset oaivvi siste ráhkadit govaid daidda eará persovnnaide makkárat sii leat. Govat leat maid dehálaččat go dat muitalit gosa mii gullat ja geat mii leat. (Informánta E 2019.)

Jus lea sápmelaččaid birra, leaš dal boazosápmelaččaid, dálu dehe guolásteaddji sápmelaččaid birra, de galget geavahuvvot dat biktasat mat gullet dan oasseváldái muitalusas. Dat dakhá mánát ohpet oaidnet biktasiin gullevašvuoda, gosa guhge gullá, ja geat mii leat. Govvadáiddár gii sárgu govaid, sus ferte diehtu ja máhttu sámebiktasiid gullevaš- ja báikkálašvuodaide. (Informánta E 2019.)

Govat sáhttet leat geasuheaddjit, erenoamážit váladolmmoš. Dat soaitá leat buorre olmmoš ja sutnje de eai dárbbat nu fiinna biktasat go iešalddis lea fiinna olmmoš ja geasuha eambbo lohkat girjji. Dain eará persovnnain eai dárbbat leat nu ollu govat go oahppi sáhttá ieš iežas oaiivve siste govahallat makkár persovnnat sii leat. Informánta E lohká ahte girjji govat fertejít heivet dan áigái mii lea muitalusas, dan čállon áigái. Jus lea dološ áiggis, de fertejít lea govat mat govvidit dan áiggi. Jus dálá áiggi birra lea girjji fearán, de ferte govvidit dálá áiggi. Viidáseappot ahte su mielas galggašedje govat čuovvut áiggi. Ii sáhte ovdamearkka dihte dološ fearániid, biktasiid, bargoreaidduid ja bargojuogu bidjat govvan dán áiggi fearániidda danne go dat ii doala deaivása muitalusa ektui. Dat soaitá maid leat gelddolaš bidjat muitalussii dološ sámi govaid dálá áigodahkii, ovdamearkka dihte jus galgá uldda, oruha, hálttiid ja eahpáračča govahallat.

5.3.3 Čoahkkáigeassu

Informánttaid dieđuin bodii ovdan ahte govat galget leat buorit vai dorjot muitalusa. Dain berrejít leat čielga ivnnit ja govvidit čielgasit muitalusa sisdoalu. Oahppit eai liiko čáhppes-vilges govaide. Informánttat lohke ahte ii dárbaš ollu teaksta go leat buorit govat mat muitalit ja čájehit ollu. Govat galget leat gelddolaččat, eallasat ja oahppi galgá beassat oaidnit sámi eallima ja kultuvrra govaid bokte. Govain galget oahppit oaidnit ja oahppat ovdamearkka dihte dovdat girjji oasseváldiid dovdduid, gullevašvuoda, biktasiid gullevašvuoda, govvidit sámi reaidduid ja sámi eallinvuogi. Govat maid galget heivehuvvot áigodahkii, čuovvut áigodagaid jagis, nugo geassi, čakča, dálvi ja nu ain. Biktasiid gullevašvuhta lea hirbmat dehálaš sámi girjjalašvuoda girjjiin danne vai oahppit besset oaidnit ja oahppat guđe guovllu olmmoš lea, ja maiddái geat sii leat ja gos sii orrot.

5.3.4 Girji Áhkubiebmu oahpahusas

Oassin dutkanmateriálas lei maid ovttá válljejuvvon girjji árvvoštallan. Bivddiime guokte oahpaheaddjit árvvoštallat Áhkubiebmu girjji. Dan girjjis soai leaba árvvoštallan sámi árbevirolašvuoda, ja movt girjji sáhttá atnit oahpahusas.

Goappašat informánttat lohkaba atnán *Áhkubiebmu* girjji oahpahusas. Soai lohkaba dát girji lea čállojuvvon dološ muiatalusa vuodul. Girjis lea eará sámegielsuopman danne go lea suomabeale olmmoš čállán dan. Viidáseappot leaba ovttaoaivilis dasa, ahte *Áhkubiebmu* lea buorre sámi girji mas leat buorit ivdnás, ealas ja čielga govat. Govat muiatalit ahte dát girji lea dološ sámi árbevirolaš muiatalusgirji. Govaid tevdnejeadji lea máhttán sárgut govaid juste nu movt sámi eallin lei dolin ja lea ožzon ollu sámevuoda mielde. Girjji namma, *Áhkubiebmu*, sáhhttá addit earálágan ipmárdusa, oaivvilda informánta C:

Ipmárdus sáhhttá šaddat áhkku borrá dan bártni dehe bárdni borrá áhku biepmu, muhto loahpas boahtá ovdan dat lea bárdni gii biebmá dan áhku (Informánta C).

Informánta C lohká, go leat lohkan girjji, ahte easkka de ipmirdat dat lea áhkku gii biebmá dan bártni stuorisin. Informánta D lohká fas ahte dat boahtá ovdán girjjis dat lea biebmobárdni dan áhkus. Informántta guovttos lohkaba girjji leat albma sámi árbevirolaš girjin:

Das leat visot mat gullet sámiide, dan oaidná govain, juohke diŋga gullá sámiide, nugo suohpan, biktasat, barggut, duoddarat, sámi eallinvuohki, gietkka, báhti, riggi, guksi, bealljegoađit, visot ávdnasat ja biergasat mat orrrungoahtái gullet. Dat lea “albma” sámi girji, govat dušše muiatalit ahte doppe leat sámi barggut, biepmut, reaiddut, biktasat, orrunbáikkit, namahusat ja nu ain. (Informánta C 2020.)

Muiatalusa vuolggasadji lea sámi guovlluin, ja lea árbevirolaš muiatalus go lea ulddaid birra. Állana guhkkosaš áddjá ferte leat ulda, go bávtti siste orru (Informánta C 2020).

Informánta C maid lasiha dan, ahte girjji sisdoallu muiatalusas muiatala ahte lea dološ áiggi fearán; dan oaidná govain go leat bessodatsabehat, dološ áiti maid gohčodedje njallaáitin ja birgenlähki gullá sámiid dološ eallinvuohkái. Informánttat lohkaba dainna girjjiin sáhhttá ollu oahppat. Informánta D maid lohká ahte dán muiatalusa sáhhttá vaikko man guvlui jorahit dan

ektui man birra háliida oahpahit ohppiide nu go mat ovdamearkka dihte dan ipmárdusa ahte jus leat juonalaš, de birget máilmis. Oahppit maid ohppet ja bessel gullat eai buot mánát beasa šaddat bajás váhnemiid luhtte. Informánta C ges lohká ahte sihke govain ja sisdoalus sáhttá ollu oahppat dainna girjin, geahččat makkár dološ ávdnasat ledje ja movt dološ áiggi birgejedje. Ná čilgeba:

Mis eai leat šat gerresat go duiskkalaččat bolde visot dávviriid mis. Dan dihte leat govat mágssolaččat vai bessel oaidnit makkárat sámi biergasat leat olggos oaidnit. Visot maid oainnát nagodat muitit, ja ipmirdit makkár duođai lea. Soaitá addit maid duodjemovtta go boarrásit šaddá. (Informánta C 2020.)

Visot lea sámi, juohke diŋgas oainnát ahte lea sámi árbeviolaš muitalus, dat gal lea “fra a til å”. Dat lea duoddara birra (Informánta C 2020).

Informánta D lohká dan girjis oahppá ollu morála birra, nugo vuoiggalaš-, juonalaš- ja gávvilvuoda birra, dainna mearkkašumiin ahte son, gii daid máhttá ja hálldaša, son birge ja olle guhkás máilmis. Eará morála girji muitalusas sáhttá leat: vaikko lea unni, de sáhttá son maid birget stuorábuiguin vaikko lea unni olmmái ja állana guhkkosaš. Muitalusas oahppá maid dan ahte go barget veahkkálagaid, de birgejít bures máilmis. Dasa lasiha informánta C ahte galgá alccesis luohttit, vuollánit it galgga, giitevašvođa čájehit nu movt Áhkubiebmu dagai boares áhkui.

Mii guoská muitalusa áigái, de árvvoštallá informánta D ahte girji lea čállojuvvon dalle go dat fearán lei guovddážis. Ahete dat lea muitaluvvon dakkár jeđđehussan mánáide geat báhcet oarbbisin, ahete sii maid birgejít máilmis go gávdnojít buorit olbmot mat veahkehít ja geaid veahkehít. Dasa lasiha informánta C dan ahte dološ áiggi lei nu ahete boares olbmot eai birgen nuorra olbmuid haga go eai lean boarráiidruovttut ja nuorra olbmot eai birge boarráiid haga go eai lean mánáidgárddit.

Sámi árbeviolaš muitalusat leat dávjá dakkárat mat oahpahit mii lea riekta dehe mii lea boastut lohká informánta D, go dán girjis boahtá maid dat ovdán. Informánta C jurddaša fas lea go son dán girjis maid fáddán sámi mánáidbajásgeassin? Dat danne go sáhttá leat dat mii dagaha dan ahte Áhkubiebmu ii bala, muhto lea juonalaš ja rievttalaš. Lea go son dat boares

áhkku su nu geassán bajás? Ahte lea ožžon buriid neavvagiid áhkus? Dasa lasiha informánta D ahte dološ áiggi lei dábálaš váhnemiidda nevvodit mánáideaset máinnasteami bokte, ja dán fearánis lea várra boares áhkku gii lea nevvon áhkubiebmu go lei dakkár go son lei.

Informánta C mielas *Áhkubiebmu* girji lea ávkkálaš danne go dan sáhttá atnit go oahpahit árbevirolaš doahpagiid birra danne go das leat ollu doahpagat/sánit. Mii fas guoská govaide, liigečilgehussan muitalussii, de oaivvilda informánta D ahte govain beassá oaidnit makkárat leat bessodatsabehat, njálleaíti, geres, biktasat ja nu viidáseappot.

Informánttat leaba ovttaoaivilis movt dán girjji sáhttá atnit oahpahusas. Girjji sáhttá atnit doarjan buot fágain nu go servodatfágas, duojis, sámegielas, rehkegis, risttalašvuhta-, osku-, eallinoaidnu- ja etihkkafágas (ROEE), biebmo- ja dearvvašvuodafágas. Servodatfágas oahpahuvvo dološ sámi historjá ja movt dalle elle, maid borre, movt birgeje, vieruid ja eallinvugiid. Duojis suokkardallat girjji govaide, dan makkár ávdnasat ja biergasat leat, ja iskat duddjot/ráhkadir nu go ovdamearkka dihte beasseliheti/-gore. Sámegielas sáhttá oahpahit doahpagiid ja namahusaid birra nu go lávu/goadi namahusaid nu go uvssot, loaidu ja riggi, ja biktasiid nu go šávká, gállohat ja idjagozán ja nu viidáseappot. Árbevirolaš dávviriid ja eallima doahpagat leat jávkame nuoraid gaskkas. Eará maid sáhttá bargat sámegielas lea dramatiseret muitalusa, atnit vuodđun dán muitalusa go galgá čállit ođđa sámi muitalusaid. Rehketfágas sáhttá maid atnit dán girjji, ovdamearkka dihte gávnahit mii lea állan guhkkosaš ja man guhkki dat ges lea, dasto maid cegget lávu ja mihtidit man guhkit galget leat lávvomuorat, man stuora saji dárbaša ja nu viidáseappot. ROEE fágas sáhttá fas ságastallat mii lea riekta ja boastut dán muitalusas. Biebmo- ja dearvvašvuodafágas sáhttá ráhkadir sámi biepmuid.

5.3.5 Čoahkkáigeassu

Informántta guovttos leigga goappašagat atnán *Áhkubiebmu* girjji oahpahusas, ja soai oaivvildeigga girjji leat oppalaš sámi árbevirolaš muitalus álggus gitto lohppii. Girjji namma, *Áhkubiebmu*, sáhttá addit boasttu ipmárdusa dasa mii muitalusas/girjjis dáhpáhuvvá ja dan ii fuobmá ovdal go lea juo oanehažžii lohkan girjji. Soai oaivvildeigga girjji sisdoallu ja fearán lea dološáigásaš dáhpáhus maid oaidná govain ja sisdoalus. Soai lohkaba dat lea suomabeale olmmoš gii lea čállán ja sárgon govaide girjái ja fearána vuolggasadji lea sámi guovllus. Girjjis leat buorit ivdnás ja dárkilis govat mat čájehit mii dáhpáhuvvá ja makkárat leat sámi biktasat, eallinvuohki, eallinbáiki ja nu ain. Girjji sisdoallu lea sámi árbevirolaš muitalus, maiddái

danne go dovddus badjellunddolaš ja oahpes fenomena ulda lea mielde fearánis. *Áhkubiebmu*
girjji sáhttá atnit gáldun buot fágaide skuvllas.

6 Digaštallan

Dán kapihtalis moai digaštalle mo letne čađahan dutkanbargguid, mo dat lea doaibman ollašuhttit munno ulbmiliid. Dasto jotke árvvoštallat válljejuvvon teoriijaid iežame čohkkejuvvon dutkanmateriála ektui ja makkár bohtosiid letne olahan, ja de digaštalle metoda mii lea adnojuvvon ja loahpalačcat árvvoštalle bargome ollislašvuoden, ábaide dan ahte letne go nákcen čoavdit dutkančuolmma ja vástidit váldogažaldagaid mat munnos ledje sámi mánáidgirjjálašvuoden ja sámi árbevieruid ektui.

6.1 Oahpaheaddji oainnut sámi mánáidčáppagirjjálašvuoden girjjiin

Jearaldahkii mo mánát váldet vuostá sámi mánáidčáppagirjjálašvuoden girjjiid, vástidedje buot oahpaheaddjit ahte vuhtte dat leat bivnnuhat ohppiid gaskkas, ja oahppit liikojit bures lohkat ja gullat sámi mánáidčáppagirjjálašvuoden girjjiid skuvllas. Informánttat lohke ahte jus girjjiin leat oahpes ášsiid birra, de oahppi beassá iežas identifiseret muitalusain nu go mat sisdoalu ektui dehe biktasiid, biergasiiid dehe juoga man nu eará ektui. Stokke ja Tønnesen maid duoðašteaba man dehálaš lea ahte oahppi beassá ja sáhttá iežas identifiseret go dávjá lea girjjiin mánnálaš oasseváldiid birra, geat leat seammá boarráset go ieža. Dat váikkuha máná iešluohttámuša ja iešgova nannemii go beassá lohkat dakkár fearániid. (Stokke & Tønnesen 2018:10-20.)

Iežame barggu oktavuoðas skuvllas, letne vásihan go lea muitalus ášsiid birra maiguin oahppit sáhttet identifiseret iežaset, dat ledje geasuheaddji ohppiide. Sáhtte váldit ovdamearkka go jus muhtin girji lea árbevirolašbargguid birra, nugo mánná mii cegge lávu. Dat buktá fuomášumi mánnái ahte son maid nagoda ja máhttá dan barggu bargat. Eará ovdamearka sáhttá leat fearán girjjis, mánná mii viežzá muoraid seavdnjad. Jus lohkki dahje guldaleaddji lea seavdnjat árgi, de dat fuomášuhttá máná ahte ii dárbbat ballat vaikko lea seavdnjat, ja son duostá maid bargat dan seamma barggu. Kuokkanen gii nanne munno informánttaid čuoččuhusa, go sii lohket maid ahte oahpes ášsit nannejit ohppiid positiivvalaš identitehta hábmema, ja nannejit sin gullevašvuoden kultuvrraset ja árbevieruidasaset (Kuokkanen 2009:45-46). Árbevirolaš máidnasat, muitalusat, myhtat, sátnevádjasat ja diiddat leat aitto dat gáldut mat addet positiivvalaš identitehta hábmema. Girjjálašvuodenaoahpahus lea veahkkin hukseme positiivvalaš sámi identitehta ja nanneme sámi kultuvrra. (Hirvonen 2009:13.) Kuokkanen ges

čállá máinnasteapmi ja muitaleapmi lea dehálaš oassi min eallimis go dakko bokte mii muitalit geat mii leat, ja gosa mii gullat. (Kuokkanen: 2000:24-28).

Go letne bargan ohppiiguin sámi čáppagirjjálašvuoda girjjiiguin, de letne oaidnán dan go lea girji oahpes áššiid birra, de šaddet oahppit nu áŋgirat bargat ja muitalit vásáhusaideaset birra jus girjjis lea seamma ášši birra maid son diehtá ja mii lea oahpis sutnje.

Informánttat lohket oahpisvuhta lea dehálaš oassi čáppagirjjálašvuodás, erenoamážit smávvaskuvlla dásis. Sii leat maid vásihan dan, go lea oahpes áššiid birra fearán, de ohppiid beroštupmi ja mokta lohkat girjiid loktana ja sii servet ságastallamiidda. Dalle go oahpes áššiid birra muitala ohppiide, de álget oahppit identifiseret iežaset fearániiguin, ja sáhttet muitalit ahte son lea vásihan dan seamma go mii lea fearánis. Informánttat maid deattuhedje, go girjjit lohkkojuvvojt ohppiide main lea oahpes sisdoallu, de dat movttiidahtii oahppi lohkat ja guldalit girji ja searvat ságastallamiidda fáttá birra. Oahpisvuhta addá oahppái oadjebasvuoda ja erenoamážit jus beassá identifiseret iežas girji fáttá sisdoaluin.

Vuolab lohká muitalusat sáhttet leat olbmát, oahpaheaddjit ja áigeájánasat. Son maid de duoðašta dan maid informánttat muitaledje, ahte muitalusat leat geasuheaddjit ja bivnnuhat ohppiid gaskkas. Informánttat muitaledje go girjjit leat sámiid birra ja sámegillii cállon, de ohppiide bođii eanet dakkár dovdu ahte mii sápmelaččat leat maid dehálaččat go girjjit leat cállojuvvon sámevuoda ja sámi eallima birra. Diekkár vásáhusat nannejit ohppiid identitehta ja gullevašvuoda kultuvrraset. (Vuolab 1995:35.)

Mii de guoská dasa mii lea geasuheaddji, de muitalit oahpaheaddjit ahte jus oahppit leat gullan ruovttus muitalusaid ovdal, dehe eará sajes nu go fulkkiin ja oahppásiin, de atnet mánát daid muitalusaid eambbo geasuheaddjin ja gelddolažžan danne go lea oahpes fearán. Muhtun muitalusaid lohket oahppit gullan ovdal ruovttus, dehe eará sajiin, nugo fulkkiin ja oahppásiin. Gaski muitala sámiin lei dološ áiggi dušše njálmmálaš muitalanárbevierru. Dalle eai gávdnon cállojuvvon girjjit. Muitalusat ja máidnasat muitaluvvo olbmox olbmui, ja nu dat seailluhedje daid (Gaski 1997:199-220.) Moai árvvoštalle muitalanárbevierru lea ain eallime ruovttuin, go dán áiggi oahppit leat gullan árbevirolaš muitalusaid ruovttus, dehe eará báikkiin mat eai leat girjjiide cállojuvvon. Informánta A lohká go oahppit leat gullan muitalusa njálmmálaččat ovdal, de lea álkit sidjiide čuovvot mielde go girjjis muitaluvvo seamma muitalus.

Informánta A joatká ja lohká ahte su mielas lea dehálaš álggahit ođđa fáttáid muitalusgirjjiiguin, ja hupmat ovddalgihtii fáttáid birra ja nu oččodit ovdan ohppiid dieđuid.

Lea nu ahte oahpaheaddjit dávjá atnet ságastallama bargoreaidun ja gaskkustanmetodan. Ulbmil ságastallamiin lea oahpásnuhtit ja láidestit ohppiid fáddái, čilget doahpagiid ja eará mii lea relevánta fáttá ektui. Ságastallamis ferte leat dihto vuogádat, ja lea oahpaheaddji gii jođiha ságastallama ja doalaha ohppiid bissut relevánta ságastallamis nu ahte eai spiehkas eará áššiide ja fáttáide mat eai gula ságastallanfáddái. (Wicklund 20009:62-63.)

Dákko maiddái guorrasetne Wicklunda fuomášumiide dan dáfus go lohká ahte lea dehálaš ohppiid ráhkkanahittit ovddalgihtii fáttá birra, nugo sámi árbevieruid birra, ja dasa maid sii galget bargat fáttá oktavuođas. Go oahppit álget lohkat ođđa girjji, de lea dehálaš sidjiide oažžut ipmárdusa man birra girji lea. Danne lea dehálaš ságastallat girjji birra fárrolagaid ohppiiguin. Motivašuvdna ja sáhkkiivuhta maid loktana ohppiin go besset ságastallat sisdoalu birra, mii boktá sin vuordámušaid girjái. Ulbmil dánna lea oažžut dieđuid maid oahppi máhttá ovddalgihtii sámi árbevieruid birra, ja dan vuođul heivehit oahpahusa ohppiide. Ságastallamis lea maid ulbmil movttiidahttit ja boktit oahppi beroštumi fáddái. (Wicklund 20009:62-65.)

Jus galgá oažžut mánáid beroštit dihto fáttain, vuolgá maid das, makkár beroštupmi oahpaheaddjis alddis lea fáddái. Informánta C lohká ahte jus ohppiid galgat oažžut guldalit, lohkat ja beroštit muitalusain, de dat lea gitta das makkár beroštupmi oahpaheaddjis lea girjjálašvuhtii. Son čilge dan nu ahte, oažžu váikko makkár girjji lohkat jitnosit ohppiide ja jus oahpaheaddjis lea beroštupmi girjjálašvuhtii, de son nagoda báidnit ohppiid ja sis šaddá beroštupmi girjjálašvuhtii. Dan fuomášumi beroštumi dáfus nanne maid Gaski go lohká ahte čeahpes muitaleaddji sáhttá čijahit muitalusa ja lasihit dasa ođđa oalgemuitalusaid mat dahket dan velá gelddolabbon dehe somábun guldalit. Viidáseappot ahte muitaleaddjis lea stuora friddjavuohta ivdnet muitalusa iežas vuogi mielde. (Gaski 2007:102.)

Hennig gii čállá girjjálašvuoda ipmárdusaid birra, lohká ahte oahpaheaddjis ferte leat alddis mokta ja beroštupmi lohkat. Sus ferte maid leat lohkangealbu ja máhttit movttiidahttit ja čalmmustahittit iežas lohkanilu ohppiide. Viidáseappot maid oaivvilda Hennig ahte oahpaheaddjestudeanttaid, geain ii leat lohkanberoštupmi, galggašii ávžžuhit eará oahpu váldit danne go girjelohkan lea dehálaš oassi olles oahppamis. (Hennig 2011:125.)

Muitalusain leat máŋga ipmárdusdási mat geasuhit lohkkiid iešguđetge lágje. Munno informánttat lohket muitalusat leat oba geasuheaddjit eanas ohppiide, ja eai leat galle olbmo geat eai liiko muitalusaide. Informánta A lohká muitalus lea guoimmuheapmi ja

guoimmuheami bokte sáhttá seammás neavvut ja rávvet. Fáttá barggadettiin lea muitalus buorre vuohki váldit vuoiŋŋastanbottoža gos muitala muitalusa ja dan maŋŋil leat oahppit fas vuokŋásat bargagoahtit viidáseappot fáttain.

Vuolab lohká ahte máinnas lea dego oahpaheaddji, go ovdalaš áiggi máidnasat muitaledje ja oahpahedje árbeviolaš sámi bargguid birra nu go boazodoalus, eanandoalus, oaggumis, mehciin lubmemis ja nu ain. Dákko bokte besset oahppit gullat bargguid birra ja oahppat bargguid muitalanárbevieru bokte. (Vuolab 1995:35.) Joks maid nanne go lohká ovdalaš áiggi ohppe mánát árbevieruid bargguid bokte danne go sii ledje mielde buot bargguin ja doaimmain. Go mánná beassá bargguid bokte oahppat, de dat muitá buorebut sihke doahpagiid ja bargguid, ja maid oahppá. Otná mánáin ii leat vejolašvuhta searvat buot doaimmaide, go skuvla ja ollu eará fálaldagat váldá ollu áiggi. (Joks 2008:24.)

6.1.1 Váilevašvuodat sámi mánáidčáppagirjjálašvuoda girjjiin

Mii guoská čáppagirjjálašvuoda váilevašvuodaide, de munno informánttat lohket leat mánggat ášsit maid sii váillahit sámi čáppagirjjálašvuoda girjjiin. Dat leat ovdamearkka dihte girjjit nuoraide, meahcásteami, sámi árbeviolaš bargguid birra, ja sámi fáttáid birra, ja muitalusgirjjit main leat ollu sámi muitalusat mat leat čohkkejuvvon iešguđetge sámi guovlluin. Informántta B logai ovta suohkanis sáhttet leat ollu muitalusat mat gullet dohko, ja leat báikkálačcat, dakkár máidnasat mat mannet olbmos olbmui njálmálačcat. Go oahpaheaddjit ohcalit dakkár girjjiid, de leat Qvigstad muitalusat evttohan veara. Hirvonen muitala Qvigstad birra gii lea čohkken muitalusaid miehtá sámis mat leat oahppásat 1900 logus. (Hirvonen 2018: 66-79). Muitalusat lea dološ sámi árbeviolaš muitalusat. Munno oaivila mielde galggašii eambbo atnit daid muitalusaid ja máidnasiid erenoamážit skuvllas, go Gaski ja Solbakk deattuheaba ahte Qvigstad muitalusčoakkáldat lea buot buoremus gáldu sámi muitalusaid ja máidnasiid dáfus. Qvigstad muitalusčoakkáldat lea buorre gáldu oahppat sámi historjjá ja sámi árbevieruid birra. Gaski ja Solbakk maid lohká dat muitalusat speadjalastet áiggi, dili ja jáhkuid. (Gaski & Solbakk 2004:10-11.) Go oahpaheaddjit váillahit eambbo girjjiid mat leat sámi árbeviolašmuitalusat ja máidnasat, de galggašii lohkat daid muitalusaid ohppiide.

Munno informánttat maid lohket ahte almmuhuvvojit beare unnán sámi girjjit mánáide ja nuoraide. Oahpaheaddjit šaddet dávjá atnit oahpahusas daid seamma girjjiid mat eai leat geasuheaddji ohppiide, ja eaige atte motivašuvnna lohkat daid seamma girjjiid ovttat lágje. Galggaše leat eambbo girječállit geat čállet sámi mánáide. Jansson maid lohká ahte leat beare unnán sámi girjjit buot geavahansurggiin, ja lea ballu nuorat masset čállinvuogi ja giellamáhttu jus sidjiide eai leat doarvái girjjit mat geasuhit sin lohkat (Jansson 2002:112). Joks fas čállá ahte ovdalaš áiggi mánát besse mielde buot árbeviolaš bargguin ja doaimmain. Nu sii lunddolaččat ohppe bargat vuđolaččat ja darvehedje oahpu ja máhtu ja doahpagiid namahusat báhce maid muitui.(Joks 2008:24.) Dán áiggi mánát eai beasa leat mielde buot boazodoalu jahkeáigodagaid árbeviolaš bargguin danne go skuvla váldá áiggi, ja danne ii leat nu álki vuolgit ealu lusa, nugo dálve-, čakča- ja giđdagárddástallamiidda. Oppalaččat sáhttá dadjat ahte mánát eai beasa oahppat bargguid mat gullet boazodoalu jahkodahkii. Otná áigásáš mánain váldá skuvla ollu áiggi, ja de sis ii leat vejolašvuhta leat mielde vuođđoealáhusa bargguin ja dainna lágiin masset dasa gullevaš oahpu ja máhtu. (Joks 2008:31.)

6.2 Oahpaheaddjit ja sámi árbevierut sámi mánáidčáppagirjjálašvuoda girjjiin

Dán goalmmát kapihtalis mii lea nubbi oassi, galge guorahallat ja digaštallat mat oahpaheddjiid mielas leat árbevierut mánáidgirjjálašvuodas. Buot oahpaheaddjit ledje ovtaaoivilis mii lea sámi árbeviolašvuhta sámi čáppagirjjálašvuodas. Buohkat lohket ferte leat sámegillii čállojuvvon ja sápmelaš čállán girjji jus galgá gohcoduvvot dat leat sámi girjin.

Informántta E lohká ahte diehtu ja máhttu sámi árbevieruide ja kultuvrii ferte leat girječállis, jus galgá nákcet čállit nu ahte duohtavuohta boahtá ovdan sámi kultuvrra birra. Fredriksen maid doarju informántta E go son deattuha ahte dus ferte leat árbeviolaš diehtu ja máhttu go galggat ollislaččat dovdat árbeviolaš bargguid. Jus dat máhttu vailu, de ii máhte bargat árbeviolaš bargguid ollásiidda ja nu mo góibiduvvo. Jus dus ii leat árbeviolaš máhttu ja diehtu, de it máhtte bargat árbeviolaš bargguid ja dainna lágiin sáhttet bárttit ja boasttuvuođat čuožžilit. (Fredriksen 2012:40-47.) Sáhtte namuhit ovdamearkka boazodoalus, jus dus ii leat máhttu ja diehtu árbeviolaš guoh toneatnamiid birra ja guođohanmálliid birra, de buktá dat stuora hástalusaid ja váttisvuoduid. Letne gullan geas geas vailu dát máhttu ja diehtu, son ii máhte ealu lágidit rievttes eatnamiidda rievttes áigodagaide nugo ovdamearkka dihte guođoha ealu árra čavčča duoddaris maid lei galgat seastit giđđaguohatumii gos ii leat nu ollu muohtha

go vumiin. Dat mielddisbuktá duottar čiegarduvvo ja guohtun giđđii šaddá váttis go vumiin lea ollu muohta. Dán sáhttá seamma lágje veardidit girječállimiin maid. Jus sus, gii čállá, ii leat máhttu ja diehtu sámi árbevieruid birra, de ii máhte daid birra čállit nu ahte dat šaddá jáhkehahti. Sara lea atnán *siida* doahpagiid eatnigiellasis. Son deattuha dan son lea dahkan dihtomielalaččat danne go dat sámegiel doahpagat eai gávdno eará gillii čilgejuvvon. Go galgá daid čilget eará gillii, de ii leat šat seamma sisdoallu ja dat mágssolašvuohota mii doahpagis lea, ovdamearkka dihte boazodoalu árbevirolaš doahpagiid namahusaide eai gávdno jorgaluvvon sánit mat čilgejtit sáni sisdoalu ja mearkkašumi. (Sara 2013: 13-16.) Kultuvrralaš duogás máhttu lea dehálaš, čállá maid Gaski go son lohka kulturduogás, giellamáhttu ja máhttu girjjálaš metodaid birra lea dehálaš teakstaáddejumi hárrái. (Gaski 1997:210.)

Gaski maid čállá ahte lea earru máhtu ja dieđu gaskka. Máhttu lea juoga maid oažžut vásáhusaid bokte, ovdamearkka dihte “mun máhtán sámegiella” dehe “mun máhtán láibut”, dan sadjái go lohkat mun *dieđan* sámegiela birra juoidá, dehe mun *dieđan* láibuma birra juoidá. (Gaski 2012: 41.) Diehtin ii gáabit vásáhusaid. Seamma guoská maid árbevieruid čállimii. Son, geas ii leat máhttu ja duogás sámi kultuvrras ja kultuvrra birra, lea jáhkkimis dušše lohkan dan birra. Dat mearkkaša ahte sus lea dalle dušše diehtu dan birra ja nu maiddái ii oaččo fárrui oppalašvuoda go ii máhte ja hálldaš sámi árbevirolašvuoda doahpagiid, bargovugiid, kultuvrra, gulahallama ja dan servodaga/birrasa siskkáldas kodaid.

Munno dulkojumi mielde Gaski oaivvilda dan, ahte olmmoš gii lea riegádan dihto álbgogii, son dovdá buoremusat iežas kultuvrra ja árbevieruid, son máhttá ja dovdá siskkáldas kodaid mii addá sutnje čehppodaga ja máhtu hutkat sámi čáppagirjjálašvuoda teavsttaid. Moai letne ieža čállán árbevirolaš máidnasiid, ja letne vásihan iežame árbevirolaš máhtu ja dieđu stuora veahkkin ja doarjjan. Munnos lei ovdalaččas juo báikkálaš diehtu ja máhttu siskkáldas kodaid birra, mat gullet ja doibmet árbevieruid ektui go hábmiime máidnasiid. Dan kultuvrra, masa lea riegádan ja mas lea bajássaddan, olmmoš dovdá buoremusat ja nu šattadettiin háhkan alccesis oahpu ja máhtu dovdat siskkáldas kodaid daguin ja teavsttain. Dat lea dakkár olbmos gii dovdá kultuvrra siskkáldas eallima.

Joks lea čállán mánáid oahppama birra boazodoalus. Son čállá ahte lea dehálaš mánnaí juo unnivuoda rájes beassat fárus buot bargguin ja doaimmain mat leat boazodoalus jus galgá oahppat ollislaččat árbevirolaš bargguid ja dan oahpu fievriridit fas boahtte bulvii. (Joks 2008: 22, 24, 27.) Gutterm maid juohká *diehtima* ja *máhftima* doahpagiid ja lohká ahte *diehtit-*

doaba čatnasa eanemus teorehtalaš máhtolašvuhtii, ja *máhttit*- doaba fas čehppodahkii. Son čilge dien guovtti doahpaga nu ahte jus olmmoš diehtá juoidá, de ii sáhte dáhkidot dan ahte son máhttá dan barggu. (Porsanger & Guttorm 2011:41.) Kuokkanen maid čuoččuha ahte árbevirolaš barggut leat vuodđun njálmmálaš árbevieru muitalusaide ja ahte leat hábmejuvvon bargguid vuodđul maid ohppe vuorrasii. (Kuokkanen 2009:44-45).

Munno dutkanmateriálas informánttaid bokte boahtá maid ovdan ahte sámi árbevirolaš muitalusain leat ollu neavvagat ja rávvagat maiguin guldaleaddjít ja oahppit sáhttet iežaset identifiseret danne go dat leat ohppiide oahpes fearánat. Balto gii ieš leat guhká bargan sámi oahpahusáššiiguin, lohká ahte máidnasiid ja muitalusaid bokte ohppet mánát njuolggadusaid, árvvuid ja morála maid rávisolbmot hálíidedje gaskkustit boahtte bulvii. Muitalan árbevierru lea stuora oassi sámi bajásgeassinvuogis. Muitalus lea earenoamáš buorre vuohki, sihke váhnemiidda ja fulkkiide, nevvodit mánáid rievttes geainnuid ala. Sámi árbevirolaš nevvodeamis eai muhtumin gieldán mánáid, muhto sii nevvodedje dávjá muitalusaid ja dáhpáhusaid bokte (Balto 1997:49-52.) Girjjis *Kulturmáhttú* boahtá maid ovdan mo dološ áiggi nevvo ja bajásgesse mánáid máidnasiid bokte. Ovdamearkka dihte máinnastemiin dan ahte, jus manne iehčanassii johkagáddái, de sáhtii boahtit čáhcerávga ja váldit mánáid. Dainna lágiin sii hehttejedje mánáid eret sorpmis. (Solbakk & Solbakk 2005:80.).

Sámi dutkit Gaski (2012:42), Sara (2010: 42-49), ja Fredriksen(2012:41-48) deattuhitge dan ahte go lea oahppu ja máhttú árbevieruid birra, de dus lea olles diehtu ja máhttú nu go mat čállit sámi girjjiid mat leat sámi árbevieruid birra. Easkka dalle go lea sihke oahppu ja máhttú, dovdá olmmoš siskkáldas kodaid ja nyánssaid mat leat čatnasan gillii, vieruide, daguide, oskui, árbevirolaš bargguide, biktasiidda, eallinvuohkái ja dovdá ollislaččat sámi árbevieruid ja kultuvrra. Nuppe dáfus lea nu ahte, jus daid ii diede iige máhte, de sáhttá dat dagahit stuora boastuipmárdusaid ja vahágiid nu go ovdamearkka dihte dagahit giellasiid, giela veahrtudeami, bogostahkame ja gártat badjelgeahčahassan.

Dás háliidetne váldit ovdamearkka ain boazodoalus, mii munnuide lea oahpis. Boazodoalu ferte dovdat čađat jus galgá nákcet bargat bargguid mat gullet dása ja šaddat oahppan boazobargin. Vuosttaš maid ferte oahpahallat leat bealljemearkkaid dovdat. Dasto máhttít bagadallat makkár boazu lea nu go čoarvedagu, guolggaid ja daid dovdomearkkaid, bohcc ealagearddi ja luondu ipmirdit. Ferte maid dovdat báikkiid ja duovdagiid go galgá vánddardit guovlluin gos bohccuid guodđoha. Dása sáhttá maid váldit ovdamearkkaid duojis dáinna iežame muitalusain:

De lei muhtin nisu gii lei iehčanas ja oaivvildii máhttut dikšut gápmasiid ja goarrut daid gáman. Son lei lohkan girjjis movt gápmásiid dikšut ja movt daid goarrut. Álggos son vuosšái osttuid ja vuosšái gápmásiid osttus ja de vuoiddai ja goikadii gápmásiid. Dat bulle ja skoarččage visot ja nu eai dieđusge anihan masage. Nubbi nisu galggai obbet bittuid alccesis, ja goarui guokte čippi oktii ja guokte gáva oktii. Son lei maid dušše lohkan girjjis movt goarrut bittuid.

Dát muitalus sáhttá govváduussan dasa mo sáhttá geavvat jus ii leat máhttua, muhto dušše diehtu muhtun ášsis. Dat guoská maiddái dasa, jus muhtun geas ii leat diehtu iige máhttua nu go sámi árbevieruin ja doahpagiin, hálida čállit fáddágirjji, dehe čáppagirjjálašvuoda girjji daid birra. Sus vailu vuodđogelbbolašvuohatá ášsis, dat ollislaš máhttua ja diehtu, su ektui gii dovdá sámeallima ja kultuvrra čađat. Go vuodđogelbbolašvuohatá vailu, de gártá dávjá ovttageardánis giella ja duohtavuohta ii boađe ovdan go ii máhte sámiid árbevirolaš giela ja doahpagiid, ja iige dovdda servodaga siskkáldas kodaid. Okta bealli dás lea maid jávohismáhttua mii čatnasa dihtui ja máhttui. Moai letne ieža vásihan dan ahte boazodoalus lea ollu jávohismáhttua boazobargiid gaskkas go ságastallet boazodoalu birra. Boazobargiid lea lunddolaš ságastallat gaskaneaset boazodoalu fágagielain ja siskkáldas kodaiguin go lea sáhka boazobargguid birra. Earáide, geat eai leat dán ealáhusas, lea váttis ipmirdit man birra lea sáhka nu go ovdamearkka dihte *biedđganitj* ja *moladit* doahpagat. “*Eallu biedđgana ja moladedje bohccot; go eallu biedđgana, de šaddá eallu guovtte dehe mágga lahkkiá*. Ja “*de lea bahá ahte bohccot moladit*”, mii fas máksá ahte bohccot láhppet eanas ealu.

Munno gažaldahkii maid oahppit sáhttet oahppat čáppagirjjálašvuoda girjjiin, ledje informánttain ollu oaivilat. Sii oaivvildedje ahte lea dehálaš atnit sámi mánáidčáppagirjjálašvuoda girjjiid oahpahusas. Fáddábargguid oktavuodas sii lohke dehálažžan atnit dakkár girjjiid go dain besset oahppat doaimmaid, bargguid, doahpagiid ja eallinvugiid birra. Govain sáhttá oaidnit ávdnasiid ja biergasiid mat eai soaitte adnojuvvot odne šat. Dákkár girjjiin ja govain sii besset oahppat sámi historjjá birra.

Muitalanárbevierus lea leamašan stuora sadji sámi mánáidbajásgeassimis, lohká Balto, ja lohká viidáseappot ahte lassin váhnemiidda, de maiddái fuolkkit bajásgesse ja nevvo mánáid muitalusaid bokte (1997:50). Informánta A lohkáge sámi čáppagirjjálašvuoda girjjiin leat ollu buorit neavvagat mat sáhttet leat buorit vuogit oahppat ovdamearkka dihte olmmošvieru. Dainna dajaldagain informánta nanne ja duođašta Balto fuomášumiid. Moai letne ieža mánávuoda rájes juo vásihan neavvagiid ja rávvagiid leat ollu vižžojuvvon árbevirolaš muitalusain. Okta ovdamearka dasa lea dat go muitaluvvo jus akto manná meahccái, de sáhttá

geavvat riebana seaibbi vuollái. Dat dieđusge mearkkaša dan ahte sáhttá láhppot jus akto manná meahccái. Mielasteame atne dákkár rávvagiid ja neavvumiid leamašan ávkkálažžan iežame mánnávuodas, ja maid dalle go alddáneame ledje smávva mánát. Diekkár rávvagiid ja neavvagiid bokte guorrasedje mánát ja jeagadedje ja dalle ii dárbašan šat digaštallat manne ii sáhte/oaččo/beasa ja juoga lea nie ja ná.

Sámiin ii leat nu guhkes čálalaš historjá, ja sin historjá lea eanas čohkkejuvvon muitalusaide maid njálmmálaččat leat muitalan buolvvas bulvii. Kuokkanen deattuhage ahte máinnasteami árbevieru bokte mii oahppat máttuideamet ja sin eallima birra, sámi máilmioainnuid, bargguid, vieruid, árvvuid ja sin beaivválaš birgejumi birra lassin doahpagiidda. (Kuokkanen 2009:60-65). Moai letne informánttain C ja Kuokkaneniin ovdaaoivilis das ahte muitalusain oahppá ollu sámi árbevirolaš bargguid ja doaimmaid birra. Go lea muitalus ovdamearkka dihte goadástallama birra, de oahppá doahpagiid, vieruid ja dábiid goadástallama birra, jus daid ii beassá ruovttus dahje eará sajis oahppat. Dat lea dehálaš dán beassá oahppat juobe girjjálašvuoda boktege. Ballu lea jus dat eai čállojuvvon girjin de massit mii ovtta oassi sámi árbevieru oahppu ja máhttu, ja historjámet duogáža. Dán dáfus moai oaivvildetne girječállit galggaše jearahallat ja čohkket dieđuid, nugo doahpagiid, namahuasd, sámi eallima, vieruid, oskku ja dábiid birra vuorasolbmuin, ja sis geain lea vel máhttu ja diehtu min sámi árbevirolaš eallima birra. Dákko bokte nákcet doarjut ja nannet sámiid árbevieru ja kultuvrra seailluheame boahttevaš buolvvaide.

6.3 Sámi mánáidčáppagirjjálašvuoda girjjit oahpahusas

Dán njealját kapihtalis mii lea goalmmát oassi, galge guorahallat ja digaštallat mo oahpaheaddjit barget girjiiguin skuvllas. Digaštalle man dehálaš lea oahpaheddjiid mielas dat ahte sámi árbevierut bohtet ovdan sámi mánáid čáppagirjjálašvuoda girjiin. Lassin guorahalle ja digaštalle makkár govaid oahpaheaddjit háliidit sámi čáppagirjjálašvuoda girjiin, ja movt informánttaid oaiviid mielde *Áhkubiebmu* girjji sáhttá adnojuvvot oahpahusas.

Eanas informánttat oaivvildedje ahte girjjálašvuodagirjiin ohpet oahppit ollu sámevuoda birra, ja lea nu mágssolaš atnit daid oahpahusas. Sii oaivvildedje oahppit ohpet bargguid ja fáttáid anedettiin čáppagirjjálašvuoda girjiid danne go dat leat girjjit mat leat sámi doaimmaid birra, nu go bargut, doahpagat, eallinvuogit, dadjanvuogit ja govat mat govvidit dilálašvuodaid.

Nu go ovdal namuhuvvon čujuhettiin sámi dutkiide, de bessel mánát máinnasteami bokte oahppat máttuideaset ja sin eallima beliid birra. Ja maiddái dan ahte máinnastanárbevierru lea pragmáhtalaš vuohki mánáide oahpahit árbevieruid birra. Kuokkanen (2009:60-65) ja Balto (1997:49-52) lohkaba árbeviolaš muitalusain lea vuodđu oahppat árbevieruid birra ja sámiid oktasaš kulturárbbi ja eallima birra ja muitaluvvojit dávjá servvoštallamiid oktavuođas. Dakko bokte oaivvildetne moai ahte nuoraid ja mánáid oahppanbirrasis ráhppojuvvojit odđa vejolašvuodđat muitalusaid bokte, ovdamearkka dihte mo sáhttá bargat ovttain fáttain dehe čoavdit váttisvuodđaid.

Informánta A logai ahte son atná sámi muitalusgirjiid oahpahusas, ja ahte son liiko álggahit odđa fáttaid muitalusain danne go dáinna lágiin oahppit muiet, ohppet ja ipmirdit fáttá buorebut. Seamma informánta logai maid liikot bures Vygotsky pedagogihkkii, danne go muitalus doaibmá dego šaldin oahpes dilis amas dillái. Moai letne ovttaoaivilis informánttain A daidda dieđuide. Ovdamearkka dihte doahpaga ja nama sisdoalu leat oahppan, de sahtát dan čatnat iešguđegelágán vásáhusaide. Dat veahkeha giela ráddjet ja muitit doahpagiid, nugo bargguid, vásáhusaid, reaidduid namahuſaid, ja ovtastallamiin earáiguin. Buot dát namuhuvvon eavttut leat mielde ovdánahttit oahpu ja máhtu árbeviolaš doahpagiidda ja namahuſaide. (Hinna ja earát 2016: 783-785.) Dát vuohki heive bures oahpahallanmállén skuvlii danne go lea fáddábargu árbeviolašvuoda birra. Dat šaddáge dego dakkár šaldi go beassá addit earáide oahpu ja máhtu, ja maiddái ieš oažžut oahpu oahpes dilis. Informánta lohkáge maid viidáseappot ahte sámi girjiid bokte bessel oahppit oahppat sámiid historjjá, lohkat ja oažžut movtta ieža álgit čállit muitalusaid. Loahpas informánta jearrala: gii muitala midjiide dološáiggi birra, jus dat girjjit eai daga dan!

Vuolab oaivvilda muitalus lea dego dakkár oahpaheaddji, mii muitala ja oahpaha movt olbmot galget bargat. Dat muitala nu go mat dan mo galgá beaskidit sávzzaid, gilvit buđehiid, málezit, duddjot ja ollu eará árbeviolaš bargguid bargat. (Vuolab 1995:34.) Fredriksen ges lohká, sus geas lea nanu máhttu ja oahppu kultuvrralaš siskkáldasvuhtii, na sus lea maid ipmárdus ja dovdá kodaid, árbeviolašvuoda, giellamáhtuid ja sámi kultuvrra.(Fredriksen 2012: 41-48). Moai sáhtte dan veardádallat sámi girječállin dan dáfus, go son gii máhttá čállit sámi girjjálašvuoda girjiid, sus lea nanu máhttu ja diehtu iežas kultuvrra birra. Son maid máhttá čállit báikkálaš muitalusaid báikkálaš kodaid vuodđul. Girječálli gii hálldaša ja máhttá iežas álbumoga siskkáldas kodaid, son lea nannoseamos girječálli čállit muitalusaid ja fearániid mat govvidit iežas kultuvrra. Dat mielddisbuktá maid dan ahte oahppit dovdet fearána sisdoalu ja sáhttet iežaset identifiseret fearániin danne go dat lea oahpis sidjiide. Go oahppit

bessel lohká fearániid, mat sidjiide leat oahppásat, de sáhttet sii movttáskit čállit sámegillii. Oahppit vásihit ahte sámegiella lea márssolaš go sáhttá čállit sámegillii, ja sámiid birra, ja lea árvvus adnojuvvon min servodagas. Mii guoská báikkálaš árbevieruide ja dan oahppamii, lohká informánta A ahte oahppoplána mielde galget oahppit oahppat sámi árbevieruid birra skuvllas. Informánta A maid lohká oahpaheaddjit galget oahpahit kulturárbbi birra danne go dat lea guovddáš elemeanta skuvllas, ja su mielas lea maid dehálaš vuhtiiváldit báikkálaš ja lagas birrassá árbevirolaš máhtuid.

Oahppoplána válđooasis boahtá ovdan ahte oahppit galget oahppat giela, sámi kultuvrra, árbevirolaš máhtu, doahpagiid, eallinvugiid ja sátneriggodaga birra. Oahppit galget beassat oahpásnuvvat sámi árbevieruide, sámi girjjálašvuhtii ja girječállimii. Muhto eanas informánttai lea dat ballu ahte sámi árbevierut jávket jus dat eai čállojuvvo girjjiide. Sii jerret gos muđui galget oahppit oahppat sámi árbevieruid birra jus daid eai oahpa ruovttus. Danne lea buorre ja dehálaš go girječállit čállet girjjiid main lea sámi sisdoallu. Dat maid danne go gávdnojít ruovttut gos eai oahpa daid birra. Ohppiid ruovttut leat iešguđetláganat. Muhtun ruovttuin eai soaitte oahppat sámi árbevieruid birra, ja dasa leat mánggat ákkat, nu go juo ovdalačcas letne namuhan, ja soitet ieža maid massán dieđu ja máhtu sámi árbevieruid birra bajásšattadettiin, ja nu ja eai nákce šat iežage oahpahit daid mánáidasaset.

Mii de guoská vejolašvuodaide mo bargat sámi čáppagirjjálašvuoda girjjiiguin oahpahusas, lohket eanas informánttat ahte gávdnojít ollu vejolašvuodat dasa. Informánta A muitala ahte sii barget sámegiel diimmuin juohke vahku árbevirolaš doahpagiiguin ja válđet juohke vahku odda sáni oahppamii ja guorahallamii. Sii dávjá válljejit doahpagiid čáppagirjjálašvuoda girjjiin danne go daid sii leat lohkan ja barggu čáđahit bargojoavkkuin. Oahppit galget njálmmálačcat čilget maid doaba máksá, makkár sátneluohkkái gullá, galle vokála ja konsonántta leat, lea go antonyma vai synonyma. Informánta muitala sii barget ollu sámi doahpagiin vai oahppit oahpásnuvvet doahpagiid sisdollui. Ságastallama ja ovttasdoaibmama earáiguin dan mii ovddida ohppiid sosiokultuvrralaš oahppanoainnu, ja buot oahppan dáhpáhuvvá njálmmálaš giela bokte ja sosiálalaš ovttasdoaibmamiin earáiguin. Oahpaheaddji lea dakkár *stellethuksejeaddji* (dá: stillasbygger). Lea oahpaheaddji bargu diehtit oahppi dási ja dan vuodul hukset bargguid vai oahppi ovdána ja beassá mannat viidáseappot. (Lyngnes & Rismark, 2007:64-65.) “*Stallet*” sáhttá čilget dainna lágiin ahte dat lea caggi maid oahppi dárbbaa oahppama vuolde. Ferte stallet, caggat oahppi nu ahte son oahppá. Sáhttá árbevirolaš bargguid bokte čáđahit doaimmaid vai oahppi ipmirda fáttá buorebut. Go oahppi lea oahppan ja ipmirdan movt čoavdit váttisvuoda, de sáhttá válđit cakkiid eret ja oahppi

beassá mannat viidáseappot oahppamiin. Jávohis máhttu lea maid oassin oahppamis. Keskitalo lohká jávohis máhtu oktavuoðas dan ahte oahppan dáhpáhuvvá dávjá giela bokte dalle go oahpaheaddji ságastallá ohppiiguin, neavvu, muitala ja bargá praktikhalaš bargguid fárrolagaid singuin (Keskitalo 2009:65). Dat mii lea buorre go oahppit bargat joavkuin lea dat go de bessel ságastallat ja čilget áššiid mielohppiide, geain ii leat giellamáhttu nu rikkis. Dainna lágiin ohppet oahppit eambbo go bessel čilget ášši mielohppiide. Mielohppiin, geat bessel čilget earáide, loktana iešdovdu ja movttáskit oahppat eambbo doahpagiid, ja oahppit, geat eai dovdda sisdoalu doahpagiin, bessel fas oahppat mielohppiin. Munno árvvoštallama vuodul leage dehálaš ahte oahppit geat leat giellačeahpit ja oahppit geat eai leat nu nannosat gielalaččat bessel dainna lágiin ovdánit eambbo gielalaččat.

Munno guorahallamis bodii maid ovdan ahte lea dehálaš lohkat sihke okto, jitnosit ja joavkuin. Informánttat muitaledje maid ahte sáhttá dramatiseret muitalusaid ja dan oktavuoðas sáhttá ráhkadir ovdanbuktinlavddi, biktasiid, reaidduid, lávlagiid ja luđiid. Go oahppit bessel mielde hutkat ja hábmet ovdanbuktinlavddi, de gal šaddet oahppit nu ángirat ja servet olles váimmus bargguide. Sosiál-kultuvrralašoahppama njeallje oahppanoainnu mat leat čilgejuvvon teoriija kapiittal 2.3 vuolde, čilgejít mo oahppan dáhpáhuvvá. Jearahallamiid oktavuoðas bodii ovdán ahte girjjálašvuoda ja sámegieloahpahus gokčá dán njeallje namuhuvvon oahpančilgehusaid Vygotsky teorijaid vuodul.

Informántta A muitala árbevirolaš muitalusaid bokte sáhttit čilget váttis matematihka ohppiide jus sii eai oro ipmirdeame fáttá. Jannok Nutti lohká oahppit dárbbahit hukset matematihka ipmárdusa iežaset vuolggasajjiin ja oahpaheaddji bargu lea veahkehit dan ipmárdusa olahit. Ovdamearkka dihte dasa mii guoská sámi árbevirolaš mihtuide ja mihtidanvugiide nu go atnit sala dehe goartila mihtuid, ja maiddái mihtidit muohntaga assodaga soppiin dehe gorudin (Jannok Nutti 2010: 107-108.) Oahpaheaddji ferte hukset “stellega” oahppái vai ipmirdišgoahtá matematihka fáttáid. Jannok Nutti maid lasiha ahte oahpaheaddji bargu lea hukset oahppái matematihka ipmárdusa iežas vuolggasajis.

Go galgá ohppiid oahpahit lohkat, de leat sámi mánáidčáppagirjjálašvuoda girjjit buorit reaiddut danne go dain girjjiin leat oahpes áššit. Lassin dan bargui adnojuvvojit maid lohkanstrategijat.

Lohkanstrategijat leat dat bargovuogit mo earret eará oahppat lohkat, oažžut lohkanipmárdusa, lohkanleavttu buoridit, oahppat čiekjudit teavstta sisdollui ja oahppat sirret, erenoamážit daid osiid teavsttas maid háliida muitit. Munno mielas lea buorre ja ávkkálaš

atnit lohkanstrategijaid čáppagirjjálašvuodja girjjiid anedettiin danne go oahppit galget oahppat lohkat ja ipmirdit girjji sisdoalu oahpes fearániid bokte maiguin sii sáhttet iežaset identifiseret. Dat buktá ohppiide oahppanhálu go giellaseaset bessel lohkat oahpes áššiid birra (Anmarkrud & Refsahl 2010:13-25).

Dán áiggi leat ollu teknihkalaš veahkkeneavvut, erenoamážit digitála oahpporeaiddut. Munno informánttat maid muitaledje ahte sii atnet digitála oahppanreaidduid oahpahusas. Dat gávdnojít digitála oahppanreaiddut maiguin oahppit sáhttet ráhkadir elektrovnalaš girjji ja daidda čatnat ovttastuvvon teavsttaid. Ovttastuvvon teavsttat lea dat go bidjá oktii čállosiid, govaid, musihka ja filmmaid. Moai letne iežage vásihan oahpahusas go dainna reaidduin bargá, de lea ohppiid mielas dat gelddolaš, sii barget ángirit ja buohkat servet bargguide. Ja dan sáhttá atnit buot ohppiide, maiddái sidjiide geain leat oahppanváttisvuodat. Reaidduin maid sáhttá bargat okto ja joavkkus. Digitála reaidu lea buorre vuohki atnit dalle go leat bargame čáppagirjjálašvuodja girjjiigun skuvllas. Oahpaheaddji sáhttá lohkat jitnosit muitalusgirjji ohppiide, dehe oahppit sáhttet okto dehe joavkkus lohkat girjji. Maŋgil girjelohkama ráhkadir oahppit ieža čoahkkáigeasu, oaniduvvon muitalusa programmain. Dan bargui sáhttet bidjat govaid maid neahtas vižžet, ieža leat govven dehe iežaset tevdnejuvvon govaid. Sáhttá maid bidjat musihka, luodi dehe ieš oahppi hupmá báddema bokte. Oahppit hábmejít muitalusa vuogiset mielde, sáhttet lasihit ođđa oalgemuitalusa dehe sáhttet ieža čállit ođđa muitalusa. Oahppit sáhttet ieža válljet fáttá, persovnnaid, makkár áiggis lea muitalus dáhpáhuvvon, šájnjer ja nu ain.

Oahppoplána odasteami oktavuoðas boahtá ovdan ahte fágaid čiekŋalis oahppan deattuhuvvo. Dat mearkkaša ahte oahppit galget beassat čiekŋudit bargguide, hárjehallat, atnit máhtuid ja gálggaid iešguđet lágje. Ulbmil lea dat ahte oahppit galget áiggi mielde birget máŋgalágán fágalaš hástalusaiguin, sihke okto ja joavkkus bargat. Oahppit galget beassat guorahallat ja bargat iesheanalaččat. Sii galget beassat eambbo lohkat čáppagirjjálašvuodja girjjiid dainna ulbmilin vai sii bessel vásihit, fuomáshit, oahppat ja oažžut ipmárdusa eará olbmuid jurdagiidja ja eallin vásáhusaide girjjiid bokte. Moai letne *Oahppoplána Máhttolokten* oktavuoðas, mii dal lea doaimmas ja mas leat ollu oahppanulbmilat, vásihan ahte dan oahppoplána vuodul ii lean vejolaš čiekŋudit guđetge fágas ja dušše veháš guoskkahit osiid juohke fágas. Ođđa oahppoplána odasteapmi sáhttá addit eambbo vejolašvuodaid čiekŋalit bargat fágaiguin ja fáttáiguin. Dat rahpá stuora vejolašvuodaid bargat ja čiekŋudit sámi čáppagirjjálašvuodja girjjiide, mii fas mielddisbuktá vejolašvuodaid bargat eambbo sámi árbvieruiguin ja ovddidit kultuvramet ja giellamet.

6.3.1 Govat sámi mánáidčáppagirjjálašvuoda girjjiin

Govat leat dehálaččat sámi čáppagirjjálašvuoda girjjiin. Dan lohket eanas munno informánttat. Ja vel dakkár govat mat leat čielgasat ja fiidnát. Informánttat lohket govat addet eambbo ipmárdusa danne go oahppit bessel oaidnit govain makkár sámevuhta lea nu go reaiddut, biktasat, sámi eallin, orrunbáikkit nugo goahti, visttit ja nu ain viidáseappot. Informántta A deattuha dan ahte eai álohhii dárbbat leat govat girjjiin danne go min kultuvrii guoski muitalusat leat muitaluvvon muitalanárbevirromet bokte ja dan sihke govaid ja girjjiid haga.

Vuolab lohká dološáiggi muitaledje muitalusaid njálmmálaččat danne go muitalusat ja máidnasat eai lean vel ožzon girjehámi. Máinnas lei olmmái ja áigeájanas, govat eai gáibiduvvon ja dat han eai oba leange ja mánát besse ieža govahallat. (Vuolab 1995:34.) Dat čájeha dan ahte govat eai leat álohhii dárbbašlaččat, ja dalle bessel oahppit govahallat muitalusa ipmárdusaset ja oaivviset mielde. Moai letne ieža nai vásihan go letne muitalan muitalusa govaid haga ja nu addán ohppiide vejolašvuoda ieža govahallat jurdagiiguin, ságastallamiid ja tevdnema bokte. Informántta A logai ahte jus leat govat girjjis, de galget dat leat eanet geasuheaddjit, leat buorit ivdnás govat mat govahallat bures muitalusa oasseváldiid. Informántta E deattuhii maid ahte govat leat dehálaččat danne vai oahppi beassá govaid bokte oahppat ja oaidnit biktasiin ja reaidduin muitalusa oasseváldiid gullevašvuoda. Guttorm čállá ahte sámi bivttasteapmi muitala gullevašvuoda ja biktasat leat máŋgaláganat. Sámi biktasat leat sihke suojit, ja árgabeaivválaš biktasat sápmelaččas. Oahppit besse oahpásnuvvat sámi biktasiidda govaid bokte mat leat girjin. (Guttorm 2007:86-88.)

Govaid ii sáhte iešheanalaččat sárgut vaikko gii, Ylimartimo lohká sámi govtagirjjiide gáibiduvvo sápmelaš dáiddár danne go son hálddaša ja diehtá sámi árbevieruid ja sus lea máhttu ja diehtu sárgut govaid sámi eallima ja kultuvrra birra. Dan dihte lea ge dehálaš ahte sápmelaččat ieža sárgot govaid geat dovdet ja dihtet mii lea sámi eallin. Sis lea alddiineaset jávohis máhttu, geat leat šaddan bajáš sámi bearrašis ja birrasis, ja sis lea oahppu ja máhttu hálddašit sámi govvásárguma. Sii máhttet ja dihtet maid guđe guvlui gullet sámi biktasat, mat leat nisson- ja dievdoolbmuid biktasat ja guđe áigodahkii biktasat gullet. (Ylimartimo 2000: 90-91.) Moai letne vásihan muhtun govvahábmejeddjiid geat eai leat hálldašan daid namuhuvvon osiid danne go sii leat sehkken bivttasvieruid geográfalaš gullevašvuoda ja anu.

Moai letne ovttaoaivilis informánta E:in ahte govat leat márssolaččat girjjiin vai oahppit bessel oaidnit guđe geográfalaš guvlui muitalus gullá go oidnet olbmuid biktasiid, daguid, báikkiid ja orrunbáikkiid govain. Go letne bargan ovttas govovahbmejedjiiguin iežame girječállimiid oktavuođas, de letne hui dihtomielalaččat čilgen govovahbmejedjiide makkár govat galget leat, dakkárat mat čájehit sámi duohtauoda ja guđe guvlui ja áigái čállojuvvon muitalus gullá.

Govat leat dehálaččat, eaige dušše čalbmevuoinjasteamit, muhto daid bokte bessel oahppit oahpásnuvvat iešguđet guovllu sámi biktasiidda, olbmuide, guovlluide ja orrunbáikkiide, ja daid vuodul sáhttá oahppi identifiseret iežas ja earáid. Govat muitalit ollu ja iige dárbbat leat nu ollu teaksta jus leat buorit govat mat leat mielde čilgeme fearána. Govat leat earenoamáš dehálaččat sámi čáppagirjjálašvuoda girjjiin danne go govain beassá oahppi oaidnit ollu sámi eallima birra. Dán áigásaš ohppiin ii soaitte buohkain nu ollu máhettu sámi eallima birra, ja dalle lea liige dehálaš govaid veagal muitalit ohppiide fearána birra. De beassá govain oaidnit makkár duođai sámi eallin lea, makkárat leat ávdnasat olggos oaidnit ja mo barget sámi árbeviolaš bargguid. Govain sáhttá oaidnit mii geavvá fearánis, go govva sáhttá dan muitalit ja doaibmat dakkár liigemuitaleaddjin.

6.3.2 Girji Áhkubiebmu

Oassin munno dutkanbarggus lei maid ovta dihto girjji árvvoštallan. Válljejuvvon girjji, *Áhkubiebmu*, leat guokte informántta atnán oahpahuas. Soai leaba guorahallan, árvvoštallan sámi árbevieruid girjjis ja movt dán girjji sáhttá atnit oahpahuas.

Informántta guovttos logaiga ahte dat lea boares girji, ja das lea eará sámegielsuopman go norggabeale danne go lea suomabeale olmmoš čállán girjji. Nubbi informánttain lohká girjji namma sáhttá addit boasttu ipmárdusa danne go sáhttá ipmirduvvot nu ahte lea áhkku gii borra bártni, dehe bárdni gii borra áhku biepmu.

Áhkubiebmu girji lea čállán suomabeale sámi girječálli, ja doppe soaitá leat dábálaš atnit áhkubiebmu namahusa mánáide geat lea oarbbisin báhcán ja dan dihte áhku luhtte bajás šaddan. Go girjji lohká, de boahtá ovdan ahte lea bárdni gii lea áhku biebmobárdni.

Hupmangielas sáhttá leat *sosioleakta* ja *idioleakta*. Sosioleakta lea ovtta soga hupmangiella ja sis sáhttet leat iežaset sánit, doahpagat ja dadjanvuogit movt sii hupmet dan sogas.

Ovdamearkka dihte lea Máze ja Guovdageainnu giliid sosioleavtta erohusa vearba *garahit* buđehiid (Máze) ja *gárvehit* (Guovdageaidnu) buđehiid. Ideoleakta lea fas ovttaskasolbmo hupmangiella ja sánit maid son ieš soaitá ráhkadan ja maid de atná beaivválaččat hupmangielas. (Palismaa & Eira 2001: 12-13.) Ovdamearkan dasa sáhttet leat sánit *gámšurola* ja *gámšuhodor*. Dat sánit muitalit makkár nissonolmmoš lea go lea erenoamáš hága. *Gámšurola* lea olle hágas nissonolmmoš ja *gámšuhodor* fas lea birgemeahttun hágas nissonolmmoš gii dakhá jogaid jávrin ja máhttá buot bargguid bargat. Daid sániid ja namahusaid lea Orbon Áslat Máret, Rávnná áhkku ráhkadan go son govahallá nissonolbmuid geat leat earenoamáš hágat. “Gámšu” lea njijnelas gumpe, ja dat lea nu ahte leat njijnelas gumppet mat álggahit bivddu, ja bivdet. Albma gámšsut!

Áhkubiebmu lea buorre sámi girji, mas leat buorit ivdnás, ealas ja čielga govat, lohkaba informánttat. Govaid bokte lohkaba oaidnán ahte lea dološ áiggi birra čállojuvvon ja oaivvildeigga dan dihte ahte ferte leat sámi árbevirolaš muitalusgirji. Nubbi informánttain lohká girjesárgu lea máhttán sárgut govaid juste nu mo sámi eallin lei dolin ja lea ožzon ollu sámevuoda mielde nu go detáljaid mas oaidná ahte girji lea dološ áiggi birra. Dat nannejuvvo maiddái govain go leat bessodatsabehat, dološ áiti maid gohcodedje njállan (áiti) ja birgenlahki gullá sámiid dološ eallinvuohkái. Informánttat oaivvildeigga go dušše geahčastat govaide, de das juo oaidná dat lea sámi muitalusgirji danne go govat ja sisdoallu govvida visot dološ sámi eallima. Govvahábmejeaddjis gáibiduvvo oahppu ja máhttu iežas kultuvrii ja sápmelašvuhtii. Son ferte leat berošteaddji olmmoš gii dovdá fáttá masa galgá hábmet govaid jus galget šaddat eallasat ja duohtavuođa boahtit ovdán govain. (Ylimartimo 2000:90-91.) Ja dan dakhá dán girjjis.

Girjji praktikhalaš anu dáfus oaivvildeaba informánttat ahte dát girji heive bures oahpahussii danne go das leat ollu buorit bealit maiguin sáhttá oahpahit ohppiid. Dát girji sáhttá heivehuvvot buot fágaide ja sáhttá atnit fágaidrasstildeadji girjin. Sámegielfágii heive bures go girjjis lea rikkis sámegiella, ollu namahusat, doahpagat, sámi árbevieruid birra ja sáhttá maid atnit lohkamii ja čállimii. Eará maid sáhttá bargat sámegielas lea dramatiseret muitalusa, atnit vuodđun dán muitalusa go galgá čállit ođđa sámi muitalusaid. Servodatfágas sáhttá oahppat dološ sámi historjjá birra nu go muitalus lea muitaluvvon dološ áiggis, ee. dološ atnubiergasiid, goddebivddu, geađgeáidi, mii lea bordojuvvon gedíiguin maid atne goddebivddus, dološ bivdovuogi, reaiduid, muorragubaid/-soahtuid ja orrunbáikkiid birra.

Govat maid govvidit dili dakko bokte go oaidná áhkus lea boahkána vuolde čoavddagihppu gos áhku opmodat lea. Das ohpet maid árbevirolaš birgenlági birra nu go dan ahte nuorra olbmot eai birgen boares olbmuid haga ja nu barge veahkkálagaid mánáiguin. Boaresolbmot fas eai birgen nuorra olbmuid haga danne go dan áiggi eai gávdnon boarrásiidsiiddat gosa mannat. Biebmo- ja dearvvašvuodáfágas sáhttá oahppat ráhkadir borramušaid mat girjjis ráhkaduvvojit. Duodjefágas sáhttet ráhkadir daid maid oidnet govain, reaidduid ja atnubiergasiid ee. beasselihti, guvssi mas muorranamat, holgga, náhpi, uvssoha, gerresa ja biktasiid. Eará maid sáhttá oahppat leat biktasiid namahusaid mat leat govain nu go šávkká, nuhtohiid, gápmagiid, góllohiid ja čázehiid. Lášmmohallamis sáhttá vánddardit meahcis seahkkaselggiid ja ohcat sullasaš báiķiid mat girjjis leat. Luondufágas sáhttá oahppat namahusaid nu go muorramáttta, muorragiera, eatnamiid namahusat, muoraid ja šattuid namahusaid. Risttalašvuodá, osku, eallinoainnu ja etihka fágas sáhttá oahppat mii lea riekta ja boastut, ovdamearkka dihte dasa mii guoská go boares áhkku válldii iežas lusa oarbbesmáná, mo Áhkubiebmu ja reaŋgat juogadedje bargguid ja mo sii hákhe birgejumi. Boastut fas lea go ovdamearkka dihte Állan guhkkosašáddjá rivvii mállása Áhkubiebmu ja reaŋgagin. Musihkkafágas sáhttá ráhkadir luodi dehe lávlaga Áhkubibmu. Rehketfágas sáhttá atnit girjji ovdamearkka dihte digaštallat ja árvvoštallat mii lea állan guhkkodat, man guhki dat lea, cegget lávu, atnit mihtuid man guhkit galget leat lávvomuorat, man stuora saji lávvui dárbba ja nu viidáseappot.

Informántta guovttos lohkaba dán girjjis lea ollu morála birra. Soai namuheaba Áhkubiebmu leat vuoggalažžan go juogadii bargguid, golliid ja silbbaid ja veahkehii oažžut Állan guhkkosaš ádjá skávžžáid ruovttoluotta. Juohkehaš sáhttá birget vaikko ii leat nu stuoris šaddui ja vuollánit ii ábut. Áhkubiebmu lei maid juonalaš ja fuobmái movt birget Állan guhkkosaš ádjáin.

Čeahpes muitaleaddji sáhttá čijahit muitalusa ja lasihit dasa odda oalgemuitalusaid mat dahket eanet somábun guldalit muitalusa, čállá Harald Gaski (2007:102). Munno mielas orui dat dajaldat heiveme bures govaide mat leat Áhkubiebmu girjjis. Govat leat čábbát, čielgasat, eallasat, ivdnát ja leat ollu detáljat sihke olbmuin, luonddus, atnubiergasii ja reaidduin mat čájehit makkár duohtavuohta lei sámi dološ eallimis. Čeahpes govavadáiddár sáhttá vel eambbo lasihit, čijahit govaid nu ahte šaddet vel dárkileappot, eallaseappot, ivdnát ja eambbo detáljat vel bohtet oidnosii. Áhkubiebmu girjji govavadáiddáris vuhtto oahppu ja máhttu sámevuhtii danne go lea nu ealasin ožžon govaid ja visot sámi eallima lea máhttán govvidit smávva detáljaiguin. Kuokkanen lohká njálmmálaš árbevierru lea sámi girjjálašvuohita ja

historjjá, ja viidáseappot ahte eamiálbmogiid historjjás dávjá deattuhuvvojit dihto báikkit ja makkár čanastagat olbmuin leat daidda báikkiide. (Kuokkanen 2009:60-65). Munno mielas orro dán muiatas maid boahime ovdan boazosápmelaččaid álgua boazoealáhussii go lea goddebivdu birra. Lea boazosápmelaš gii lea čállán dán muiatalusa, ja son lea máhttán govvidit visot sámi árbeviolaš dološ bargguid, bivdovuogi, orrunbáikkiid ja eatnamiid.

Áhkubiebmu girji lea dološ árbeviolaš muiatalus ja easkka ođđasit áiggis almmuhuvvon čálalaš hámis girjin. Moai letne áibbas ovta oaivilis informánttaiguin go lohkaba girjji leat sámi árbeviolaš muiatalussan. Dat lea ge maid duogáš dasa go letne válljen dán girjji. Moai árvvoštalaime dan leat dološ árbeviolaš girjin sihke govaid ja sisdoalu dáfus, ja dan dihte háliideimme gullat informánttain maid sii oaivvildit dán girjái mii guoská árbeviolašvuhtii. Informánttat sihke duođašteigga ja nanniiga munno árvvoštallama danne go soai maid deattuheigga girjji leat buorren árbeviolaš girjin maid sáhttá atnit veahkkereaidun oahpahusas ja nu oahpahit sámi árbevieruid birra buot fágain.

Máhttoloktema oahppoplána olis namuheimme giella, kultuvra ja girjjálašvuoden oasi, ja dan váldooassáí gullet maid oahpásnuvvan ja oahppan ee. giellaatnima, sámekultuvrra, eallinvugiid, árbeviolaš máhtu, doahpagiid ja sátneriggodaga birra. Oahppit besset oahpásnuvvat sámi árbevieruide, girjjálašvuhtii ja girječállimii. Munno árvvoštallama vuodul čuoččohetne ahte *Áhkubiebmu* girji gokčá muhtun daid namuhuvvon eavttuid.

6.4 Metoda digaštallan

Dutkanbargui letne atnán kvalitatiiva metoda, nugo ovdalaččas juo namuhuvvon. Dutkama letne vuodustan kvalitatiivvalaš jearahallamiiguin. Válljejuvvon jearahallanvugiin letne háhkan informánttain dieđuid ja ožžon daid bohtosiid maid čilgiime njealját kapihtalis. Buot jearahallamat leat báddejuvpon, transkriberejuvpon ja leat adnojuvpon analyserenproseassas digaštallat bohtosiid relevánta teorijaid ektui. Daid jearahallamiid nanne Johannesen ja earát (2006:145-160) go lohket dat leat váldoinformánttat mat leat váldogáldut dutkanbarggus, čoavdit dutkančuolmmaid. Postholm ovddida teorijas oasis, oahpaheaddji perspektiiva galgá leat guovddážis go čađaha jearahallamiid skuvllas. Dat lea dutki duohken makkár dieđuid son háliida hahkat jearahallamiid oktavuodas, ja maid son almmuha. (Postholm 2011:22-35.)

Dainna kvalitatiivvalaš dutkanvugiin olaheimme bohtosiid mat vástidedje gažaldatčuolmmaid, ja bođii das go lei čielga struktuvrralaš plána maid sáhtii čuovvut juste nugo Kvale & Brinkmann (2018: 21-23) čujuheaba.

Dutkamis lea jáhkehahttivuohta dehálaš, ja moai árvvoštalle ahte dát dutkanbargu lea jáhkehahtti. Duogáš dasa lea go dutkanbarggu sisdoallu lea sápmelašvuoda ja sámi árbevieruid birra. Buot válljejuvvon informánttat leat sápmelaččat, sámegielagat ja leat bajásšaddan sámi bearrašis ja birrasis, ja hálldašit sámiid siskkáldas kultuvrralaš kodaid. Sii leat sámeskuvlaid oahpaheaddjit ja oahpahit sámegelfágain. Nuppi dáfus, jus dán dutkosa čadahivččii ođđasit eará skuvllain, de vissásit attášii dat eará bohtosiid. Dat lea go eai leat seamma dutkit, informánttat ja skuvllat, ja dain informánttain soitet leat eará dieđut ja beroštumit sámi mánáidčáppagirjjálašvuhtii ja sámi árbevieruide go sis, geat ledje munno informánttat.

Munno váldoiinformánttain ledje beaktulis ja ávkkálaš dieđut danne go sin álgoálbmot diskursa lea oktasaš. Dat bođii bures ovdán dakko bokte go informánttain lei sullii seamma diehtu ja máhttu sámi árbevirolašvuhtii. Buohkat čájehedje beroštumi ja atne árvvus dán dutkanbarggu danne go dat lei sámi árbevirolaš oahpaheami ja seailluheami birra.

Ollislaš bohtosiid ja digaštallamiid vuodul sáhtte lohkat ahte letne guorrasan informánttaid dieđuide, teoriijaide, iežame sámi duogážii ja dainna lágiin čoavdán dutkančuolmma heivvolaš lági mielde. Sámi mánáidčáppagirjjálašvuoda girjiigui máhttá ja sáhttá ovddidit ja nannet sámi árbevieruid buot osiin ja leat dehálaš oahpponeavvut skuvllas oahpahit sámi árbevieruid birra. Sámi čáppagirjjálašvuoda girjiid bokte besset oahppit oahppat sámi árbevieruid danne go mis Sámis leat nu čeahpes girječállit geat sihke nagodit ja hálldašit sámevuoda ja geain lea máhttu ja diehtu sámi árbevieruid birra čállit girjiid. Ja eanas dáin girječálliin leat sámegielagat.

7 Loahpahus

Dán kapihttala letne juohkán golmma oassái. Vuosttás oasis lea oahpaheddjiid oainnut sámi mánáidčáppagirjjálašvuoda girjjiin. Nuppi oasis fas jotke oahpaheddjiid ja sámi árbevieruid birra sámi mánáidčáppagirjjálašvuoda girjjiin. Goalmmát oassi lea dat mo oahpaheaddjít barget skuvllas sámi mánáidčáppagirjjálašvuoda girjjiiguin ja maid sii váillahit sámi čáppagirjjálašvuodás, lassin vel mo leat árvvoštallan válljejuvvon girjji *Áhkubiebmu*. Loahpas árvvoštalle iežame dutkanmetoda, dutkama jáhkehahttivuođa ja bukte muhtun jurdagiid dasa movt sahtášii dutkat viidáseappot dakkár fáttá.

7.1 Oahpaheaddjii oainnut sámi mánáidčáppagirjjálašvuoda girjin

Dan maid moai gávnnaheimme informánttaid vástádusaid bokte lea ahte oahppit liikojit bures gullat ja lohkat sámi mánáidčáppagirjjálašvuoda girjjiid, ábaide dalle go girjjiin lea oahpes fáddá ja oahpes fearánat. Dat addá ohppiide hálu lohkat girjjiid ja boktá beroštumi čáppagirjjálašvuoda girjjiide. Dat sáhttá oahpisvuoda geažil movttáaskahttit ohppiid jurddašallagoahtit ja nu hábmet miellagovaid fearániidda dalle go sii dihtet man birra lea sáhka. Letne maid vásihan oahppit stoahkagohtet áđđestallan stohkosiid maid leat gullan ja oaidnán muitalusas. Go ohppiide addá vejolašvuoda válljet girjjiid, de čájehuvvo ahte oahppit válljejit girjjiid main lea oahpes sisdoallu, maid bokte sáhtte iežaset identifiseret ja addá ohppiide movtta sárgut govaid fearána birra. Nuppe dáfus, de letne maid vásihan dan ahte, jus ohppiide addá girjjiid main lea eará kultuvrra birra, nu go ovdamearkka dihte vierrooskkuid dehe gávpoteallima birra, de ii leat ohppiin seamma stuora beroštupmi fáddái ja mii váikkuha ohppiid muitui. Oahppit eai darvet muitui amas áššiid ja fearániid nu bures go dalle go oahpes áššiid birra muitala. Dan dihte lea girječálliide dehálaš háhkät dieđuid girjji čáledettiin vai buot dehálaš dieđut bohtet mielde girjái ja dakko bokte seailluhuvvojít. Moai letne iežage vásihan dan maid informánta C lohká ahte oahpaheaddjis ferte álddis beroštupmi ja son ferte liikot girjjálašvuhtii jus galgá nagodit ohppiid movttiidahttit gullat muitalusaid. Go oahpaheaddjis lea beroštupmi girjjálašvuhtii, de son maid nagoda boktit ohppiid beroštumi girjjálašvuhtii. Oahpaheaddji ferte máhttit lohkat girjji sisdoalu mielde, atnit iešguđetlágan jienaid, gorut- ja ámadeaju lihkastagaid mo fearán ovdána álggus lohppii.

Váilevašvuodat sámi čáppagirjjálašvuodas leat informánttaid mielas dat ahte leat unnán sámi girjjit buot dásíide ja informánttat maid ohcaledje girjjiid mat lea čállojuvpon sámi vuogi mielde ja main sisdoallu lea balddihahtti ja gelddolaš. Dat leat ge sámi njálmmálaš muitalanárbevirolaš muitalusaid vuodđu.

7.2 Oahpaheaddjit ja sámi árbevierut sámi mánáidgirjjálašvuoda girjjiin

Go oahpaheaddjit válljejit čáppagirjjálašvuoda girjjiid, de sii dávjimusat válljejit sámi mánáidčáppagirjjálašvuoda girjjiid maid sápmelaččat leat čállán. Oahpaheaddji informánttat lohke ahte sámi girjjit leat girjjit maid sápmelaččat leat ieža čállán. Informánttat lohket sámi girječállis lea dat dárbašlaš oahppu ja máhttu čállit sámi mánáidčáppagirjjálašvuoda girjjiid go sii dovdet buot buoremusat sámi kultuvrra ja servodaga. Dat lea duogáš dasa ahte sii dávjá válljejit dakkár girjjiid oahpahussii. Informánttaid oaivila mielde ii boađe dáččaid/rivguid čállojuvpon girjjiin ovdan duohtavuođa dilli dalle go sii čállit sámi árbevirolaš muitalusaid go sis ii leat oahppu ja máhttu daid diliid birra. Dutkama bohtosiin maid boahtá ovdan man dehálaččat sámi mánáidčáppagirjjálašvuoda girjjit leat oahpahusas go dain ohppet ollu sámi árbevieruid ja kultuvrra birra, sihke dološ ja dálá áiggiid birra.

7.3 Movt oahpaheaddjit barget sámi mánáidčáppagirjjálašvuoda girjjiiguin skuvllas

Bohtosat muitalit sámi čáppagirjjálašvuoda girjjit leat bivnnuhat ja adnojuvvojit ollu skuvlla oahpahusas. Oahppit bessel oahppat sámi árbevirolaš bargguid, historjjá, ja eallima birra. Dat mii maid bođii ovdan guorahallamis lei ahte sámi mánáidčáppagirjjálašvuoda girjjiid galgá atnit oahpahusas nu mo oahpoplána deattuha. Bođiige maid ovdan informánttat válljejit girjjiid main sisdoallu lea oahpis ohppiide ja nu bessel identifiseret iežaset fearániin. Dat maid boktá ohppiid oahppanmovtta. Viidáseappot bođii ovdan ahte go lea fáddábargu, ovdamearkka dihte luondufágas, de sáhttá oahpaheaddji válljet muitalusgirjji lassidoarjjan oahpahussii danne go dat lea suohtasit go fáddágirji. Dainna lágiin nákcejít oahppit čiekjudit bargguide go lea oahpis, gelddolaš, somá ja lea maid ávkkálaš oahpahusas. Dán dutkanbarggu bohtosat muitalit dat njeallje sosiálakultuvrras oahppanoainnut gokčet sámi árbevieruid oahppama skuvllas, sámi čáppagirjjálašvuoda bokte. Govat leat dehálaččat girjjiin, dan oaivvildit informánttat. Oahppit ohppet ollu govaid bokte. Govaid bokte maid oahppit bessel

oaidnit mo sámi árbevirolaš biergasat ja dávvirat leat olggosoaidnit, ja makkár ávki dain lea. Sii maid bessel oaidnit makkárat leat sámi iešguđet guovllu biktasat ja makkárat dat leat olggosoaidnit.

Áhkubiebmu girjji buot informánta oahpaheaddjit atnán oahpahusas. Dan dadje leat buorren sámi árbevirolaš girjin go galgá oahpahit sámi árbevieruid birra. Viidáseappot muitaledje girjji heivet atnit buot skuvlafágain danne go girjjis lea rikkis giella, buorit govat mat muitalit ollu ja sisdoallu lea sámi árbevirolaš muitalus. Girjji sisdoallu maid oahpaha ehtalaš beliid ja norpmaid birra nu go dan mii lea riekta ja boastut ja dan ahte, buohkat galget leat seammaárvosaččat.

7.4 Loahppajurdagat

Go sámi mánáidčáppagirjjálašvuoden girjjiid galgá atnit oahpahusas, de lea ollu oahpaheaddji duohken maid oahppit galget oahppat ja makkár girjjiid son vállje ohppiide. Dat lea dehálaš ohppiide beassat diehtit manne juste dien girjji lea oahpahussii válljen, vai sii dihtet ja fuomášit maid sii galget oahppat, ja oidnet dan ávkkálašvuoden čáppagirjjálašvuoden girjjiid anedettiin nu go sámi árbevirolašvuoden birra. Go oahppit ipmirdit manne sii juste dien girjji galget lohkat, de dat addá motivašuvnna, sáhktiivuoden ja movtta lohkat ja soaitá ieš goas nu beassat ávkkástallat dainna oahpuin maid oažju dan girjjis. Letne beassan oaidnit man stuora ávkin oahppamii leat sámi mánáidčáppagirjjálašvuoden girjxit oahpahusas, nu go oahppat sámi árbevieruid, oahppat lohkat ja čállit, norpmaid ja árvvuid, oahpisvuoden, giellariggodahkan ja oahppat báikkálašvuoden ja oppalaččat sámi servodaga birra. Buot dát oasit leat mielde ovdánahtime oahppi sámi identifiserema nu go oahppat fuomášit gullevašvuoden, empatijja ja dovdduid.

8 Gáldut

Materiála

Palismaa, Marjatta 1995: *Áhkubiebmu*, Lappi Leanaráđđehus.

Girjjálašvuohta

Anmarkrud, Øistein & Refsahl, Vigdis 2010: *Gode lesestrategier på mellomtrinnet*. Oslo: Cappelen akademisk forlag.

Balto, Asta 1997: Árbevierru ja ođđa jurddašeapmi kultuvrralaš diehtosirdimis.- Asta Balto (doaimm.), *Diehtu ja gelbbolašvuohta sámis*. Kárášjohka: Davvi Girji. 39–55.

Bråten, Ivar 1996: *Vygotsky i pedagogikken*. Ivar Bråten (red.) Oslo: Cappelen Akademisk Forlag as. 13–41, 74–95, 123–187.

Fredriksen, Lill Tove 2012: Dat mii munne lea oahppis-kulturáđđejupmi ja konteaksta girjjálašvuodja analysis – *Sámi diedalaš áigečála* 2/2012: 39–56.

Gaski, Harald 1993: Oanehis girjjálašvuodja historjá. Aage Solbakk (doaimm.), *Sápmelaččat*. Kárášjohka: Davvi Girji os. 145–183.

Gaski, Harald 2000: *Njealját máilmmi čiegáin, Álgoálbmotgirjjálašvuohta*. Kárášjohka: Davvi Girji.

Gaski, Harald & Solbakk John Trygve 2002: *Čállet Sámi Verddet*. Deatnu: Čálliidlágádus.

Gaski, Harald & Solbakk, John T. 2004: Min njálmmálaš árbevieru. – Harald Gaski, John T. Solbakk ja Aage Solbakk (doaimm.), *Min njálmmálaš árbevieru: máidnasat, myhitat ja muitalusat*. Kárášjohka: Davvi Girji o.s.

Gaski Harald 2007: Juoigan – sámi musihkka máilmmis dahje máilmmi musihkka. – John T. Solbakk (doaimm.), *Árbeviolaš máhttua- ja dahkkivuoigatvuohta*. Kárášjohka: Davvi Girji o.s. 95–122.

Gaski, Harald 2012: Dat mii munne lea oahppis – kulturáđđejupmi ja konteaksta girjjálašvuodja analysis – *Sámi diedalaš áigečála* 2/2012: 39–56.

Guttorm, Gunvor 2007: Diehtu ja gelbbolašvuhta sámis. – John T. Solbakk (doaimm.), *Árbevirolaš máhttua- ja dahkkivuoigatvuhta*. Kárášjohka: Davvi Girji o.s. 61–94.

Halvorsen, Else Marie 2001: *Læreren som kulturbærer og kulturygger*. Kristiansand: HøyskoleForlaget.

Halvorsen, Knut 2008: *Å forske på samfunnet*. Oslo: J.W. Cappelen Forlag AS.

Hennig, Åsmund 2011: *Litterær forståelse*. Oslo: Gyldendal Norsk Forlag AS.

Hinna, Kristin; Ran, Choi; Rinvold, Reinert A. & Gustavsen, Trond Stølen 2016: *QED 1-7*. Oslo: Cappelen Damm AS.

Hirvonen, Vuokko 1999: *Sámeatnama jienat. Sápmelaš nissona bálggis girječállin*. Guovdageaidnu: DAT.

Hirvonen, Vuokko 2005: Illustration och tečt hand i hand- mångkunniga samiska forfattare – Lars-Gunnar Larsson & Torbjörn Söder (doaimm.), *Váimmus čiegan sániid*. Uppsala: Opuscula Uralica. 41–47.

Hirvonen, Vuokko 2009: Juoiggus uksan sámi njálmmálaš girjjálašvuhtii – *Sámi dieđalaš áigečála* 1–2/2009: 90–105.

Hirvonen, Vuokko 2014: *Sámi álbmotdikten*: Sámi allaskuvla.

Hirvonen, Vuokko 2018: *Njálmmálaš árbevierut kultuvrralaš árbin*. Deatnu: Čálliid lágádus.

Huuva, Rose-Marie 1999: *Galbma rádná*. Guovdageaidnu: DAT.

Jacobsen, Dag Ingvar 2013: *Hvordan gjennomføre undersøkelser?* Kristiansand: HøyskoleForlaget.

Jansson, Annika 2002: Girjjálašvuodja geavahus ja dan mearkkašumit giella seailluheapmái – *Sámi dieđalaš áigečála* 1/2002.

Johannessen, Asbjørn; Tufte, Per Arne & Christoffersen, Line 2016: *Introduksjon til samfunnsvitenskapelig metode*. Oslo: abstrakt forlag.

Joks, Solveig 2008: Boazodoallu-eallinvuogi máhtut – *Sámi dieđalaš áigečála* 2/2008: 21–36.

Keskitalo, Jan Henry 2009: Sámi máhttua ja sámi skuvlamáhttu: Teorehtalaš geahčastat – *Sámi dieđalaš áigečála* 1–2/ 2009.

- Kuokkanen, Rauna 2000: Eamiálbmogiid máidnasat. – Irene Piippola, Sulo Aikio, Carola Eklundh (doaimm.), *Girjin. näkökulmia saamelaiskirjallisuuteen = oaidninvuogit sámi girjjalašvuhtií = aspekter till samiska litteratur*. Inari: Kustannus Puntsi.
- Kuokkanen, Rauna 2009: *Boaris dego eana. Eamiálbmogiid diehtu, filosofijat ja dutkan*. Kárásjohka: CálliidLágádus.
- Kvale, Steinar & Brinkemann, Svend 2018: *Det kvalitativeforskningsintervju* Oslo: Gyldendal Norsk Forlag As.
- Larsen, Ann Kristin 2017: *En enklere metode*. Oslo: Fagbokforlaget.
- Lyngsnes, Kitt & Rismark, Marit 2007: *Didaktisk arbeid*. Oslo: Gyldendal Norsk Forlag AS.
- Nutti, Ylva Jannok 2009: Sámi árbevirolaš matematihka diehtu ja máhttua- Akšuvdnadutkamis sámeskuvllas – *Sámi diedalaš áigečála 1–2/2009*.
- Nyeng, Frode 2012: *Nøkkelbegreper i forskningsmetode og vitenskap*. Bergen: Fagbokforlaget.
- Oahpahusdirektoráhtta 2013: Oahppoplána – sámegiella vuosttašgiellan. (SFS1-04).
<https://www.udir.no/kl06/sfs1-04/>
- Oahpahusdirektoráhtta 2019: Oahppoplána – sámegiella vuosttašgiellan. (SFS01-05)
<https://data.udir.no/kl06/v201906/laereplaner-lk20/SFS01-05.pdf>
- Palismaa, Maren & Eira, Gaup Inger Marie 2001: *Gielas Gillii. Mielas Millii* Kárásjohka: Dávvi Girji.
- Porsanger, Jelena & Guttorm, Gunvor 2001: Árbediehtu- fágasuorggi huksen – *Dieđut* 1/2011: 13–57.
- Postholm, May Britt. 2011: *Kvalitativ metode*. Oslo: Universitetsforlaget. 2. Utgave.
- Postholm, May Britt & Jacobsen, Dag Ingvar 2018: *Forskningsmetode*. Oslo: Cappelen Damm akademisk.
- Rasmussen, Torkel 2014: Go ealáska, de lea váttis dápmat – *Dieđut* 5/2014.
- Røys, Helge; Gjøsund, Peik & Huseby, Roar 2007: *Didaktikk i skolen*. Oslo: Forlag Damm.

Sara, Mikkel Nils 2010: Mainna lágiin galget siiddat joatkahuvvot? Siidda sulladallama gažaldagat – *Sámi diedalaš áigečála* 2/2010: 25–55.

Sara, Mikkel Nils 2013: *Siida ja siiddastallan*. Fakultet for humaniora, samfunnsvitenskap og lærerutdanning. Norges arktisk universitet. <<https://hdl.handle.net/10037/8558>>.

Sámediggi 2017: Sametingsrådets redegjørelse om samisk litteratur
<<https://www.sametinget.no/content/download/2857/file/Sametingsr%C3%A5det%20redegj%C3%B8relse%20for%20samisk%20litteratur%202018.pdf>>.

Skaftun, Atle & Michelsen, Per Arne 2017: *Litteraturdidaktikk*. Oslo: Cappelen Damm.

Stokke, Ruth Seierstad & Tønnesen, Elise Seip 2018: *Møter med barnelitteratur*: Oslo Universitetsforlaget.

Solbakk, Aage & Solbakk, Odd Ivar 2005: *Kultur máhttua*: Kárásjohka: ČálliidLágádus.

Vars, Laila Susanne 2007: Diehtu ja gelbbolašvuhta sámis – John T. Solbakk (doaimm.), *Árbevirolaš máhttua- ja dahkkivuoigatvuhta*. Kárásjohka: Davvi Girji o.s. 123–166.

Vuolab, Kerttu 1995. Riggodagaid botnihis gálđu. Máidnasiid mearihis mearkkašupmi. – ----- Harald Gaski ja John Trygve Solbakk (doaimm.), *Cafe boddu 2*. Kárásjohka: Davvi Girji. 23–35.

Ylimartimo, Sisko 2000: Sápmelaš máinnasgovvagirji. – Irene Piippola, Sulo Aikio, Carola Eklundh (doaimm.), *Girjin. näkökulmia saamelaiskirjallisuuteen = oaidninvuogit sámi girjjalašvuhtií = aspekter till samiska litteratur*. Inari: Kustannus Puntsi. 88–116.

Wicklund, Beret. 2009: *Norskdidaktikk*: Oslo: Universitetsforlaget.

Eará gáldut

Palismaa, Máren [2020] = Ságastallan, Guovdageaidnu, dálvet 2020

Jearahallanofelaš

1. Álggos presenteret iežame.
2. Muitalit dutkanbarggu birra, makkár gažaldagaid áigo jearahit.
3. Muital makkár váikkuhusat jearahallamis leat, ovdamearkka dihte bohtosiid birra.
4. Čilget mo áiggut duođaštit jearahallamiid ja mii dahkkojuvvo jearahallan-skoviiguin ja jietnabáttiiguin maŋjil go dutkanbargu lea loahpahuvvon.
5. Sihkkarastit čiegusvuodja/anonymiteahta informánttaide jus lea maŋjil dárbu atnit daid.
6. Muitalit lea riekti geassádit jearahallamiin vaikko goas.
7. Muitalit informántti man guhká jearahallan bistá.

(Johannesen m.Fl. s. 149).

Oahpaheaddjit

**Gažaldagat oahpaheaddjái sámeárbevirolašvuodá birra sámi
mánáidčáppagirjjálašvuodá girjjiin**

1. Gažaldagat sámi čáppagirjjálašvuodá girjjiid birra.

- a) Liikojit go oahppit lohkat čáppagirjjálašvuodá girjjiid main fáddá lea sámi árbevieruid birra?
- á) Mii du mielas lea sámi árbevirolašvuhta sámi čáppagirjjálašvuodá girjjiin?
- b) Lea go mihkkege maid don váillahat sámi čáppagirjjálašvuodá girjjiin?

2. Gažaldagat: Sámi árbevieruid birra sámi čáppagirjjálašvuodá girjjiin.

- a) Anát go don ollu sámi čáppagirjjálašvuodá girjjiid oahpahusas main sisdoallu lea sámi árbevieruid birra? Makkár girjjiid anát ja manne?
- á) Maid ohppet oahppit čáppagirjjálašvuodá girjjiin main fáddá lea sámi árbevirolašvuodá birra?

3. Gažaldagat mo bargat skuvllas sámi čáppagirjjálašvuoda girjjiigui.

- a) Lea go du mielas dehálaš ahte sámi árbevirolašvuhta boahtá ovdan sámi čáppagirjjálašvuodá girjjiin maid skuvllas atnit oahpahusas?

- á) Mo sáhttá bargat sámi čáppagirjjálašvuodža girjjiigui skuvllas?
- b) Leat go govat dehálaččat ja mo du mielas galggašii govat leat sámi čáppagirjjálašvuodža girjjiin?
- c) Leat go don atnán oahpahusas daid girjjiid: *Áhkkubiebmu* ja *Firkkaláhkku*?
Leat go du mielas sámi árbevieruid birra dáin girjjiin ja mo sáhttá daid girjjiid atnit oahpahusas?
- d) Maid oahppit sáhttet oahppat dain girjjiin?

11. Mo sáhtašii daid girjjit atnit oahpahusas go fáddá lea árbevieruid birra?

Leago juoga eará maid háliidat lasihit?

Diehtu ja jearaldat searvat oassálastiin jearahallamiidda

Oahpaheaddjit

Moai, Ellen Anne Sara Gaup ja Ragnhild Gaup Eira letne studeanttat Sámi allaskuvllas ja galge váldit mastergráda sámi oahpaheaddjioahpu 1.-7. Ceahkis. Moai galge dutkat ja cállit mastera “mo sámi árbevirolašvuhta boahtá oidnosii sámi mánáidčáppagirjjálašvuoda girjiin” ja mo skuvllas barget dainna áššiin.

Dán barggu oktavuođas dárbbahetne oassálastiid/oahpaheddiid jearahallamii oačun dihte eanet dieđuid sámi árbevirolašvuoda ja sámi mánáidčáppagirjjálašvuoda birra smávvaskuvllas. Áigumuš lea gullat leat go sámi mánáidčáppagirjjálašvuoda girjiin oassi oahpahusas go fáddá lea sámi árbevirolašvuoda birra skuvllas.

Dat lea eaktodáhtolaš ášši searvat dán jearahallamii ja lea vejolaš geassádit goas nu, ja ii dárbbat čilget manne ii hálit joatkit dán jearahallamis ja guorahallamis. Buot dieđut, báddemati maid čohkejetne din birra, anonymiserejuvvoj. Jus searvvat, de mii šiehttat áiggi ságastallamii. Ságastallan bistá sullii ovttu dehe guokte diimmu, ja ságastallamat báddejuvvoj ja maŋŋil transkriberejuvvoj. Munnos lea jávohisgeatnegasvuhta ja buot mii daddjo ságastallamiin anonymiserejuvvo. Báiki, skuvla, namat dehe sensitiiva dieđut maiguin sáhhttá identifiseret olbmuid, čihkkojuvvoj ja anonymiserejuvvoj.

Moai sávve don searvvat jearahallamiidda!

Dearvuodat

Ragnhild Gaup Eira ja Ellen Anne Sara Gaup

